

**NATIONAL ASSEMBLY OF
SEYCHELLES**

Tuesday 16th November, 2021

The Assembly met at 09am

National Anthem

Moment of Reflection

Mr Speaker in the Chair

MR SPEAKER

Bonzour tou Manm Onorab. Bonzour nou telespektater e oditer ki swiv nou. E byenveni pou nou sesyon travay ki pou deba lo *Appropriation Bill*.

Bonzour Minis Naadir Hassan, Minis pou Finans ki'n zwenn nou pou deba lo *Appropriation Bill*.

Nou pou komans, *comme* tradisyon avek diskour *Leader* Lopozisyon Onorab Sebastien Pillay. Onorab ou annan laparol.

HON SEBASTIEN PILLAY

Mersi Mr Speaker. Bonzour Mr Speaker. Bonzour tou koleg Onorab, Minis e bonzour spesyal pou tou nou bann frer e ser Seselwa. Mr Speaker avan mon komanse, ozordi i le 16 Novanm, tradisyonnelman le 16 Novanm bokou nou, nou zwenn apre

midi dan zarden *State House* avek bann dimoun aze, bann trwazyenm-az, pou selebre lanniverser ansyen Prezidan, per fondater parti *United Seychelles*, Mr France Albert Rene.

So mon oule swet tou siporter *United Seychelles*, malgre ki i pa en zour lafet, me i en zour *remembrance* pou travay ki Mr Rene in fer pou nou pei e dan nou parti.

Mr Speaker, ozordi ler mon pran laparol pou reponn sa diskour Bidze ki Minis pou Finans in prezant devan nou Lasanble, i enportan pou mwan *remind* Lepep Seselwa serten fe pertinan, serten keksoz ki konman en Nasyon nou bezwen pran an konsiderasyon.

I neser pou nou fer en pti tour lorizon e dekonstri sa Bidze pou vwar si i pe reelman reponn lapel sa pep. I enportan pou ou ki ou ki pe ekout mwan, pou demann ou lekor en kekyon tre fondamantal.

Eski sa diskour Bidze prezante par Minis pou Finans anba sa Gouvernman *LDS* pe reponn lapel sa sanzman ki ou ti pe rode? Eski sa Bidze i reprezant en Gouvernman ki pe fer pli byen ki sa enn ki ti la?

Pandan plizyer lannen ki *US* ti dan Gouvernman Lopozisyon sa letan dirize par

Mr Ramkalawan ki ozordi i Prezidan Larepublik, pa'n mank okenn lokazyon a sak fwa ki Bidze ti ganny prezante pou fer nou rapel ki mannyer konman en Gouvernman nou ti pe sitan mal fer.

Zot ti koz bokou lo ki mannyer konman en Gouvernman nou ti napa en plan e ki Seselwa pe soufer dan enn bann pei pli pir o monn.

Bann politisyen dan son parti ti atak tou laspe sak Bidze ki nou ti anmennen, a leksepsyon enn, e promet ki par met zot dan en Gouvernman lavi sak Seselwa i sipoze amelyore.

Alors kestyon ki ou ki pe ekout mwan mon frer e ser Seselwa, sa ki ou devret demande se eski ou'n vwar ou lavi amelyore anba sa Gouvernman *LDS*?

Seselwa ti ganny dir ki en sanzman ti neser, en sanzman kot pye pou ganny sakouye e kot larzan pou ganny mete dan zot pos. Seselwa ti ganny dir ki Sesel 'pou tou son zanfan' e ki en Gouvernman *LDS* pou anmenn meyer fason fer e benefis pou tou Seselwa san leksepsyon.

Konstaman *SNP* e *LDS* ti met presyon pou atak tou linisyativ bann Gouvernman *SPPF*, *Lepep* e *US*, linisyativ ki

ozordi Gouvernman *LDS* pe dir se zot ki'n fer.

Ki swa Lekonomi Ble oubyen sanzman klima plizyer devlopman ki pandan 43an *United Seychelles* ler ti dan Gouvernman in travay dir akote tou Seselwa pou akonplir.

Nou ti ganny fer rapel ki *US* in fer dimoun vin depandan lo *Welfare*, san konpran ki program *US* ler nou ti koz lo *Welfare* sete en sistenm entegral, depi sipor sosyal, ledikasyon pou nanryen, lasante pou naryen, program lozman kot nou priyorite anba Gouvernman *SPPF*, *Lepep*, *US* sete asir lazistis sosyal kot nou pep i viv dan dignite.

Pou nou sa pa'n zanmen en destinasyon, me en lapros travay kontinyel pou kontinyen batir en pei kot tou Seselwa pa zis bann ki annan me tou Seselwa i war son plas.

43an, 43an kot nou'n asire ki devlopman i al kot dimoun en non pa anmenn dimoun kot devlopman.

Nou lapros sete si en zanfan i bezwen al lekol, i pa pou mars enn erdtan pou ariv lekol, konstri lekol dan nou bann kominote, asire ki tou zanfan i annan goute kot lekol, laprantisaz ki pa swazir stati sosyal sa zanfan.

Met an plas bann mezir pou protez tou kous nou sosyete kont lenpak globalizasyon. Fer tou pou esey asire personn pa ganny kit deryer.

Nou ti osi annan en program pou investir dan kapasite nou pep, kot bokou Seselwa in benefisyte avek letid avanse dan liniversite. Dan sa Lasanble i annan plizyer nou.

E sa in elev stati sosyal la mazorite fanmir Seselwa. In fer nou vin enn bann pei pli devlope dan Lafrik e menm en legzanp pou *le monde* antye.

Nou sistenm lasante primer ki ozordi Gouvernman LDS pe depan lo la pou enplimant program vaksen, i en lot laspe sa sikse kot nou filozofi konman en Gouvernman, sete anmenn swen lasante primer pli pre avek ou mon bann ser ek frer.

Nou'n konble later pou fer lakaz e donn loportinite biznes. E dan tousala zanmen nou ti bliye pou fer sir ki bann ki dan difikilte i kapab ganny en soutyen.

Wi mon bann frer e ser Seselwa se sa fason ki en Gouvernman *SPPF*, Lepep, *US* ti travay akote zot, e sa ki'n fer ki nou'n akonpli bokou pou sa pei. Kwa alors ki sa Gouvernman

LDS pe anmennen nouvo pou nou?

Nou war li pe koup riban lo bann proze ki Gouvernman *US* ti'n konmanse. Nou war zot pe sey enplimant bann nide ansyen Gouvernman *US*. Me kwa ki zot, zot in vin avek?

Lannen pase nouvo Gouvernman *LDS* ti dir ki sa se Bidze ki zot in vin zwenn la, zot pou enplimant li dan zot fason, pa zot ki'n prepar li e dan menm parol dir ek Seselwa vey ler zot, zot prezant zot premye Bidze la ki Seselwa pou vreman war kapasite sa Gouvernman *LDS*.

La ki Seselwa pou kapab gout fri sa sanzman ki sa Gouvernman *LDS* ti oule anmennen. Eski alors Seselwa i satisfte avek kapasite sa Gouvernman *LDS*?

Sa letan malerezman Minis, atraver ou Mr Speaker ti pe fer politik konstaman, pou dir nou ki zot in zwenn en kales kase, me Lepep Seselwa in vwar ki sa kales kase in permet zot vwayaze partou, al danse dan lotel *Dubai* e pran kredi pou travay ki sa sistenm ki ti la 43an in fer.

Me mon bezwen admet Mr Speaker, nou vwar li enteresan pou tande ozordi ki Minis pou Finans i dir ek lapres ki li i pa en politisyen e li konman en teknokrat i pa vin koz lo ki

manner *Cabinet* Minis in aranz zot bann *allowance*, sa ki drol se ki li Minis i kontredir son lot koleg lo sa size.

Kot ler Minis Hassan i dir napa naryen ki nouvo an relasyon sa bann *allowance* son koleg Minis Derjacques i klerman eksplike kwa ki nouvo an piblik dan sa Lasanble.

E sa i tipik sa Gouvernman. Apre ki Gouvernman in donn en Bidze ki Lepep Seselwa pa satisfise avek, soudennman nou annan en lot skandal koripsyon ki ganny mete a la zour a lain san nouvel.

Zisteman pou tir latansyon lo inefikasite sa Gouvernman. Me sa pa devret etonn nou Mr Speaker, Gouvernman in pran en tandans fer nenport kwa, e dir nenport kwa avek lekspektasyon ki nou pep pou bezwen aksepté.

Ler nou ti dekouver, ki pa ni menm lan apre ki zot in pran lofis *Cabinet* antye ti al fer *retreat* pou resarz zot batri lo Silhouette, e ziska ozordi nou pa konnen lekel ki'n peye nou ti ganny menm difikilte pou ganny en larepons.

Si sa ti'n pas anba en Gouvernman *US* nou tou nou kapab mazine ki ti pou arive. Alors pa vwar li drol ki napa ni

menm lan menm dimoun ki'n vot pou *LDS* ti lo rezo sosyal pe konplent, dan semen pe konplent, lo medya pe konplent.

Wi mon bann frer ek ser dimoun pe demande oli sa sanzman ki zot ti ganny promet? Dan lan tou sa ki zot ti dir ki Gouvernman *US* ti pe mal fer pe ganny fer parey.

Annefe sel diferans la mon dir sel diferans zot in ogmant lafason ki bann ki pli annan, anba en sistenm *LDS* pou pli byen pase. Se sa sanzman ki *LDS* pe donn nou pep.

An realite Lepep Seselwa sa premye swadizan Bidze Gouvernman *LDS*, i ranpli avek lenkonsistans e kontradiksyon, kot nou pe vwar en Gouvernman *LDS* ki pa ti ankor pare pou diriz nou pei, konplent tou keksoz e les li ganny trennen dan tou direksyon par bann akter kle ki'n *sponsor* zot.

Fini bann gran parol lo lenterferans politik, ozordi nou vwar ki napa distenksyon ant striktir leta e striktir politik. Kot par lepase *LDS* ti dir ki *US* i met son bann aktivis pou kontrol striktir Gouvernman Lokal, ozordi se *LDS* ki met aktivis pou kontrol striktir Gouvernman Lokal.

Serten pozisyon pe ganny donner pou satisfere faver

politik e sa ki annan kalifikasyon pe zis gete. Sa ki drol, e la sa i bizar, menm siporter *LDS* i konplent, i ganny atake oubyen ganny *warning* pou zot pa koze.

Gouvernman i kontinyen fer tou son posib pou anpes kritik ou a dir i alerzik avek sa mo. I pa oule ganny dir kan keksoz i mal.

Bann lafors lord ek lape pe ganny direktiv ki mannyer pou tret okenn konplent kont Leta, e parfwa menm vin donn piblik lenformasyon ki pa korek.

Nou vwar lenterferans direk Prezidan e son bann Minis dan travay Lafors Lapolis, kontrerman avek Lartik 160 nou Konstitisyon.

Ler Komisyoner Lapolis i donn direktiv baze lo sa ki Prezidan Larepiblik in dir, lo kote en sitwayen pou eksprim son drwa menm si sa sitwayen pa'n kas okenn Lalwa, Sesel mon bann frer ek ser pe al ver en klima *oppressive* kot kritik e protestasyon anver Gouvernman i paret pa pou ganny tolere.

Gouvernman *LDS* i anba lenpresyon ki si ou pa dakor avek son propozisyon, si ou pa dakor ek son lapros ou pe fer nwizans, ou pe kree enstabilite.

Me ki *SNP* ek *LDS* in fer pandan tou zot listwar? Eski zot pa ti proteste, eski zot pa ti manifeste?

Sa lapros *oppressive* i al pli lwen, ozordi menm zenn ki eksprim zot lekor kont bann sef politik zot ganny arete e detenir. *Denigration* karakter i pran en lot lelan zis pou fer tou, pou ki personn pa kritik Gouvernman.

Leskiz ki pe ganny servi se enstabilite politik. Sa mon bann frer ek ser i zis en propagann - en propagann sa Gouvernman pou anpes dimoun eksprim zot drwa.

Sa i enkli osi Latak lo swadizan siporter *United Seychelles* ki ankor travay dan servis piblik ki zis en fason pou eskiz linefikasite sa Gouvernman e fer malis sa bann dimoun.

E sa i fer lapenn. Ozordi se zot ki pe pratik ek nou pa ek nou. Larealite mon bann frer ek ser desizyon pou fer tou keksoz dan sa pei i dan lanmen Gouvernman *LDS*, e la pa ekspekte son mazorite dan Lasanble pou kestyonn sa ki Gouvernman i vin avek. Parey nou pe war tou sa ki Gouvernman i vin avek pou pase.

Alors pou donn *allowance* i dan zot lanmen, pou sanz Lalwa pou fer plezir dalon i dan

zot lanmen zot ki dir ki pou fer menm si parfwa bokou nou, nou krwar zot pa konnen ki pou fer.

E la sa ki pli drol dan zot inefikasite zot oule blanm Lopozisyon, *United Seychelles* i devret fer isi, *United Seychelles* i devret fer laba, me selman ler *United Seychelles* ti koze, ler *United Seychelles* ti *challenge* zot, nou ganny dir Seselwa in fer desizyon pou met *LDS* la, les zot travay.

Sa size \$50milyon ki pandan 6an, ki zot ti annan tou *file*, tou lenformasyon i en ka tipik. Frer e ser Seselwa, pa *US* ki dan Gouvernman.

Se *LDS* ki annan lakle pou ouver tou laport oubyen sanz tou *lock*, pa nou! Fodre pa ki nou pep i retonm dan sa latrap ekout sa group politisyen ki'n promet zot lesyel ek later, e aprezan ler zot vwar ki sa bann gran promes pa realizab, zot blanm tou lo lezot.

Ni *SNP* ni *LDS* pa'n zanmen siport Bidze a leksepsyon enn fwa, ler ti sanz kondisyon pou bann politisyen.

Ni program *IMF* zot pa ti vin devan an 2008 e sa ki nou konnen se ki politisyen *senior LDS* ki ozordi i annan gro plas dan Gouvernman ti dir avek Linyon Eropéen tap Sesel kot i fermal. Sa i lo rikord.

Alors i pa etonan apre ki ou'n pas plizyer lannen zis kritike, pou ou vwar en difikilte reel pou ou kapab anmenn keksoz pozitiv pou sa pep.

Wi mon bann frer ek ser, sa Bidze i enn ki reprezant en kontradiksyon reel, e mon ferm konviksyon ki zot in ganny anbete.

Ozordi Gouvernman *LDS* i oule eksplike ki *COVID* in met nou retar, difikilte ekonomik i reel e nou bezwen fer ankor sakrifis.

Pandan kanpanny parkont, *COVID* ti zis en pti montanny a sirmonte, fasil, akoz zot ti annan tou larepons, tou stratezi.

Malgre tou zefor par Legzekitiv dirize par Prezidan Danny Faure pou esey responsabiliz sa pep anver *COVID*, politisyen *LDS* ti pratik en lapros lesefer e pa pran *COVID* o serye.

Sa kalite lapros ki'n anmenn nou kot nou ete ozordi en kontradiksyon i kontinyen. Annou pran en pti moman pou regarde ki mannyer zot kontredir zot lekor.

Minis i dir nou e sa i son parol. Ozordi, mon kapab deklare ki sa parkour pli difisil i deryer nou e nou lekonomi e sityasyon finansyel in stabilize

e nou'n komans lo sa long larout pou re konstrir nou pei.

Sa i en fraz dan son *speech*. Pli tar i redir nou parey mon'n dir, i pa'n dir sa li, selman i dir ou, parey mon'n dir kanmenm nou'n amelyor en kantite, nou lekonomi pa ankor rekipere 100 poursan e keksoz pa ankor retourn normal.

Ou bezwen pran ou en desizyon. Swa nou'n rekipere, swa nou pa ankor rekipere. En zour pei pe fer sitan byen, en lot zour zafer pa bon. Parey mwan mon bann frer ek ser zot in bezwen tandé ki mannyer Gouvernman ti pe sitan byen fer apre pou tann en lot versyon ki zafer pa tro bon.

Minis pa ti li menm sant leloz sa size *savings* lo medya kot i ti dir nou, ki i annan en *savings* plis ki en R1bilyon ler i ti pe koz lo Bidze Siplemanter, mo ki ti ganny servi sete *savings*.

Menm bann manm ki reprezant son parti dan sa Lasanble ti repet sa. Ozordi Minis Hassan atraver ou Mr Speaker, ki pa en politisyen me en tenokrat i dir nou li i ti prezant en rediksyon dan Bidze pour en total R1.4 bilyon.

I nepli koz lo *savings*, i koz lo rediksyon. Sa letan alors Minis, eski ou ti pe fer politik? Sa in osi swiv kot li ek son

Prezidan ti koz lo to lesanz ki ti'n desann e ki mannyer bann Polisi ki li ek son Gouvernman in met an plas in fer sitan byen.

Problenm avek sa se ki apre ki Minis ti'n fer son politik e ti'n ariv ler pou pas benefis sa bon travay avek zot mon bann frer ek ser, en sel kou nou ganny lir en litani problenm. La nou ganny dir nou bezwen esper 2023.

Sa ki pli enteresan se ki Prezidan Larepiblik li menm ti koz lo son bann sikse. Par egzantp sistenm dyaliz, nou ti vwar en kantite keksoz lo la. La Minis i dir nou sa i ankor ser. Eski Prezidan ti *mislead* nou?

Nou ti menm ganny dir nou rezerv in monte, Minis i dir nou, nou rezerv i ankor sansib eski Prezidan ti *mislead* nou? E la pa bliye dan son kanpany eleksyon LDS ti promet ki Lentere lo ou pti larzan dan Labank pou osi ogmante.

Minis dan sa Bidze in koz lo *loan*, san realize ki pou en mazorite Seselwa i ankor difisil pou ganny *loan*, eski la osi Minis ek Prezidan pe *mislead* nou?

Mon bann frer ek ser fodre zot ekout byen, sa Gouvernman LDS i dir en keksoz demen e fer en lot. Naryen pa ilistre sa pli byen ki sa size GICC. Mwan mon'n temwanny latak lo sa

konpanyen dan Sizyenm Lasanble kot ti ganny dir *GICC* pe fer biznes ek Gouvernman e la menm Bidze pou Minister Lozman sa letan ti pres pou pa pase.

Nou ti sey anbaras ansyen Minis pou Lozman, zisteman pou nou sey montre ki mannyer *GICC* ti pe pran benefis lo ledò Lepep Seselwa. Onorab Ferrari sa letan ki Minis Dezinyen ozordi ti dir ki *GICC* pe tro benefisyè a travèr Gouvernman.

Me ozordi Gouvernman *LDS* i sanz son *tune*. Minis i dir ki *GICC* pou ankòr pe fer travay pou Gouvernman. Ki nou kapab konpran?

Wi in ler mon bann frer ek ser pou ekout tre atantivman kwa ki ganny dir avek zot, obzerv de pre aksyon sa bann politisyen ki sipoze defann zot lentere.

Napa naryen ki sa Gouvernman pou anmennen ki son mazorite pa pou sipòte, sa ki zot ti ganny dir par bann *Leaders LDS* ki zot pou *challenge* zot prop Gouvernman ti.

En mansonz en mansonz pou anbet ou mon frer ek ser zis pou vot pou en Gouvernman *LDS*. E la note ou pe ganny dir pa proteste si keksoz i mal, akòz sa pou anmenn enstabilite

politik, pa dir i mal akòz sa pou montre napa linite.

Sa se en Gouvernman ki'n vitman bliye ki i ti pou vin travay pou tou Seselwa. Pandan plizyer lannen lapros bann politisyen sa Gouvernman sete pou fer ou mon frer ek ser reziste ler Gouvernman i fer travay pou ou byennet.

LDS ti ankouraz plizyer manifestasyon dan sa pei. Laprev politisyen kle dan *LDS* ti devan, pe koz dan ou zorey e dir ou bann zoli parol, e sa ti zis sa zoli parol pou fer ou krwar ki zot pou fer pli byen.

Kot yer travayer sektè piblik ti ganny ankouraze *text MNA* ozordi si en travayer sektè piblik i kestyonn sa ki pe arive, gran sans i ganny *warning*, gran sans i ganny met deor.

I menm danzere ozordi pou *traffic warden* aret en loto *President's Office*. Sa lenkonsistans i osi ganny ilistre a travèr plizyer aksyon sa Gouvernman, Minis i dir ki sa sityasyon ki sa ladministrasyon ti'n erite, i enn tre trakasan.

Depans ek reveni ki nou ti pe anmase pa ti balanse. Nou depans ti bokou plis ki nou reveni. Me sa ki enteresan se ki Gouvernman in depanse lo son lekor, *retreat* lo zil Silhouette pou al resarz batri, ale vini lo

zil, al *Dubai* eksetera. Parkont zot lapros avek ou mon frer i tre diferan.

Ler ou pran latet en Gouvernman sakrifis ou pep i devret vin ou sakrifis. Si li i pa kapab vwayaze ou osi egzers restren, tenir solider ek li. Si i pa kapab groupe, ou osi egzers restren tenir.

Si li i pa pou ganny logmantasyon egzers restren e tenir. Se sa ki karakteriz en Gouvernman ki annan son pep a ker.

E la pran par legzanp *long service allowance*, nou'n ganny dir sa pa pou ogmante ankor enn fwa, eski ou konman sa travayer ki'n trimouse pandan plizyer lannen ou krwar sa i byen, konbyen ki en logmantasyon *long service allowance* ti pou koute ki fer li sitan difisil pou donnen?

Gouvernman in dir i pa kapab donn ou en 13enm mwan saler, me o mwen i ti a donn ou sa pti logmantasyon. E la mon swe pou bann frer ek ser, si vremen sa Gouvernman ki ou'n met la, swadizan pou anmenn en sanzman i vremen ekoute, si i ti ava konsider sa ki mon pe dir, akoz ki ou devret kontinyen fer sakrifis e Leta li i a diverti kontan lo ou lasyer?

Mwan mon demann i reste parey donn travayer Seselwa en

keksoz sa lafen lannen. Ki swa son gratwite si i travay kot *ANB*, ki *long service allowance*, 13enm mwan pou bann ki dan *salary band* pli ba, me omwen donn travayer en keksoz. Ler ou realize ki pa ni menm lan *Cabinet* li in sanz bann *allowance*.

Nou ti kapab ogmant sa *long service allowance*. E la nou konn realite, en logmantasyon *long service allowance* i benefisye plizyer kad travayer dan servis piblik, *teachers*, *nurse*, *Lapolis*, *SRC* eksetera.

Nurse ki'n donn 20an dan zot profesyon, *teachers* ki'n donn 20an. Lalis i long. Eski ler politisyen *LDS* ti ankouraz *nurse* avek *teachers* pou fer lamars, ler travayer *SRC* ti *strike*, zot ti pe ganny zis servi pou anmenn sa bann politisyen *LDS* o pouvwar.

Ler nou pran kont ki menm *allowance* pou *COVID* serten dimoun pe aret gannyen ou bezwen demann ou lekor si Sesel i vremen pou tou son zanfan, oubyen sa ti zis bann parol dan vid.

Larealite i senp, nou tou ki la annou osi lager pou ki nou bann frer ek ser i ganny o mwen en keksoz la, pa les zot esper ziska 2023.

Mon bann frer ek ser nou bezwen anmenn pli lwen lanaliz

lo lentere Lepep Seselwa dan sa Bidze, not byen ki *US* in toultan donn travayer Seselwa avan ki i donn politisyen, *LDS* i donn son lekor avan i donn Seselwa.

Mwan mon krwar Gouvernman i kapab fer en keksoz pou zot mon bann frer ek ser.

Nou kapab osi ilistre kontradiksyon sa Gouvernman ler nou get sa size *low cost housing*. Mon bann frer zot ganny dir dezormen ou pou al reste dan *low cost housing*, ki mannyer sa *low cost housing* pou ete nou pa konnen.

Apre plizyer lannen ki nou dan *US*, pandan sa 43an ki nou'n tir Seselwa dan *low cost housing*, nou'n tir Seselwa dan karavann ozordi *LDS* i anvi remet ou dan *low cost housing*. I dir ou sa bann lakaz tro zoli pou ou.

Alors dan kwa ki zot anvi Seselwa i reste. I paret ki serten kalite lakaz pa ale avek serten Seselwa? *United Seychelles* ti bezwen lager serye pou ki zot pa koup *part rental* parey zot ti oule, en problem pou donn R2500 *part rental*, parkont Gouvernman pou napa problem lwe lakaz R25,000 pou bann Minis.

Sa i anmenn nou lezot baz ki sa premye swadizan Bidze Gouvernman *LDS* in ganny

prepare. La mon bezwen dir ki nou remersye bann vre teknisyen dan Minister Finans, nou konnen ki zot pe travay anba bokou presyon, me keksoz i tre difisil ler Gouvernman i mank leksperyans.

Politisyen *LDS* i kontinyen enterfer dan travay profesyonnel. Nou'n vwar sa osi dan Lasante e dan Lapolis. E la ankor enn fwa zot kontredir zot lekor lo progre, ou bezwen annan ou pep aker.

Sitan lenvestisman ki pe ganny fer an relasyon avek proze kapital, kan nou pa konnen konbyen Bidze Proze Kapital pou ete pou sa lannen.

R9.7 bilyon reveni ki pou antre an relasyon avek proze kapital, i pa kler ki pou arive demen si ou pou dir nou ankor enn fwa zot in fer *savings*.

E sa lannen ankor parey nou ti dir Minis lannen pase, i tre anbisye pou enplimant sa bann proze. Eski ankor enn fwa ou pou retournen, ou pou vire ou pou dir nou ki ou'n fer *savings*?

Si sa i zot premye Bidze ki sipoze reprezant abilite Gouvernman *LDS* pou diriz nou pei, en Bidze avek en program lenvestisman kapital R1.53 bilyon i riske met presyon pou nou sirmont difikilte ekonomik.

Serten sa bann larzan tin kapab al ver benefis direk tel ki logmantasyon *long service allowance* bann travayer sekter piblik. San pran kont bann don ek plis ki R9bilyon.

Parey mon'n dir, i difisil konpran kwa ki antre, kwa ki sorti avek zot. Prezan annou vin lo sa size lapovrete. Mr Speaker, mon bezwen pran en letan la, akoz i paret ki dan son diskour Minis pa'n adres ditou sa size lapovrete.

Ou'n fer serten *statement* an relasyon avek *STC*, me sa ki zot pa'n dir nou, se ki pou arive avek sa 40 poursan lapovrete ki ti seval batay *LDS*, ki paret apre Oktob 2020 in sove dan leta. Soudennman eski nepli annan lapovrete Sesel.

Mon ti a kontan konnen ki *IMF* i annan pou dir lo la, akoz okenn program reform ekonomik i bezwen adres nou sityasyon lapovrete.

Me sa ki pli enteresan ankor, e si ou anmenn sa lo size pri lavi, en diskour Bidze a en moman sitan difisil dan son parkour devlopman en pei, me preski napa koze lo pri lavi. Zis detrwa pti paragraf.

I kler ki si i annan en keksoz ki demontre ki mannyer sa Gouvernman in *let* nou pep *down*, se lo sa size pri lavi.

Ler Minis i vin mansyonn 3 komodite dan son Ladres Bidze, mon kestyon Minis, se eski Seselwa i aste zis 3 komodite.

Parske Minis i konsider son konpran sitan en gran sikse, ler i annan en sitan gran diferans dan pri komodite dan bann laboutik. Keksoz i pli ser dan laboutik ler pri Dolar i pli ba. Ki mannyer nou kapab konpran sa.

Ozordi nou nepli tann koze lo pli bon *middlemen*. I pou anmenn komodite pli bon marse dan pei. Me plito Minis i dir nou sa *statistic* i montre ki abilite pou zwenn nivo demann pou bann komodite i en fakter kle ki pe kontribye pou ogmant nivo pri.

Be ki ou Minis avek ou Gouvernman pou fer pou fer desann pri lavi? Mon vwar li drol ki *IMF* pa'n osi koz lo la. Lekonomi en pei i bezwen servi son pep, pa zis serten.

E si *IMF* pe travay lo reform ekonomik, ou pa kapab dir nou i pa konsernen avek pri lavi. Annefe sa size pri lavi i enn parmi bann ki'n ganny mwens latansyon dan diskour Minis. Plito lanfaz in lo *STC* ki mannyer in fer *savings*.

Me si *STC* in fer *savings* avek, in fer serten *savings* pas sa avek son konsonmater.

Oubyen osi *STC* in vin dan biznes fer larzan lo ledò Seselwa. En pe difisil pou krwar me sa i enteresan, *STC* pe negosye ek fournisè pou meyer pri.

Petet Gouvernman i ankor pe rod sa bann pli bon *middlemen*. Antretan pri dan bann magazen pe tous plafon e Seselwa i a kontinyen sibir.

Me sa ki enteresan se ki nou tande an se ki konsèrn pouvwar *d'achat* pou met larzan dan pos Seselwa, Gouvernman *LDS* pe al revwar kad saler li an 2023.

Me sa pou vin an aplikasyon, zis avan eleksyon. Kot par lepase *LDS* in kritik logmantasyon saler dan servis piblik an dizan sa pe ganny fer pou anmyel dimoun avan eleksyon, li menm i vire i fer egzaktèman parey.

Parkont antretan, sa ki pli annan a kontinyen benefisye avek konsesyon, kontra e malere a kontinyen espere. Bann lenkonsistans koumsa i fer ou demande si reelman Gouvernman *LDS* i krwar dan sa ki zot pe dir.

La nou ganny dir *tax* 25 pousan pe al ganny tire lo transpor pasaze, petet i byen pou serten. Eski Gouvernman pe ankouraz dimoun aste loto? Oubyen sa en fason pou serten

gro biznes benefisye? Seselwa ouver zot lizye.

Sa bann fason fer i karakteristik en Gouvernman ki dan zis en lannen bann levennman pe depas li, e pe rod tou fason pou li aziste.

I annan plizyer presyon lo li pou satisfè ban akter kle ki'n ed li ganny eleksyon, e kontrèman avek lapros Gouvernman *US* anba Prezidan Faure *LDS* pa kapab reziste sa presyon.

Sa bann akter dan lekonomi i oule *platform*, zot oule met presyon lo Gouvernman. Me malèzman Gouvernman *LDS* pe *cave in* ek sa bann presyon.

Pran tou sa koze lo diversifikasyon lekonomi, mon ti ekspekte plan konkret pou fer sa arive. Malèzman Minis pa'n donn nou naryen konkret lo plan son Gouvernman, me parey labitid nou ava tann detruwa *interview* lo televizyon ki pou koz lo serten gran plan.

Si Gouvernman i reelman serye avek son program relans lekonomi, fodre i fer en zefor reel pou zwenn avek tou akter kle dan lekonomi, pa zis serten. I annan group ki pe demann pou zwenn ek Gouvernman pandan plizyer mwan, me pa ankor kapab ganny li.

Reprezantasyon pou Praslin ek La Digue dan desizyon in vin en legzersis politik kot menm bann propozisyon pou donn plis lavwa, nou bann zil Gouvernman LDS pa oule ekoute.

Nou pe koz lo Sekter Lapes, Sekter Lagrikiltir, kot dan Sekter Lapes zis serten ki annan zorey Minis, ki ganny sans koz lo bann gran devlopman ki pou arive.

Minis Ferrari pa ankor kapab dir ou ki pou arive ek Lakor Linyon Eropéen, si Gouvernman pou al re negosye. E ankor enn fwa dan son *speech* Minis pa'n mansyon sa ditou.

An se ki konsern Lagrikiltir, Minis i sant leloz bann fermye ki pe fer prodiksyon.

Bann ki pe kontinyen travay e prodwi. Mon ti a kontan demann ou Minis, pou apros sa bann fermye e demann zot si bann desizyon resan ki ou Gouvernman in pran an relasyon avek sa sekter, zot satisfè avek.

Parey mon'n dir, Gouvernman LDS i bezwen *walk the talk* an se ki konsern konsiltasyon. Kot par lepase in akiz tou dimoun pou al fer

konsiltasyon, ozordi i vire e i pe fer menm parey.

Mezir zot sikse baze lo travay ansyen Gouvernman san montre ki plan reel zot annan Mr Speaker, pa fer sans.

Ozordi Minis i koz lo sistenm Ledikasyon, e la mwan mon koz sistenm ledikasyon akoz mon zanfani asiz lo menm ban lekol avek pou ou mon bann frer ek ser Seselwa. I al dan menm lekol ek sa ki pou ou.

E mon pe dir ek ou koumsa, ki Minis pa'n prezant nanryen nouvo an se ki konsern sistenm Ledikasyon. Okenn mansyon ki mannyer sistenm Ledikasyon pou kontinyen evolye. E i pa drol.

Mon'n vwar menm difikilte pou koz lo Sekter Lasante. Ankor enn fwa Sekter Lasante pa'n ganny en tretman spesyal dan sa Bidze. Plito nou'n vwar en diskisyon lo bann depans dan byen e servis ki Gouvernman i sipoze revwar.

Okenn mansyon lo ki mannyer pou adres bann defayans dans a sekter ozordi. Sa stres ki *COVID* in mete lo nou *workforce* dan sistenm Lasante, e ki mannyer pou kontinyen *incentivise* zot pou kit zot moral anler.

Nou pep i dwa en mersi partikilye nou bann *staff* Servis

Swen Lasante, nou bann dokter, nou bann *nurse*, zot tou.

Eski Gouvernman pou kontinyen annan en *allowance* pou soutenir nou bann dimoun ki zot osi zot zanfan i bezwen al lekòl, ki zot osi zot bezwen al fer depans dan menm laboutik ki nou.

Ki plan Gouvernman pou *tackle* bann retar dan *referral* pou war spesyalis, e menm lentervansyon sirizikal ki an retar?

Ki plan Gouvernman pou adres mankman serten medikaman kot ou pe war en pansyoner, ganny dir al dan en klinik apre en lot zis pou konstate napa medikaman pou sa pasyan ki annan kondisyon leker e sel rekour se al pey R400 kot en farmasi prive?

Focus lo realiz bann proze ki Prezidan in koz lo la, zis pou *look good*, pa meyer fason pou *monitor improve* Servis Swen Lasante. E la pran kont ki nou bann *staff* dan Servis Swen Lasante i fatige.

Pa tro lontan Mr Speaker, mon ti ganny dir *get real*, e la mon pe vin *real* menm la. E fotespere nou tou nou vin *real* dan sa Lasanble. Fon *COVID* ki ti ganny formen pou ede avek depans an fas *COVID*, sa in preski fini epwize, eski

Gouvernman i pare pou prezant en lodit lo sa Fon fer par Oditer Zeneral pou ki tou Seselwa a konnen ki bann depans ki'n ganny fer anba la.

Larealite mon bann frer e ser Seselwa napa naryen pli *real* ki lenpak ki *COVID* in annan lo nou. Ki swa ou'n ganny *COVID* oubyen ou'n perdi ou pros avek *COVID*, *COVID* i reste avek ou.

Gouvernman ti'n devret fer sa ki bokou lezot pei in fer, e sa se fer plas dan son Bidze pou dimoun ki'n ganny afekte ek *COVID*;- kot manm fanmir ki ti kapab kontribye nepli la oubyen lenpak sa ki'n ganny dekrir konman *long COVID*.

Malerezman Minis in rat sa sans pou konsidere ki sipor Gouvernman i kapab anmennen. E zot dir nou zot pran *COVID* o serye. *Getting real* Mr Speaker, i osi vedir aksepte ki ozordi i annan bokou konplent lo linefikasite Gouvernman.

US in mentenir presyon lo Gouvernman pou kontinyen annan en *social safety net*, sa malgre plizyer koz dan Gouvernman *LDS* nou ti fer tou pou koupe.

Me akse avek sa sipor i reste en problem, e si nou get *real* dan sa Lasanble, nou ava admet ki plizyer dimoun i

kontinyen text nou, akoz ki manner zot pe ale vini pou zot kapab ganny akse avek en lasistans.

I fermal pou en dimoun ki klerman pa kapab fer de bout zwenn pe ale vini. E ler nou tandé Gouvernman pe *reassign* bann *Scheme* avek lezot antite keston ki souleve, se eski ou Gouvernman pe anmenn plis birokrasi dan ki manner sa bann keksoz i ganny fer?

Eski sa pa riske fer plis dimoun soufer? Annou *get real*. Mon pa konnen si zot pou ezite dir mwan, mon bann frer ek ser, al dir nou bann frer ek ser, dir nou bann frer ek ser Seselwa, aret depan lo Gouvernman e al travay.

Me pou al travay ou bezwen ganny en travay. Antretan ki Minister Ledikasyon e Minister Lanplwa e Minister Lafanmir, Lazenes pou ankor pe fer plan, antretan ki zot pe zwenn pou fer Polisi, Seselwa ki pe rod travay ki zot kalifye pou fer pa pe gannyan.

Minis li menm in admet ki dan serten sekte, dan serten biznes i ankor tro difisil pou bann Seselwa profesyonnel ganny loportinite dan pozisyon Egzekitiv.

Nou annan Seselwa ki kapab, ki kalifye e devoue ki

merite sa bann pozisyon Egzekitiv.

Me, i enteresan Minis, dir ek ou Gouvernman ek ou bann koleg, pa enterfer dan desizyon Departman Imigrasyon ler i pa oule les serten endividi ki pou al travay dan serten gran lotel antre. Pa tro pran faver ek sa bann letablisman akoz apre i vin pli difisil pou dir zot ki pou fer.

E ler prosen lankadremant *GOP* fotespere ou konsilte tou sekte. Par egzantp *Praslin Business Association*, kot vremen Seselwa pe ganny met a kote, Gouvernman i a pran aksyon.

Aksyon Gouvernman lo serten size parey nou tou nou'n konstate tou dernyerman i parfwa en *predictive*. Sa desantralizasyon *staff* kontabilite i remet plis kontrol depans ek bann Minis, e sa i fer ki se zot ki pou annan bann desizyon final parfwa.

Minis in koz lo sanzman dan bann Lalwa *Procurement*. Me sa ki nou ti a kontan konnen, ki sistenm kontrol ki Minister Finans pou gard an plas.

Eski Minister Finans pe ranforsi son sistenm *internal audit*, pou asire ki bann kontrol entern i ganny mentenir. E ki bann program e lafason ki

nou'n travay lo asire ki i annan *accountability* e transparans dan Gouvernman i ganny mentenir. Mon ti ava ekspekte Minis ki ou ti'n dir nou serten keksoz lo la.

Prezan Mr Speaker, annou vin lo sa size depans enprevi. I enteresan pou vwar ki lapros ki Gouvernman in servi pou mentenir latransparans bann tel depans. Fotespere ankor enn fwa nou *get real* e kestyonn Gouvernman lo sa size bann konpansasyon ki *due*, tel konman pou La Misère, tel koman pou *fungus* e lezot.

Ti ava bon ki nou ganny en kontrandi pandan *Committee Stage* lo Bidze ki bann depans ki'n ganny fer anba sa ki nou apel *Contingency Fund*.

Nou konnen ki nou'n fer serten depans relye ek *COVID* partou, ki osi ganny fer anba Bidze *Health Care Agency*, e anba *COVID Fund*. Depans pe ganny fer partou, fodre nou kapab vwar kwa ki sa in anmennen.

Me la mon bezwen vin lo en size ki Minis i paret pa'n tret ditou dan son Bidze. Annefe mon'n sey rod sa mo dan son Bidze, dan son *entire* ladres mon pa'n war. E sa se sa size koripsyon.

Pou en Gouvernman ki'n koz sitan kantite lo koripsyon, mon war li en pe drol ki zot pa mansyonn nanryen, oubyen preski nanryen lo koripsyon.

Annefe sa mo koripsyon i preski pa aparet dan ou diskour Minis. Si pou annan sipor adisyonnell pou konbat koripsyon, i neserer.

Dan son premye Bidze mon ti'n ekspekte Gouvernman *LDS* fer serten nouvo propozisyon pou ranforsi e protez sistenm governans kont koripsyon.

Sa i osi konsern travay pou anpes larzan kit nou lekonomi. Dan rapor *FIU* par egzantp nou'n vwar ki plizyer bilyon pe sorti dan nou sistenm, petet Gouvernman nouvo i kapab propoz meyer fason pou *monitor* kwa ki pe arive e ki mannyer pou idantifye si bann tranzaksyon i annord.

Mon ti'n osi ekspekte ki Minis i koz plis lo sipor ki pou ganny donner, an sa ki konsern lord ek lape dan nou pei e konba kont kriminalite.

Mon pa'n war en sou lanfaz ganny mete lo sa size malgre ki Prezidan li menm ti koz lo bann latak kont touris par egzantp. Sa bann zafer atak touris Mr Speaker, personnelman, oubyen kas lakaz ou prosen mon dir i pa

normal e Lapolis i bezwen reste vizilan e pran aksyon kot i nesaser.

Pa bliye, e la mon pe koz ek ou la deor, ler ou atak en touris, ler ou vol en touris ou donn nou pei en move repitasyon. E ou tir manze dan labous enn nou frer oubyen enn nou ser.

Sa ki kler i sa ki Gouvernman in dekrir konman son premye Bidze i enn ki reprezant en difikilte reel en Gouvernman pou fer fas avek larealite governans, e son presyon ki vin avek.

Kan yer ti fasil kritike ozordi ou ki bezwen enplimante, rod nide e vin inovativ.

Dir keksoz dan en fason sansasyonnel e zis fer bann *statement* vag i anmenn plis konplikasyon, aköz ler ou dan Gouvernman ou bezwen kapab fer sa bann *statement* vin en realite.

Napa lespas pou met blanm lo lezot aköz governay i dan ou lanmen. En diskour Bidze ki pa koz lo sipor bidzeter lo lalit kont drog, lo travay ki bezwen ganny fer pou mentenir lord ek lape tout an *respectant* nou Konstitisyon.

Tout en seri size ki sansasyonnel, ki fasil fer bann *statement*, me ozordi avek

burden, oubyen responsabilite gouvernen i vin pli konplike pli kompleks aköz zisteman konman en Gouvernman tou dimoun pou demande ki ou a la oter sa ki ou dir e promet.

Ler ou ekout en diskour Bidze ki pa mansyonn ditou lazenes, ni sa mo li menm pa ganny servi. Ler ou vwar Gouvernman in *repeal* le sel *Board* Governans kot bann zenn ti annan en *say* lo lekel ki pou reprezant zot.

Eski alors sa Gouvernman *LDS* i serye pou realiz laspirasyon nou bann zenn? Apre tou en gran kantite nou bann zenn in *buy in* dan sa propozisyon sanzman. Kestyon se eski zot pe reelman war sa sanzman arive?

Mwan mon ti'n ekspekte ki premye diskour en vre Bidze Gouvernman *LDS* parey zot oule fer nou krwar, zot ti pou ankadre sa ki lazenes dan nou sosyete pe rode. Malerezman sa i pa le ka.

Mr Speaker govern en pei pa fasil e ou bezwen serye tre serye ler ou pe fer li. Lo sa kote latab nou konn tre byen ki savedir govern pei.

Nou konnen ki mannyer pou amenn e realiz laspirasyon nou pep, zenn konman pli aze. Pandan plizyer lannen nou'n sibir latak nou bann oponan lo

tou size e souvandfwa nou'n les pase akoz nou ti panse ki sa pep i a realize ki nou'n travay e ki nou annan sa leksperyans pou anmenn nou pei pli devan ankor.

Nou ti'n ekspekte ki zot a fer konfyans ki apre defi e lensertitid, nou ti pe batir en sosyete enklizif, pou tou Seselwa. Kot pou travay dan pozisyon kle dan servis piblik pa neserer ou siport sa parti oubyen en lot.

Seselwa ti lib pou al kot Lorloz, travayer servis piblik ti lib pou *text MNA*, *text Leader* Lopozisyon, koze, *strike*, fer tou sa ki i anvi.

Nou ti'n anmenn en sistenm gouvnanans kot sa ki ganny mwens ti pey mwens e sa ki ganny plis ti pey plis. Sesel dezormen larealite in vin diferan.

Bokou Seselwa in bliy sa parkour difisil ki ti ganny fer pou anmenn nou pei kot i ti'n arive. Ozordi sa ki ganny mwens pe ganny demande pou donn plis e sa ki ganny plis leta pe aranze pou li donn mwens.

Se sa ki an Oktob 2020 Seselwa dan son mazorite ti deside i fason fer ki zot oule. Alors si Minis pou Finans in delivre son diskour pou reprezant direksyon son Gouvernman dan son fason, lo

mon kote ti neserer pou mon fer li dan mon fason, fer nou pep reflexir lo bann mankman e malez ki egziste dan nou pei ozordi.

Enn bann malez resan an sa ki konsern laz *retirement* ki Gouvernman fek anonse, zot in aprouve. Mon krwar Gouvernman i bezwen retournen e anmenn plis konsiltasyon piblik lo sa size avan ki i pran en desizyon ferm.

Mr Speaker, lespri nou demokrasi i egzize ki malgre Gouvernman i annan responsabilite gouvnen, i nou devwar koman lopoziyon pou fer ki sa responsabilite i baze lo gouvnen dan lentere tou Seselwa e non pa pou fer keksoz dan benefis zis serten.

I nou devwar konman lopoziyon pou asire ki sa ki pli bezwen nou led dan lasosyete i gannyen, pou fer sir ki zot pa ganny met akote akoz zot ganny konsidere konman enferyer. E sa pe komans arive dan nou pei.

Frer e Ser Seselwa, mwan mon reste fyer sa parti ki mon reprezante. Nou'n kontribye bokou pou anmenn nou pei kot i ete. Nou pasyon e konviksyon sete toultan pou anpes nou pei retourn an aryer.

Nou determinasyon sete toultan pou asire ki nou pep i

ganny son lidantite, devlope e batir en Nasyon rezilyan, en nasyon toleran e en nasyon kot konpasyon pa'n zanmen perdi son plas.

Malgre bann defi, malgre tou difikilte, malgre tou zefor pou silans nou, personn pa pou kapab anras nou sa ki'n nou'n akonplir pou sa pei. Sa ki nou'n batir, sa ki nou'n konstrir malgre tou zefor pa pou ganny efase.

We are fearless in dignity.
Nou pou fer Sesel fyer ankor!
Mersi Mr Speaker.

(APPLAUSE)

MR SPEAKER

Mersi Onorab *Leader* Lopozisyon. Pou swiv mon ava envit Onorab Bernard Georges, *Leader Business* Gouvernman pou prezant son diskour. Onorab Georges.

HON BERNARD GEORGES

Mersi Mr Speaker. Bonzour Mr Speaker. Bonzour Minis, bonzour tou mon bann koleg dan Lasanble e tou dimoun ki pe swiv nou.

Mr Speaker, Sanmdi le 24 Oktob 2020, Lepep Seselwa dan son gran mazorite ti konfyè ladministrasyon nou pei Sesel,

dan lanmen Prezidan Wavel Ramkalawan e son lekip *LDS*.

I byen pou note o komansman ki *LDS* ti demann permisyon pou diriz nou pei pou 5an e lepep in akord nou sa loner.

Nou pa'n pran par lafors akoz nou ti krwar ki nou ti pli konnen, parey en bann ti fer. Nou'n espere, nou'n pasyante e nou'n kontinyen demann Lepep Seselwa ziska ki dan zot sazes zot in war ki letan ti'n arive pou donn nou sa loportinite.

Nou pa'n vin ni an misouk, ni demann okenn dimoun pou aste kabri dan sak. Nou ti met nou program kler devan lepep, parey nou'n fer sak fwa ki nou'n konteste en eleksyon.

An plis ki sa, pei e lemonn an antye ti pe fer fas a en kriz san presedan kot lasante ti an dout e lekonomi mondyal ti dan gro problem swivan pandemik *COVID-19*.

Ler Lepep Seselwa ti swazir Prezidan Ramkalawan e parti *LDS* pou diriz pei, zot ti konn sa. Tou dimoun ti konnen ki pei ti dan difikilte, ki naryen pa ti serten, ki lavenir ti dan gran dout, ki redresman ti pou difisil.

Nou parti *LDS* ti'n fer sa byen kler dan manifesto eleksyon. Dan son

lentrodiksyon dan sa manifesto kandida Ramkalawan ti dir e mon site.

“Mon sir ki sa pou en moman avek bokou defi. Nou pa kapab evit kriz ki nou fer fas avek dan laform pandemik *COVID-19*. Be defi pou toultan la e nou pou trouv lafors e resours pou sirmont zot. ” Fen sitasyon.

“E ankor nou pou en Gouvernman desizyon e aksyon. Nou pou azir avek rezolisyon pou sirmont defi e entrodwir en nouvo moman loportinite, baze lo lefe ki Sesel i pou tou son zanf an e ki desten nou pei i dan lanmen nou tou. ” Fen sitasyon.

Plan aksyon sa Gouvernman ki ti pe rod ganny eleksyon ti kler, e i ti osi an nwar e blan dan sa manifesto.

Sirmont *COVID-19*, fer li ou Gouvernman, rod loportinite pou Seselwa. Elev nivo saler e lavi; *shape* en meyer pei, konstri en sosyete for, investi dan lazenes. Ler Seselwa dan son sazes e dan son gran mazorite ti vot pou en Gouvernman *LDS* apre 43an anba en sel parti, nou ti konnen ki nou ti pe fer.

E nou ti fer li aköz nou ti konnen ki si ti annan en dimoun e en group ki ti pou kapab pran labar nou pei a sa

moman, sete pa lot ki Wavel Ramkalawan e son lekip.

Bondye i konnen ki i fer, Mr Speaker, e in prepar sa zonn pandan 30an ladversite konman en politisyen pou asim pouvwar o moman pli difisil dan nou listwar.

Sa ki’n arive le 24 Oktob 2020 pa’n ariv par laverti okenn tabatyer, e i pa ti ni en lazar ki ti’n tonm dan potis.

Sete, o kontrer, en moman byen prepare pandan en long letan, ki ti konmans par en sermon en zonn *tousel* dan Katedral Saint Paul dan en moman pli fernwar dan nou listwar, e ki ti abouti dan en seremoni pret serman a moman pli difisil dan nou pei.

Me ki ti war lavil Victoria deborde ek dimoun, enkli lanmenm la deor sa menm Katedral Saint Paul. I annan en proverb Angle, Mr Speaker ki dir, “*Cometh the moment, cometh the man.*”

An Kreol nou kapab tradwir sa dan sa fason. “Ler moman i merite, en dimoun apropiye i arive.” E set egzaktaman sa ki Sesel ti eksperyanse lan pase.

Moman ti merit en dirizan for e rezoli, listwar ti’n prepar enn, Lepep Seselwa in swazi sa zonn pou fer fas a sa moman. Me en zonn *tousel* pa kapab fer

tou sa ki bezwen ganny fer pou redres en pei.

Pou dirize i bezwen en dimoun, wi, me travay ki devan nou ozordi set enn ki bezwen ganny fer par en lekip otour sa dirizan.

E la, Mr Speaker, apre 1 an ki nou'n war zot travay, nou kapab dir ki dan son swa Minis endividyel e dan son *Cabinet* an antye, Prezidan in fer en swa ekstraordiner.

Sakenn sa bann Minis in sezi le moman, in sezi defi, in sezi lide dan manifesto *LDS*, e sakenn zot pe delivre. Sa se en group fanm ek zonm ki travay dir, ki pa per atrap lanmans pyos, ki pa rod ariv lakaz 4er apre midi, ki an kontrol zot departman e zot portfey respektif.

Parmi sa group fanm ek zonm i annan ki'n kit lanplwa kot zot benefis finansyel ti pli gran e ki in annan, e i annan lezot ki'n met zot progresyon dan zot karyer *on hold* pou zot zwenn Gouvernman a en moman pli *challenging* dan nou listwar.

Ozordi Mr Speaker, mon sezi sa lokazyon pou remersye sakenn sa bann Minis pou zot travay, pou zot devouman, pou zot servis anver Lepep Seselwa. Parmi sa Konsey Minis i annan enn an partikilye ki o sant tou

bann Minister e tou bann Departman.

Sa se sa enn ki devan nou dan Lasanble ozordi. Se li ki *allocate* larzan pou sak Minister e sak departman. Se li ki bezwen, anmezir ki i pe *manage* son prop Minister, osi annan en regar lo sak lezot Minister e Departman pou asire ki resours i la pou bann defi i ganny sirmonte.

E se li osi ki la avek en lipye lo fren pou fer sir ki gaspiyaz e lesefer i sorti dan *management* en Gouvernman, e en kouto dan son lanmen pou koup lagres kot i fodre koupe.

Minis Hassan Mr Speaker, in montre nou ki disiplin fiskal i posibil, ki fer plis avek mwens i posibil, ki bon kontrol i anmenn bon gouvrenans, e ki bon zesyon resours lepep pou ed nou atenn bann lobzektif ki nou manifesto ti promet avek nou pep.

Mersi Minis pou ou travay, pou ou *leadership* dan redresman nou lekonomi, me sirtou pou sa latitid pozitiv e ankourazan ki ou amenn dan zesyon finansyel nou pei.

Me i osi annan de lezot konponan kle pou redresman en pei e dan atenn lobzektif ki dan manifesto parti o pouvwar, e lo baz lekel Lepep Seselwa ti elekte nou.

Premye konponan, se nou Lasanble. Sa Lasanble i en konponan kle dan en pei, Mr Speaker. E zanmen plis ki dan en pei ki pe sirmont difikilte.

Konman bann reprezantan lepep, ki'n ganny elekte par lepep, swa direkteman dan en distrik ouswa nasyonalman, sakenn parmi nou, lo tou lede kote latab, nou annan en devwar pa selman anver bann dimoun ki'n elekte nou, me en devwar Nasyonal, pou fer sa ki nou Lim Nasyonal i demann nou.

E ki zot moto lo lot kote latab dan dernyen eleksyon, e Koste pou ed nou pei sirmont difikilte. Ler sa pou'n arive, i pou annan plen letan pou fer politik, pou atak lide kanmarad, pou tanzantan frot en pe tro lo bor nou *Standing Orders*.

Me *cometh the moment, cometh the man* Mr Speaker. I annan en moman kot nou bezwen, dan lentere nasyonal, met nou gran diferans de kote e marye pike pou sov nou pei.

Parey mon'n dir souvan, i annan de moman kot en Lasanble i bezwen bliye ki i annan de kote, e azir konman en sel, koz avek en menm lavwa e non pa senpleman konman en parti Gouvernman e en parti Lopoziyon.

Mon regrete Mr Speaker, ki sa pann manifeste son lekor ase dan sa dernyen lannen. In annan tro divizyon, tro latak personnel, tro politik bonmarse e pa ase grander lespri, pa ase met Sesel an premye, ouswa parey zot kontan dir "met zonn o sant devlopman."

Dan kour term, en politik popilis i rezonnen. Tou dimoun i kontan antann zot reprezantan demann plis pou zot, atak mezir ki, dan zot lespri, pe tro tarde, rod en *quick fix* san annan en lizye lo lavenir.

Me a lonterm, sa politik i senpleman en drog. Ler ou pou nepli kapab donner, dimoun pou revolte e i pou re vir lo ou. E avek sa enn drog, Mr Speaker, napa *methadone*. Ou pou bezwen al *cold turkey*.

Alor, mon bann koleg lo lot kote latab, mon sipliy zot, pa tonm dan sa pyez opoz tou sa ki sa Gouvernman i fer, pa rod partaz larises avan ki larises i ganny konstri, pa kas anba en ladministrasyon ki pe travay dir avek bann *show*.

Sa mo ki en bann zot i kontan servi bann *show* o bor Lorloz e lo SBC ki zis senm konfizyon e opoz pou lapenn opoze. Parey Levanzil i dir "*large est la route qui mene a la perdition.*"

Plito asim zot responsabilite, ed zefor pou redres nou pei e ler tou keksoz avan bon, la atak Gouvernman lo son stratezi parey en lopoziyon responsab i merite.

Dan sa fason, nou ava kapab viv nou moto Linite dan Diversite e non pa sa enn ki zot pe viv ozordi diversite dan dezord. Mon pe koz avek leksperyans.

Ler nou ti dan Lopoziyon e napa okenn group ki konn Lopoziyon plis ki nou, aköz nou'n pas pros 30an lo zot kote latab.

Ler nou ti dan Lopoziyon, nou pa ti ezite pou solider avek Gouvernman dan son moman ladversite.

An 2008, ler ti annan kriz ekonomik mondyal e Gouvernman Prezidan Michel ti forse pran bann mezir difisil, enkli devalye Roupri, nou ti debout solider avek son Gouvernman.

Lannen pase, ler *COVID* ti tap nou, ankor enn fwa, nou ti siport bann mezir difisil, enkli en lamannman Bidze, pou les program *FA4JR* ganny met an plas.

Dan ladversite nou ti la, Mr Speaker, dan sa Lasanble, pe fer nou devwar. Nou pa ti o bor Lorloz dan liniform *Teletubbies* pe akiz okenn

dirizan konman boufon. Non, Mr Speaker, nou ti en Lopoziyon responsab, parey ozordi nou en Gouvernman responsab.

Dezyenm konponan ki esansyel pou redresman en pei, Mr Speaker, se son pep.

En Gouvernman i o pouvwar par permisyon son pep e i annan en responsabilite pou govern dan lentere son pep.

Me en pep osi, ki'n met en Gouvernman o pouvwar a en moman kritik aköz selon li sa Gouvernman ti lesel ki kapab sirmont sa kriz pa fini son travay ler i sorti dan stasyon vote.

I annan en responsabilite pou fer son kontribisyon li osi pou ede remont lapant e redres pei. Pe enport ki nou siporte, sakenn parmi nou, nou annan en responsabilite pou fer nou bout.

E nou ganny demande pou fer zis de keksoz. Pa plis, me zis de keksoz. Premye, se annan pasyans ki pou en meyer demen nou bezwen senm lagrenn ozordi, e dezyenm se travay dir e dan en fason responsab ozordi.

Pares, trenn lipye e pa pran responsabilite, i kapab amenn satisfaksyon a kour term. Ou pa fatigue, ou ariv lakaz boner, ou napa traka, ou

weekend i pou ou diverti-kontan.

Napa nanryen ki pli gou ki sa. Sel problemn avek sa se ki demen lekonomi pou dan plis difikilte, lanplwa pou pli napa, laz pansyon pou monte e ou pou still limero 30 lo lalis lakaz.

Lo lot kote, travay dir e travay dan en fason responsab i permet nou tou ganny en saler, pa bezwen viv lo *welfare*, pey nou kontribisyon pansyon e kapab pran kontrol lo kan e kote nou pou ganny en lakaz, olye esper Gouvernman fer sa pou nou.

Sak Seselwa, Mr Speaker, i annan en responsabilite pou fer son bout pou amelyor son prop lavi. Pa esper Gouvernman, akoz Gouvernman li i annan 100 mil dimoun pou li okipe e ou enn parmi sa 100 mil.

Pran ou prop desten dan ou lanmen, akoz koumsa ou annan zis ou pou satisfere, ou ek ou fanmir, e ou pou ariv lo ou destinasyon bokou pli vit. E Gouvernman li i pou la pou ed bann ki pa kapab, pa bann ki pa oule.

Mr Speaker, mon'n anvri pran sa letan pou sitye nou dan konteks dan lekel sa Bidze pou ganny egzaminen dan sa bann zour ki pe vini.

Zefor pou nou amelyor nou pei i pa zefor Prezidan selman, ni Prezidan avek son Konsey Minis, ni Minis Hassan tousel, me i zefor kolektif zot, nou dan sa Lasanble, e sak Seselwa, la kot i ete.

Ler sa Gouvernman ti vin o pouvwar i ti erit 3 gran problemn, 3 gran defi. Premye, 43an en sel Gouvernman, dezyenm pandemik *COVID-19*, trwazyenm sanzman klima. Zis enn sa bann defi ti pou ase pou en Gouvernman dil avek.

Tou le trwa ansanm ti en latas enorm. Premye, sa 43an o pouvwar par *SPUP*, *SPPF*, Lepep, *US* ti'n etabli en sistenm Gouvernman depanse san kontrol adekwat, lesefer partou kote, depandans lo Gouvernman.

Dezyenm, pandemik *COVID-19* ti'n met lekonomi ater e pei ti dwa, san annan okenn sans direksyon pou tir nou dan sa difikilte. Trwazyenm, sanzman klima ti pe menas nou zil elwannyen e lakot nou Zil Pros.

Gouvernman *LDS* in met en program 5an devan Lepep Seselwa. Parey Prezidan ti dir pa tro lontan pase, Gouvernman pa'n ganny elekte pou lan. In ganny elekte pou 5an.

E Mr Speaker, i pou la pou 5an. E sa plan aksyon dan manifesto pou ganny fer dan sa 5an, pa per. Se dan sa konteks ki nou devret egzamin Bidze ki devan nou ozordi.

Me, avan nou fer sa Mr Speaker, annou pas en pti letan pou egzamin politik parti US e esey regarde kote pei ti pou ete ozordi si eleksyon pa ti'n amenn LDS o pouvwar.

Mon pa pe envant okenn keksoz ki mon pe al dir. Mon pe senpleman servi sa ki zot parti in dir dan zot bann konferans lapres ki zot in donnen, e sa ki zot an fas zot in koze dan sa Lasanble.

Premye, *Airport* ti pou ankor fermen e tou lotel ti pou vid.

Dezyenm, pei ti pou ankor anba *lockdown*.

Trwazyenm, program *FA4JR* ti pou ankor pe marse e nou det ti pou'n ariv pros pou tous lesyel.

Katriyenm, program *URS* ti pou ankor en destinasyon travay pou bokou dimoun.

Senkyenm, drog parey eroin ti pou *still* pe antre dan pei par santenn kilo.

Mon dir sa Mr Speaker, akoz listwar in montre ki US pa'n efektif dan zot lalit kont drog par lepase. Me mon

rekonnet ki dan konferans lapres US yer, Mr Herminie in felisit Gouvernman pou son sikse dan sa lalit.

Lo mon par e lo lapar nou caucus, mon oule osi felisit lafors Lapolis Militer ek *Coast Guard*, pou zot travay egzanpler dan sa lager. Sa ti mon senkyenm pwen.

Sis, *Air Seychelles* ti pou ankor dwa \$70milyon avek *Etihad* e 40 pousan sa lakonpanyen ti pou ankor dan lanmen etranze.

E setyenm, bliy 13enm mwan, menm lapey lafen dimwan bokou dimoun pa ti pou pe gannyen, akoz lekonomi ti pou'n faid.

I annan ankor, Mr Speaker, me mon krwar ki sa bann legzanp i ase pou montre nou dan ki problenm nou ti pou ankor ete ankor ozordi, si Lepep Seselwa pa ti'n amenn sanzman an 2020.

Ler zot pe rode ki sanzman in anmennen, lala, sanzman ki'n anmennen Mr Speaker. Malgre sa sitasyon dezespere ki nou'n erite avek ansyen Gouvernman US, lo sakenn sa bann mezir ki Gouvernman in pran pou amelyor sityasyon nou pei e byennet nou popilasyon, parti US in opoze, in senm lafreyer, in rode kree dezord.

Prezan, permet mwan pou retourn lo Bidze 2022. I annan de kalite Bidze ki fasil pou en Minis Finans, Mr Speaker. Enn se en Bidze ler pei i dan gro problemm ekonomik.

Tou dimoun i konnen ki pei i dan problemm e Bidze aproprye i bezwen pou deal avek sa bann problemm. Alor Minis Finans i amenn en Bidze defisit-er an konesans ki i napa lot swa.

Lepep osi i konn sa, e i aksepte sa. Minis Finans US in fer sa lannen pase, annou pa bliye. Lot Bidze fasil, se ler lekonomi pe perform byen. La Minis Finans i annan larzan pou depanse e i swazir bann programm kot i pou mete pou partaz larises pei.

Bidze 2019 par egzantp, ti enn sa bann Bidze. Minis Finans ozordi i annan en latas difisil aköz nou dan en sityasyon kot kriz in amelyore, me problemm i ankor annan.

Alor, i bezwen trouv en *middle road* ant sa de swa investi kot i merite e sere kot i bezwen. An dot mo, Minis in bezwen prepar en Bidze rekonstriksyon, pa enn ser sang selman, pa enn larg dilo selman.

Me son premye e pli gran latas se trouv sa balans ant fer marse pei e prepar teren pou

lavenir pa losterite, pa lazes, me en Bidze rezilyan. Minis Hassan in eksplike ki si nou pei ti en pasyan dan Lopital, i ti pou'n sorti dan ICU, me i ti pou *still* lo *ward*. Gerizon pe vini, me pasyan pa ankor byen.

Lekonomi pe rebran, me i pa ankor fini retourn lo staz *optimum*. Larzan pe antre, me i still pa ase. Bidze 2022 i pli bon ki sa enn 2021, me i *still* en Bidze defisiter. I pa balanse.

Gouvernman pou depans plis ki i anmase. Sesel pou bezwen pret larzan pou finans sa Bidze. Sa Mr Speaker se la realite, Mr Speaker.

Dan 1an, Gouvernman LDS in fer en progre remarkab e in tir nou dan ICU. La, an 2022, avek lagras, i pou amenn gerizon e tir nou pei lo *ward* e anvoy li se li, byen e for.

Sa Bidze 2021 ti en Bidze *emergency*, Bidze 2022 i pou en Bidze konsolidasyon, en Bidze regilasyon e en Bidze modernizasyon pou nou pei. Sa progre Mr Speaker, pa'n ariv par laverti.

In ariv par en ladministrasyon serye ki'n administre nou pei dan en fason serye.

Depans in ganny koupe kot fodre, gaspiyaz in ganny met en fren avek, e desizyon difisil, me desizyon ki dan

lenter e nasyonal e pou byennet a lonterm nou popilasyon in ganny pran.

‘Nou pou en Gouvernman desizyon e aksyon’, Prezidan ti dir dan son manifesto. Lekel Gouvernman ki anvi pran desizyon difisil, Mr Speaker?

Lekel Gouvernman ki’n fek ganny elekte ki bezwen dir avek bann ki’n elekte li esper ankor en pe? Botan pe vini? Lekel Gouvernman ki anvi pran risk san ki i konn egzaktaman ki rezilta sa desizyon ki i pou al pran?

Me gouvrenen se fer swa, se pran desizyon. E gouvren byen, se pran desizyon ki bon e ki pou raport rezilta. Minis in dir nou ki reouvertir lekonomi an Mars 2021, pa ti en desizyon fasil.

Parti *US* in kondann sa desizyon. Me desizyon in ganny pran e ozordi pei pe fer byen. Aret *Scheme FA4JR* pa ti en desizyon fasil. Parti *US* in kondann sa desizyon.

Me desizyon in ganny pran e ozordi larzan pe antre olye zis sorti. Ferm *Scheme URS* e pa pey 13enm mwan lapey sa lannen aköz larzan i manke dan Bidze pa ti en desizyon fasil, malgre ki zot prop Minis Finans an 2020 ti’n fini fer nou konpran ki pa ti pou annan si *US* ti’n ganny eleksyon.

Me desizyon in ganny pran e nou pei pou pli rezilyan aköz sa de desizyon in ganny pran. Ou war, Mr Speaker, diferans ant Gouvernman e Lopoziyon ozordi, se ki Gouvernman i vin devan lepep e pran desizyon kler, pou rezon neser, san kas kontour.

Lopoziyon pa’n konpran diferans ant fer progre e ariv kot ou anvi arive. Sesel pe fer progre ekonomik, me Bidze i *still* defisiter. La i pa ankor ler pou larg delo.

Gouvernman i bezwen fer sa dernyen bout semen avan konmans retourn benefis sa sakrifis, ki tou dimoun in fer, avek popilasyon.

An parlan sa, konbyen dimoun ki ti pou’n kapab ganny 13enm mwan lapey avek sa bann ‘larzan forgo’ ki *Cabinet* an antye ti’n pran e apre ki zot in pas deryer e zot in pran?

Sa letan, pa ti annan dimoun deor ki ti pe esper en mwenza? Zis ozordi ki annan? Zot pran milyon epi zot konplent en *allowance* R18 mil?

Se sa en Lopoziyon responsab Mr Speaker? E pandan ki parti *US* pe fer politik bonmarse e rod lavantaz imedya, sa Gouvernman, atraver sa Bidze ki Minis in prezante, pe prepar nou pei e nou lavenir kot tou Seselwa a

benefisye, pa zis en bann ki pou byen pase.

E la permet mwan Mr Speaker, abord sa size *allowance* bann Minis ek bann o zofisye.

Mon pa pou koz lo saler ek *allowance Leader* Lopoziyon e sa ki pou mwan akoz mon'n fini koz lo la.

Me i trakas mwan ki parti *US* pa ankor konpran ki i annan en diferans ant travay ki Minis i fer ek travay ki en *public servant* ouswa en nenport lot travayer i fer.

Konpran mwan byen Mr Speaker, tou travay i nob, e tou travayer i bezwen en rekonpans apropiye, me sa bann msye ek sa bann madanm zot bezwen tenir en standar apropiye.

Lepok Mr René, e la mon rekonnet son lanniverser ozordi, lepok kot Mr René ti mars dan en safari *suit* ouswa en semiz larkansyel, e ki Minis ti met semiz kouler *Yoplait strawberry*, ouswa kot Manm Komite Santral ti ganny war dan en kitenge 'latet anba' in fini dan sa pei Mr Speaker.

Si ou pe al rod lasistans avek en Pei Zanmi e si ou le koz gal pou gal, parey Wavel Ramkalawan e son bann Minis i fer, ou bezwen lo standar.

E lo sa pwen, mon ti pou kontan Minis, e mon demann

ou, si dan ou repons ou ti eksplik avek sa pep, an gro, si tou Minis dan sa ladministrasyon in pran zot *allowance* e konpar sa avek sa ki sa ladministrasyon presedan, ki ti promet pou 'forgo' epi ki ti pas trankilman deryer ler lalimyer ti'n tennyen e pran zot lanvlop an misouk ti fer.

Ler ou zanmi i taye pou pran son 'forgo', silvouple, les palto sentonm trankil.

Politik *US* atraver bann ladministrasyon presedan, e ankor ozordi, ler ou ekout zot koze, sete depanse e partaze, fer dimoun depann lo Gouvernman. Demen, nou a get demen.

Nou fason, fason *LDS*, se konstrir en lekonomi rezilyan, e en pep responsab, pou ki demen kriz pa pou sekwe lakaz, akoz fondasyon i for, e son zabitan i konnen ki sa ki zot in gannyen, zot in gannyen par lasyer de zot fron.

Se sa Mr Speaker, ki sa Bidze 2022 pe prevwar e pe demande. Sa lannen pa'n fasil parey mon'n dir, me in en lannen ki'n teste kapasite en nouvo Gouvernman, e sa Gouvernman in pas son legzanmen avek tre, tre bon rezilta.

Sistenn vaksinasyon kont *COVID* in permet en reouvertir nou lekonomi. Performans in a alaoter, e menm *IMF* in satisfè. Dimoun i dan lanplwa.

Welfare nepli en destinasyon me en soutyen pou sa ki vilnerab, parey i devret. Lenvestiser pe retournen. Lenfrastriktir dan plizyer domenn, tel parey lapès, pe ganny konstri.

Tousala se bann siny pozitiv ki nou pei pe rebran. Minis in dir nou ki amwen ki nou ganny en lot sok ekstern, nou pou retourn lo nivo 2019 an 2023 e par milye sa deseni nou pou'n retrouv nou la kot nou ti ete avan *COVID*.

Me nou pa kapab kriy '*IP-PIP-IP*' ozordi. Pou nou ariv la kot nou anvi, nou pou bezwen plis pridans pou ankor enn ou de lannen.

La pa ler pou larg delo, aköz i nou bezwen ganny, aköz si nou fer sa i pou ganny koupe ankor.

Parey *PUC* pe fer, annou kontinyen pridan, annou anmas nou rezerv, dan en fason ki ler nou large, nou konnen ki nou kapab soutenir sa ki nou pe fer.

An parlan *PUC*, Mr Speaker, mon mazin sa trwazyennm defi ki Gouvernman *LDS* in erite. Sa se sanzman

klima e son konsekans pou nou pei.

Letan pa permet mwan ozordi pou koz bokou lo sa size, me permet mwan zis met lo rikord ki nou pei i apresye bokou bann deklarasyon for e san *equivoque* ki Prezidan Ramkalawan in fer otour konferans *COP-26* lo size responsabilite pou resofman later.

Mon regrete ki pa tou pei ki'n arive asim zot responsabilite e lo non nou Lasanble, mon demann avek Gouvernman met plis presyon lo bann gran pei pou ed sa ki pli vilnerab parey nou.

Nou pei i *still* annan problem ki retard nou devlopman. Minis in fer en lapel pou linite. E i annan rezon.

Enn nou pli gran lobstak ozordi se en Lopoziyon ki opoze e ki pa propoz solisyon. Parey mon ti dir semenn pase dan sa Lasanble, olye fer propozisyon pou amann en Lalwa ki zot pa kontan dan laform ki in ganny propoze, zot pa fer sa e zot zis opoze, konplent, e vot kont.

Leadership zot parti i fer parey. Zot konnen ki problem pei i annan e olye ede pou rezourd sa, zot prefere met retar sa Gouvernman.

Zot konnen ki zot prop Minis Finans lannen pase ti dir parey mon fek dir, e i ti annan rezon, ki 13enm mwan ti pou bezwen ganny revwar, me zot vin isi e zot koz 13enm mwan konmsi sa peyman i fasil a en moman kot nou *recovery* ekonomik i ankor dan en leta frazil.

Pandan ki Lopozisyon pe fer politik palto lo en *Allowance* R1500 par mwan, Mr Speaker, Minis Devika Vidot i vin enform nou lo *SBC* ki de milyon in disparet e konfli lentere pa manke anler Ile Soleil anba zot ladministrasyon.

Silvouple, annou azir konman dimoun responsab. Annou ekout Minis e zwenn ansanm, dan linite, pou redres nou pei. Ler nou pou'n met lord dan nou finans, la nou ava kapab retournen e fer politik ankor.

Politik iresponsab, par en Lopozisyon iresponsab pou neseserman retard nou progres. Par egzanp Mr Speaker, mon fek aprann ki i annan en gran lotel ki'n aret esey sipliy *travayer* pou travay *weekend* akoz lakantite *sick leave* ki travayer in anmennen zis Sanmdi ek Dimans.

Pou kontinyen deservi zot kliyan, zot in bezwen anploy en serten kantite travayer Lendi

ziska Vandredi, e en lot *shift* zis pou *weekend*. Ziska kan nou pou fer sa, Mr Speaker? Sa Gouvernman *LDS* in fer en lapel avek tou travayer Seselwa pou ede dan rekonstriksyon nou pei.

Bokou erezman in ekoute e zot pe fer zot par. E mon dir zot felisitasyon. Me mon demann avek lezot ki pa ankor realize ki sanzman in arive e fason fer i bezwen sanze, pou sekwe zot silvouple.

Mon demann sirtou avek Lopozisyon isi dan sa Lasanble e dan pei pou pa ankouraz bann tel pratik par zot politik bonmarse, me pou reponn sa lapel linite lanse par Minis Hassan e ede pou retourn nou pei lo larout progres e lo larout larises.

Mr Speaker, Minis in eksplik nou ki larout devan nou i annan ankor difisil. Pri lavi i reste tro o, malgre bann tantativ en *STC* restriktire pou fer desann pri plizyer komodite.

Nou ganny dir ki pri karbiran e pri *freight* pou fer ki nou pri komodite enporte pou reste o pou ankor en pe letan, e sa pou fer li difisil pou Gouvernman atak problemm pri lavi desito.

Sa i en gro defi ki pou nek kapab ganny rezourd ler bann lenfliyans ekstern i rezourd.

Mank larzan dan Bidze i fer ki bokou proze kapital pa pou war lizour an 2022.

37 lakaz o nivo nasyonal i en dezapwentman, malgre ki nou konpran rezon. E Les Mamelles nou pou bezwen pasyant ankor. Me lo en lot kote, nou annan bokou pou nou satisfè dan Bidze 2022.

En Bidze redresman i enn ki son lenpak pa ganny war imedyatman, me pli devan. Annou pa bliye, dan sa konteks, ki Gouvernman Prezidan Ramkalawan parey mon'n dir in ganny elekte pou 5an.

Aprè zis 1an, lo en nivo performans, tou sekter dan nou pei in montre en *improvement* Tourizm, natirelman avek reouvertir *Airport*, me osi Sekter Lapes e Lekonomi Ble, avek konstriksyon e lankadremans fasilite partou dan pei, prodiksyon lagrikiltir e sekirite alimanter an zeneral, Sekter Finansyel e *IT*, Lanplwa e lezot ankor.

En nouvo Gouvernman i amenn restriktirasyon. Fodre pa nou per restriktirasyon. Listwar i montre nou, ki si ou pa evolye ou disparet. Sanzman i toultan afekte dimoun e i pran letan pou dimoun adapte.

Me sanzman byen planifye i toultan pozitif e i anmenn gran

benefis. Pou nou sorti dan en sistenm depandans e antre dan enn kot sak sitwayen i ganny demande pou pran son responsabilite personnel, pa touzour fasil.

Bokou i reziste sa, me ler zot pou war benefis ki zot pe gannyen, zot regrete ki zot pa'n aksepte sa nouvo realite pli boner. Mr Speaker defi i la, defi pou toultan la.

Soley pa lev zis en fwa, i fer li tou le bomaten. La konminyon nou pa pran zis en fwa, nou bezwen renouvle li tou le Dimans.

Lavi i parey. Sak zour pou amenn son prop defi, sak zour pou amenn son botan. Si alor, sa lannen ki'n pase in anmenn traka ek lensertitid pou serten, in osi anmenn bokou lavantaz. Annefe, sa lannen 2021 i en lannen kot nou pei in fer bokou pli byen ki nou ti krwar sa menm letan lannen pase.

Se pou sa rezon ki atraver Bidze 2022, nou kapab konfyant ki lannen prosenn pou amenn ankor plis benefis pou nou pei e pou sakenn son sitwayen. Minis in tras en larout ver progre dan son *speech* Bidze.

Minis in fran dan son parol. La kot nou ete, i pa le moman pou zwe fer krwar pou pas konman bon boug. Si Fon Pansyon i nepli soutenab avek

laz retret aktyel e kontribisyon ki travayer pe fer, i pou bezwen ganny revwar.

Nou napa swa. Pli vit ki nou aras en plaster lo en boubou, pli fasil i ete. I fermal en kou, e apre i aret fermal. Si ou esey tir li par pti morso, son fermal i pli long e douler i pli gro.

Me pou sak dezapwentman parey lakaz ki pa pou ganny konstri, ek sistenm pansyon ki pou ganny revwar, e l3enm mwan ki pa pou ganny peye sa lannen, i annan lezot lagrenn ki pe ganny senmen ki pou raport bokou plis benefis a mwayen term.

Anliny avek bann promes dan manifesto ki mon ti mansyonnen o komansman mon repons, Minis in devwal en seri mezir ki pou ganny pran dan sa lannen ki pe vini pou anmenn benefis pou tou Seselwa.

Avek nouvo kou lavi ek revizyon dan pansyon, pou annan en restriktirasyon dan servis piblik, ki pou bezwen vin *performance based*. Pou annan en revizyon saler.

Pou bann biznes grandi, *rate tax* in ganny revwar. Pou bann lenvestiser Seselwa e etranze, fason fer biznes pou amelyore.

STC pou kontinyen fer bese pri komodite. Lagrikiltir pou pran en pli gran lanpler avek plis prodiksyon lokal pou asir sekirite alimanter e redwir lenportasyon. Nou ava remarke Mr Speaker ki sa bann nouvo striktir dan Bidze i pa zis en kestyon donn larzan.

Sa se fason fer Gouvernman oparavan e se sa ki'n met retar dan performans tou sekter dan nou pei. Nouvo fason fer i baze lo donn loportinite e met lankadremman an plas, pou ki sak sitwayen i ava kapab debrouye dan en striktir ki permet zot *be what you want to be*. E sak travayer Gouvernman ava fer son travay parey i ti pou fer pou son prop biznes.

Se sa, sa nouvo sistenm ki Sesel in antre ladan, e se sa sistenm ki pou amenn Sesel ver en lavenir briyan. Filozofi politik sa nouvo ladministrasyon, Mr Speaker, ki rezonnen dan tou laspe sa Bidze se sa enn.

Et fran lo sityasyon pei, pa fer promes vid, reorganiz Gouvernman pou rezilta *optimum*, travay dir e pran desizyon difisil dan lentere pei. Sa Bidze 2022 i senm lagrenn pou lagrandisman fitir, pou lepanouisman nou pep, pou byennet nou Nasyon.

Sa Bidze i tir nou dan ban move pratik lepase, i met fondasyon pou nou demen e i diriz nou ver en lavenir briyan dan en sosyete rezilyan avek en pep responsab.

Pour son vizyon, son fransiz, son travay dir e son leksplikasyon kler, mon remersye Minis Hassan pou en Bidze ki donn nou pep lespwar ki ozordi i pli bon ki yer, me ki demen pou ankor pli bon ki ozordi.

Mon asir li ki kote Gouvernman nou pou siport son Bidze, e ki ansanm avek Legzekitiv, nou Lasanble dan son mazorite, pou fer ki sa plan aksyon ki *LDS* ti promet Seselwa dan son manifesto, e ki Minis in rebran dan proze Bidze 2022 pou realize, pou sov nou pei e pou lepanouisman tou son zanf. Mersi Mr Speaker.

(APPLAUSE)

MR SPEAKER

Mersi *Leader* Biznes Gouvernman. Nou a pran *pause* la e nou a rebran travay pou kontinyen deba lo bidze, nou a rezwenn 11er.

(BREAK)

MR SPEAKER

Nou pou rebran deba. Mon apel Onorab Jany Letourdie.

HON JANY LETOURDIE

Mersi Mr Speaker. Bonzour tou dimoun a lekout. Mr Speaker, ti annan en zonm ki ti apel *Mathieu* e son metye li i ti anmas bann larzan *tax*. Apre ki i ti'n vin en disip *Zezi Christ*, i ti ekrir se si ki person pa kapab deservi 2 met an menm tan.

I ti ekrir ki swa ou pou ay enn e kontan lot plis, oubyen ou pou donn latansyon enn e neglig lot. E la Mr Speaker i ti pe fer referans avek Bondye e larzan.

Me Mr Speaker, me tou lasazes i sorti kot Bondye li menm. E alors Bondye i konpran li parfetman ki nou bezwen larzan dan sa lavi pou nou kapab fer nou bann neser.

Alors, ki i fer prezan, i beni bann ki annan lentelizans e kapasite pou zer larzan, e sa benediksyon la i double li, letan ou reisir zer sa ki ou annan dan en fason byen, letan ou rann kont.

E sa i osi reasir sa bann ki'n donn ou son larzan pou zere ki i kapab fer ou konfyans e i kapab kont lo ou Mr Speaker.

Si ou kapab kont lo en dimoun akoz i pou fer byen avek en pti gin larzan, ou pou osi kapab kont lo li pou fer byen letan i annan bokou larzan. E nenport ki, ki ou pa kapab kont lo li pou fer byen avek en pti gin larzan, Mr Speaker, ou pou osi pa kapab kont lo li pou fer byen letan i annan en gran kantite larzan.

Alors si ou'n mal zer larises ou pei Mr Speaker, son karma se ki sa pep i pa donn ou ankor responsabilite pou zer son larzan, akoz ou'n met li retar e ou'n dezonnnet avek li. Sonm nimerò 1, verse 3 i dir ki en dimoun ki annan bon lentansyon i parey en pye dibwa ki'n ganny plante o bor delo e i aport bann bon fri an gran kantite e son bann fey pa fletri an bonnavini.

E sa dimoun tou sa ki i fer i prospere. Mr Speaker, ozordi set avek bokou imilite, refleksyon e gidans mon lanz gardyen, ki mon pe adres Lasanble, osi ki mon bann ser ek frer Seselwa lo mon pwennvi an relasyon avek Bidze pour 2022.

Ozordi i Mardi le 16 Novanm 2021, dan Setyenm Lasanble Nasyonal Sesel, i a fer dezyenm Bidze anyel ki nou bann Manm Lasanble ava pe rann repons, en Bidze ki ti'n

ganny prezante Vandredi pase par en zenn Minis Finans sorti dan ladministrasyon nouvo Gouvernman ki ti vin o pouwar le 24 Oktob 2020, apre en lalit sanses.

Mr Speaker, mon santiman e pwennvi pour sa Bidze i varye akoz mon'n sitye mwan e pret en zorey pou ekout tou sa ki ti anvi en dyalog, tou sa ki ti annan en pwennvi. Bann ki ti annan konsern oubyen konplent e ki ti anvi ganny mon zorey pou ekout zot.

Letan mon mazin sa lalit ek tou sa larout ki ti telman long avan laviktwar ekstraordiner Mr Speaker, ou a krwar mon oule pik en lakoler avek Senyer e dir li akoz ou'n permet tou sa letan pase, kot sanzman Gouvernman ti'n kapab ariv pli avan e nou pei ek nou dimoun ti an komans rezouir sa prosperite byen avan?

Akoz ou'n swazir 2020 pou sanzman Gouvernman arive? En letan kot *le monde* pe fer fas ek en kriz ekonomik. En moman kot nou gannypen nimerò 1 ki apel Lendistri Tourizm pe ganny menase?

En moman kot Sesel koman en Pti Leta Zil pe ganny sakrifye akoz lenpak pandemik *COVID-19*? En moman kot nou pa pou vreman kapab anmenn

nou pep ver sa later promiz ki nou ti'n promet zot Mr Speaker. Akoz?

Akoz? E akoz? Enn ler mon dir ar, eskize, pa ou Senyer ki'n fer sa, me letan ki dir ki pou fer e kan pou fer. Be letan, be letan Senyer menm ki ou kontrole.

Mr Speaker parfwa i annan i tant pou dir "enr, enr, sa pa pir, apre tou sa lalit ki nou'n fer, aprezan nou pa ni menm kapab ariv lo podyonm pou nou pran nou lakoup?"

Mr Speaker i pir li, akoz ler ou en solda elit dan Larme Senyer napa naryen ki vin fasil pour ou, e i konnen ki poudir ou bon ou, ou annan tanperaman ek kapasite pou tenir ou prop lanmans pwalon aprezan, e ou a large letan i a dir ou ki ler i an ler pou ou large.

Mr Speaker mon annan mon prop fason eksplike ki manyer mon trouv sa Bidze. Mon pa kapab servi bann gran terminoloji parey enn ki doue dan sa domenn.

E tou fason nou Minis Finans laba devan in fer sa ekstrememan parfe pou bann ki alez avek sa bann terminoloji. E mon pa pou al ganny bate avek sa bann keksoz ki mon pa ofe avek.

Me mon'n ekoute, mon'n obzerve, mon'n esey reste azour

avek bann fe e realite. E sa mon ti pe fer li Mr Speaker depi 2019 letan ki mon ti ankor dan Sizyenm Lasanble. Pandan bann letan Bidze an Desanm Minis Finans ti'n deza pe komans donn nou en lendikasyon ki nou ti pou bezwen kit nou gard anler, akoz COVID ti'n fini fer son lenpak e a sa bann letan.

Madanm Gouverner Labank in koze, SS Payet in koze, plizyer *forum, meeting, konversasyon, konferans* lapres, tou sa ki ti'n kapab e merit ganny fer pou nou kapab, ti'n ganny fer. E sa i ti vin koman en *warning* parey letan i annan *warning* move tan i dir ou klas 1, klas 2, e klas 3 eksetera.

Me le pwen i reste Mr Speaker, eski nou ti tande? Oubyen nou'n tande me nou pa'n ekoute?

Nou konnen ki poudir pandan sa peryod letan ti annan en kantite Kankan larzan Mr Speaker, lekel ki pa ti ankor gannyen, lekel ki fodre gannyen e pa'n gannyen.

Sa ki'n gannyen pa ti bezwen, sa ki'n ganny plis e ki'n merite. Kanpanny eleksyon osi i ti o bor laport li osi, e larzan Mr Speaker, in ganny distribye nenport ki fason. Eski ti neser petet pou anmenn 2

eleksyon an menm tan a sa moman?

Eski ti nesese pou met presyon an plis lo Minister Finans ek Labank Santral pandan letan ki zot ti pe esey zer nou larzan, e fer nou konpran pou konvenk nou pou nou depans zis lo sa ki enportan?

Mon konnen ki poudir i annan plizyer lezot legzanp labi oubyen depans inital, ki nou ti'n kapab evite si ti annan plis konsiltasyon, si ti napa labi pouwar e si ti napa en latitud lesefer Mr Speaker.

Me sa prezan i bezwen vin langzman ki sa ladministrasyon LDS avek Prezidan Wavel John Charles Ramkalawan, i bezwen a tou pri fer sir ki sa bann move pratik i disparet dan nou sosyete.

Mr Speaker, mwan mon annan zanfan, mon annan fanmir e zanmi pros ki travay dan Gouvernman e osi dan prive.

Eski zot krwar mon pa ti a kontan zot ganny en pti larzan Zanvye letan pos ek pers doublir in vir anler e nou, nou dir sa Zanvye i long, in pli long. (Zanvye pa pli long li, Zanvye i touzour reste 31 zour)

Zot krwar poudir mon pa ti a kontan? Me ozordi mon war mwan mon'n lev mon lanmen

anler Mr Speaker, non pa pou vote pou pa ganny ankor 13enm mwan saler. Akoz sete mon parti ki ti siporte e ki ti pouse pou nou ganny 13enm mwan saler.

Me mon'n lev lanmen Mr Speaker, pou dir wi mon dakor ek Minis Finans ek son bann teknisyen forse aprann fer *gymnastic*, pour ki i a pran pli pti gin letan pou kapab reganny sa bann benefis en pe pli tar.

Mon'n lev lanmen pou sispann, pa pou kennsel, Mr Speaker si i pou baze lo ou performans sa i ava en lot deba pour en lot moman.

Me mwan sa ki mon pou dir tou dimoun, tou dimoun donn performans 100poursan, koumsa personn pa ava ganny kit ater.

Mr Speaker, letan Minis Finans ti deklare ki 2021 i reste enn bann peryod pli difisil dan listwar nou pei, letan i kontinyelman dir ki priyorite Gouvernman an 2021, se pou stabiliz sityasyon ekonomik e finansyel pei.

Mr Speaker, letan Minis ti deklar nou sityasyon koman grav e kritik e ki travay i enorm lo son bann teknisyen, pou fer sir nou kapab omwen ganny en saler lafen dimwan, latizann i kontinyen ganny peye pou lasante nou pep.

Manze i kontinyen antre lo nou Por ek nou *Airport*. Nou zanfan i kapab kontinyen zot letid, e osi fer sir bann lezot servis piblik debaz ki tre enportan dan deroulman nou lavi toulezour, i kontinyen fonksyonnen.

Mwan mon pa krwar ki i a pe koz manti Mr Speaker. Minis mon pa krwar ou pe koz manti. Mon pa konn en pei ki pa ti pou kontan gard son loner avek son laprid, pou li al demann prete larzan si i pa ti bezwen.

E in deza ariv nou sa avan, zis an ka nou'n bliye deor, mon ava *remind* bann dimoun.

Mr Speaker, parfwa, ou konnen i en pe difisil pou satisfere tou ou bann sitwayen avek lesplikasyon, menm si aprezan ou pe vin avek tout fransiz. Akoz?

Akoz pour bokou lannen ladres Bidze ti penn bann portre tou byen, ek lekonomi an roz, ti annan gran promes tre anbisye e sa ti gard dimoun dan lespwar pou kontinyen espere, me sa ler la zot ti pe esper 'godo.'

Ozordi Mr Speaker, fransiz i lakle e de tout fason i ti devret koumsa, si i annan ou dir i annan, ler ou dan mal ou napa, nou bezwen dir napa.

Nou bezwen fer sitwayen konpran ki vre sityasyon finansyel son pei Mr Speaker, nou sityasyon ekonomik. Nou bann *loan* ek bann det ki i annan pou peye, konbyen larzan i reste pou fini peye, eski nou pou kontinyen pran *loan*?

Lekel ki'n donn nou kado larzan? Konbyen larzan i reste nou? Lekel ki responsab pou zer nou bann larzan? Kote larzan pou pey ou, pou pey mwan e pou pey zot laba deor Mr Speaker i sorti?

E si nou pa kapab re pey nou bann det, ki nou pou fer? Se sa bann portre ki nou devret pe penn Mr Speaker, avek 3, pou mwan, 3 lakre kouler.

E sa enn premye i ava apel kouler 'Latransparans', lot i ava apel kouler 'Rann kont', e mwan mon trwazyenm mon apel li kouler 'Laverite'. Annou pa fer nou sitwayen krwar i annan ler napa e estig zot pou revolte.

Tandis ki Mr Speaker, ler ti annan nou ti ganny dir napa, oubyen nou ti ganny dir ou a ganny en pti gin kanmenm napa bokou.

Me apre ki'n arive? Laverite in sorti ki poudir bokou bal in ganny donner, bann ki pa'n ganny sa sans, ki pa'n ganny sa pti gin sans, sa ki zot in merite, ki zot in al dekouver?

Zot in al dekouver ki kantmenm dan sa pti granm ki zot ti'n gannyen zot in ganny ronze. Mon anvi ki Seselwa pa zanmen oubliye tousala Mr Speaker. Mon anvi ki tou Seselwa i pa per pou zot rode, pou zot demande, pou zot rod klarifikasyon.

E mon anvi ki zot pa les okenn Gouvernman ki sa enn ki la oubyen sa enn ki pe vini, fer zot krwar poudir lizour li menm li aswar.

Si zot santi ki keksoz pa kler, kontinyen rod lesplikasyon, kontinyen debat e persevere pou vwar en laklerte e rod zot rezon. Me selman, mon bann ser e frer, mon anvi dir zot, konpran byen la diferans ant laverite ek manrmoun.

Mon bann ser ek frer ki fristre oubyen ki annan lakoler, sa osi se en santiman, e i normal pou zot eksprim zot nenport fason ki zot anvi. Premyerman mon anvi dir zot ki mon konpran zot *full* kilo e mon pa ankoler aköz zot ankoler.

Sakenn i annan son rezon, aköz Mr Speaker? Me tousala nou konpran poudir i deroul toultour sityasyon finansyel. Par egzanz pou sa dimoun li ki ti'n prevwar en benefis finansyel dan son

lanplwa, me ki aprezan pa posib pou li gannyen pour le moman.

Apré i annan sa enn li ki i pa ti pe ekspekte nanryen. Me selman i ti'n prepar li avek son mwayen ki i annan. E en sel kou i war son Bidze ganny bouskile e bonbarde avek bann logmantasyon dan komodite ek servis.

Mr Speaker, i annan en lot group ankor li, ki pli pir ankor se sa bann li ki ti'n perdi lanplwa e li i napa en saler e alors nou kapab konpran ki son leta lespri ozordi.

Ou vwar Mr Speaker, i annan plizyer lezot legzanp ankor ki montre aköz ki en dimoun i kapab fristre e alors i pa vwar li dan sa Bidze aköz petet i santi petet in ganny kit an deor.

Minis mon konnen ki ou en zenn *homme* tre atantif, tre talante e entelizan. E mon konnen ki ou pe swiv byen sa ki pe pase, alors mon swet ou bokou kouraz avek ou zenn lekip pou kapab anmenn soulazman tanporer, pou bann ki dan bezwen imedyat, an menm tan ki zot pe prepar lo en plan konpreansiv ki pou re anmenn prosperite e redistribisyon larises dan nou pei Sesel.

Mr Speaker Linyon Demokratik Seselwa i pa anvi

reste o pouvwar 43an, akoz i pa krwar ladan. Sa ki i anvi se travay pour en nouvo Sesel avek en lekonomi pli meyer ki i ti vin zwenn.

Ser ek frer Seselwa ozordi Linyon Demokratik Seselwa i selebre 387 zour o pouvwar. Tou laglwar pou Bondye ki'n permet sa arive. E zis pou azout en pti keksoz lo la.

Taler Onorab *LOTO* ti dir i tre fyer, mon osi parey, mon tre fyer mon parti. E si, nou pa ti anvi anras nanryen avek zot. Me zis en sel keksoz ki nou ti anvi, se pouvwar.

E alors nou'n aras zot sa pouvwar, pou fer sir ki nou kapab fer en pe pli byen ki zot. Pou konklir Mr Speaker, mon retourn dan Levanzil, *Luke 14*, sapit 28-30 *Zezi Christ* ti dir, "sipoze enn antre nou la i deside ki i anvi konstrir en batiman letaz, eski i pa pou asize pou fer en estimasyon son Bidze, pou vwar si i pou annan ase finansman pou li kapab fini son proze?

Akoz si ler ou'n fini fer fondasyon apre ou napa ankor larzan, dimoun pou ridikiliz ou, dimoun pou mal *parle* ou, pou koz ou e pou dir, ou pa ti vwar ki ou ti pe fer? Poz sa la Mr Speaker.

Mr Speaker mon pran mon responsabilite ozordi, e

mon donn mon sipor an faver sa *Appropriation Bill*, R10bilyon, 91milyon, 651mil, 145, pou otoriz depans dan *Consolidated Fund* pour lannen 2022, pour permet ki nou pei Sesel kapab fonksyonnen avek gran lespwar ki tou keksoz pou aranze Mr Speaker anba direksyon nou zenn Minis avek son nouvo lekip, avek konsey ki i ava pe donn nou nouvo Gouvernman. Mersi Mr Speaker.

(APPLAUSE)

MR SPEAKER

Mersi Onorab. Mon ava apel Onorab George Romain.

HON GEORGE ROMAIN

Mersi Mr Speaker. Bonzour Mr Speaker. Bonzour Minis Finans. Bonzour tou bann koleg Onorab. Bonzour tou bann dimoun ki a lekout, e en bonzour spesyal pou tou mon bann zabitan Anse Etoile.

Mr Speaker, Vandredi le 12 Novanm, Minis Finans in vin devan nou Lasanble pou prezant nou avek en Bidze lavalier R10.09bilyon pou lannen 2022.

Mr Speaker, premyerman mon ti a kontan remersye Minis e son tim pou zefor ki zot in mete dan preparasyon pou sa Bidze.

Sa Bidze ki devan nou i enn ki donn nou lespwar, aköz i enn, ki lo sa semen pou kontinyen redres nou lekonomi apre ki nou'n pas dan sa kriz *COVID-19*. En kriz ki pa ankor kit nou, menm si nou'n kapab met li anba serten kontrol.

Mr Speaker, nou sorti tre lwen konpare kot pei ti ete lannen pase. Nou tou nou konnen ki ladministrasyon *LDS* ti pran pei dan en letan vreman difisil.

An plis nou konnen, ki ansyen ladministrasyon *US* ki ti la, ti pe depanse dan en fason iresponsab, ki'n zwe en rol pou nou antre dan sa defisit ki nou pei i vwar li ladan ozordi.

Mr Speaker, parey Minis Hassan in fer resorti, nou ti dan en sityasyon vreman trakasan.

Nou depans ti vreman bokou, plis ki nou reveni e sa i montre nou ki sa ladministrasyon avan, pa ti pe mazin pli lwen dan zot bann depans ki zot ti pe fer, me plito ti pe tap tou pou esey ganny sa eleksyon ki ti devan zot.

Mr Speaker, Lannen 2021 i enn ki pli difisil ki nou pei in deza pas atraver, me Sesel in sanse ki'n kapab ganny en nouvo ladministrasyon dan sa moman, en ladministrasyon *LDS* ki'n reakte ase vit pou fer desizyon ki par ler, pa tou

dimoun ki'n apresye, me par kont i ti bann desizyon ki ti neserer pou redres lekonomi pei.

Nou Gouvernman ti bezwen revwar enn de son bann program, met bann nouvo mezir an plas e rod fason pou koup depans ki pa ti vreman esansyel dan sa moman kritik.

Mr Speaker, ozordi nou bezwen felisit sa lekip *LDS* ki'n kapab fer fas avek sa gro defi, pou redres nou lekonomi dan sa pti moman letan ki nou'n pran pei.

Nou'n vwar bann depans enorm ki nou Prezidan ek son tim, in bezwen entervenir e koupe. E la mon pou sit enn de legzanp Mr Speaker.

Premye R400 mil par mwan ki ti pe ganny peye koman *rent* pou batiman *Arc Royale* pou donn servis lasante pou rezyon Sid. Dezyenman, de, R2milyon ki ti pe ganny peye pou bann latant ki ti pe ganny lwe pa mwan, pou Minister Lasante.

Trwa, R4.4 milyon par mwan ki ti pe ganny peye pou lotel Berjaya ki ti sant karantenn. Tandis ki Gouvernman *LDS* ti'n nobou negosye Lotel Avani pou sa menm koz san bezwen pey okenn *rent*.

Kat, R46 milyon *savings* ki Prezidan in kapab negosye pandan son visit *Abu Dhabi* avek Prezidan *AMSA Renal Care* pou en rediksyon, sorti \$250 par pasyan pou vin \$175.

Senk, R125milyon 10 rediksyon dan *rent* pou *accommodation* pou bann *expatriates*.

Sis, R187 milyon dan *rent* pou lofis Gouvernman.

Set, en rediksyon R195 milyon dan Servis Sekirite pou Gouvernman.

Mr Speaker, sa en ta larzan ki ti pe ganny gaspiye e sa i montre nou ki mannyer sa ladministrasyon avan ti pe travay.

Mr Speaker, parey Minis Hassan in osi fer remarke, menm si nou ti annan en defisit bidzeter an 2021, nou Gouvernman avek en lespri pou refer nou lekonomi, in kapab fer en *savings* R1.4 bilyon pandan 2021, en travay vremen remarkab Mr Speaker.

Mon kontan pou vwar ki Bidze ki pe ganny propoze pou lannen 2022, pe prevwar en defisit fiskal R222milyon, ki vremen pli ba ki ti ganny prozekte pou lannen 2021.

Sa i ava fer li pli fasil pou nou pei *attend* zot bann lobzektif e a donn nou lespas

pou nou kapab fer en sirplis bidzeter an 2023.

Mr Speaker, enn bann keksoz ki remarkab dan sa Bidze menm si nou lekonomi pa ankor rebran 100 pousan, se ki nou pe vwar lespas pou anploy travayer.

Minis in dir nou ki i annan 733 pos ki dan bann Minister, departman ek Lazans ki pe ofer lanplwa pou dimoun ki pe rod en travay dan lannen 2022.

Dan menm laliny, Gouvernman in fer provision pou R5 milyon pou program *Skills Development e My First Job*. Lalis *vacancies* i pibliye regilyerman e Minis Lanplwa ti'n deza fer resorti ki annan bokou plis louvraz ki disponib konpare avek kantite dimoun ki pe rod en lanplwa.

Mr Speaker, alors mon war li difisil pou konpran akoz ki i annan en group dimoun ki ankor pe kontinyen dir ki zot lafen e ki zot napa travay.

Mr Speaker, mon konpran ki bokou nou bann zenn in tonm dan sa fleo drog e sa ozordi pe kontribye pou zot napa en lanplwa formel oubyen en travay an plen tan.

Drog in anvair nou kominote e afekte bokou fanmir ozordi e nou kapab dir, ki ansyen Gouvernman pa'n fer ase pou konbat e elimin sa fleo

ki apel drog. Ozordi nou vwar en lager ki sa ladministrasyon LDS pe anmennen, ki enn ki serye e pe port bokou rezilta pozitiv.

Mr Speaker, si nou ti pran sa bann kalite mezir depi byen lontan, ozordi nou ti pou annan bokou plis lafors travayer Seselwa ki ti pou'n fer bokou plis kontribisyon dan nou lekonomi. Soufrans ti pou mwens, Mr Speaker.

La mon ti a kontan felisit sa tim *Coast Guard* ek *Air Force* ki pe fer sirveyans lo nou lanmer e pe idantifye sa bann aksyon ilegal pou anpes sa drog antre dan nou pei.

E la mon kontan mon'n vwar lo televizyon ki menm *Leader* parti *US* inn felisit nou Gouvernman pou sa bon travay ki nou pe fer pou anmenn sa lalit kont drog.

Mr Speaker, nou ladministrasyon pa pe zis vin koze, me pli enportan aksyon pe ganny pran. Mr Speaker, en lot keksoz pozitiv ki nou vwar dan sa Bidze se ki, Gouvernman pe travay lo en nouvo striktir saler pou sekter piblik ki pou pran lefe komansman lannen 2023.

E menm keksoz ki pou tonm dan sa lankadremman ki pou aplik pou tou travayer Gouvernman, se ki bann *fixed*

allowance pou ganny enkli dan saler de baz.

Mr Speaker, sa i en benefis ki dan lavantaz bann travayer aköz avek en saler de baz pli o, i ava ed zot pou ganny akse avek *loan* pli byen e osi a kontribye pou elev zot bann *dues* tel ki konpansasyon, gratwite e osi okenn lezot benefis ki atase avek saler de baz.

Mr Speaker, sa Bidze in prevwar R1.53 bilyon ki pou ganny depanse pou program lenvestisman kapital. Sa i reprezant 15 poursan Bidze total.

E la mon tre ankouraze aköz parey ti'n ganny aprouve dan nou Lasanble, sa nouvo Lazans Lenfrastriktir ava kapab donn tou son zefor pou asire ki larzan ki ganny bidzete, a ganny byen depanse, e prosedir proze ki ganny planifye pou Gouvernman a ganny byen swiv.

Mr Speaker, sa i en aksyon ki'n ganny pran pou retir labi e move zesyon larzan dan Bidze Gouvernman, e pe montre nou ki Gouvernman i serye dan son latas anver koripsyon e osi asire ki Gouvernman i ganny louvraz de kalite e valer pou son larzan.

Mr Speaker, menm si mon'n vwar ki Gouvernman pe

planifye konstriksyon lakaz pou 2022, mon pa'n vwar proze lakaz ki pou 24 younit lakaz dan La Gogue, ki ti pe ganny planifye pou distrik Anse Etoile.

Dan sa menm laliny, nou ti'n deza annan plan pou en gro proze lakaz lo Ile Aurore e ankor mon pa'n vwar okenn mansyon lo la dan sa Bidze.

Mr Speaker, dernyen lalis aplikasyon lakaz ki mon annan i demontre ki nou annan 279 aplikan ki lo lalis ki pe rod lakaz dan Anse Etoile e ladan i annan 56 poursan ki aktivman pe pey son kontribisyon tou le mwan.

Sa petet ti ava en pwen pou Minis klarifye an vi ki sa bann proze ti pou ede soulaz demann lakaz dan nou pei, prenon kont ki Anse Etoile i parmi enn bann pli gran distrik.

Mr Speaker, enn bann proze ki nou distrik Anse Etoile i santi koman en priyorite se nou stasyon Lapolis ki konmela pe ganny zere dan ladministrasyon distrik.

E la ankor, mon pa'n vwar okenn provizyon pou li. Mon espere ki petet sa ava kapab ganny materyalize an 2023.

Mr Speaker, me mon kontan pou vwar ki Minister Gouvernman Lokal e zafer kominoter pe ganny en alokasyon R20milyon pou bann pti proze kominoter, en sonm

ki'n preski double konpare avek 2021.

Sa i ava ede pou bann distrik kapab benefisye avek plis bann pti proze ki tous nou bann zabitan direkteman.

Mr Speaker, dan distrik Anse Etoile par egzanp, sa alokasyon R200mil an 2021, in fini ganny servi o nivo distrik pou fer e amelyor sirfas semen, drenaz, met *crash barrier*, azout *street lights*, met *railings*, tou sa ansanm avek *SLTA*.

Byensir i pa'n ase pou nou kapab fer tou sa ki distrik ti'n anvi fer. Avek sa Bidze ki devan nou, nou pe definitivman vwar plis siport o nivo distrik ki a kapab pli byen deservi nou bann zabitan.

Mr Speaker, la mon le profite pou remersye *SLTA* pou sa relasyon pros ki zot annan avek nou distrik e zot travay dir ki zot in fer e lo la par zabitan Anse Etoile, nou dir zot mersi e nou espere ki sa i a kontinyen.

Mr Speaker, o nivo nasyonal, nou vwar lanfaz e lenportans ki sa ladministrasyon *LDS* pe mete pou bann diferan lenfrastruktir. E Sekter Transpor i pe ganny li en alokasyon R179milyon.

Bann proze ki'n ganny prevwar pou 2022 anba sa alokasyon i vremen enportan, akoz i pou rezourd bann

konsesyon trafik ki nou fer fas avek toulezour.

I pou ede deblok trafik lo bann semen ki pe ganny agrandi parey Boie de Rose e Pointe Larue. De lot kote, proze pou re sirfas semen e repar drenaz i enn bann bezwen ki motoris i demann plis.

E nou espere ki avek sa alokasyon R49.5milyon, bann diferan proze ava kapab materyalize. Mr Speaker, Departman ki pe ganny plis alokasyon anba sa Bidze se Lazans Proteksyon Sosyal ki pe ganny li R1.44bilyon.

E sa menm si Lopozisyon pe esey fer nou dimoun krwar, ki sa Gouvernman pa pe okip bann ki pli vilnerab dan la sosyete.

Mr Speaker, nou Gouvernman i enn ki pe ankouraz nou pep pou kontribye anver devlopman nou pei. Ozordi i annan en kantite lanplwa ki disponib dan pei, e alor mon fer en lapel avek bann ki napa en lanplwa ozordi, e ki kapab travay pou sanz zot fason panse e leve al rod en travay.

Koumsa zot ava dan en pli bon pozisyon pou donn lanmen pou sonny zot fanmir. Mr Speaker, nou Gouvernman i enn ki pe touzour ankouraz Sekter Prive e siport bann ki annan sa lespri lantreprenarya.

Minis in refer sorti dan sa Lasanble ki Gouvernman ansanm avek Labank Santral, pou kontinyen siport bann pti biznes e bann mwayen antrepriz, pour ki zot kapab ganny akse avek bann *loan* ki annan en to lentere ki tre ba.

Nou'n note ki sa *tax* adisyonnal ki ti ganny mete pou lavant transpor lo later ki ti 25 poursan, pou ganny retire apartir lannen prosen. Sa i ava en soulazman pou bann ki dan sa biznes e ava ede pou ogmant zot lavant apre en lannen ki pa'n fasil pou zot.

Mr Speaker, petet en lot keksoz ki Gouvernman i merit konsidere se alokasyon bann later pou bann pti biznes kapab fer zot bann aktivite, ki pou le moman pe ganny fer dan kominote ki pa ideal.

Menm dan Anse Etoile, nou annan bokou demann e mon krwar i enportan ki Gouvernman i siport zot dan zot demars pou devlop zot biznes. Mr Speaker, enn bann keksoz remarkab ki nou Gouvernman in fer ki'n ede pou konmans redres nou lekonomi sete louvertir nou *Airport* an Mars 2021.

E sa Mr Speaker, in ede pou remet loksizenn dan nou lekonomi. Depi ler pei in reouver lafen Mars, bann *airline*

in retournen e sa i enkli enn de nouvo.

Mr Speaker, nou kontan pou vwar ki *Air France* in retourn Sesel dan mwan Oktob, e sa ava ede pou konekte Sesel pli byen avek son marse prensipal.

Nou kantite touris ki'n antre Sesel ziska komansman Novanm in ariv en pti pe plis ki 140 mil e sa i 39 poursan par lao 2020 pou sa menm peryod letan.

Mr Speaker, ou kapab zis mazine si nou pa ti'n fer sa desizyon pou reouver nou *Airport*, ki bor nou ti pou ete ozordi?

E la Mr Speaker, mon le felisit Minis Radegonde ek son tim pou sa bon travay ki zot pe fer pou ed nou lekonomi refer. Kontinyen ek sa bon travay Minis.

Dan sa menm laliny Mr Speaker, mon vremen apresye lanfaz ki nou Gouvernman pe mete pou ki Sekter Touris i annan plis sinerzi avek Lagrikiltir, akoz sa pou ede pou met plis prodwi lokal dan bann letablisman touristik, e osi ede pou kre plis loportinite lanplwa dan Sekter Lagrikiltir.

Ki an retour ava atir bokou resours imen ki manke dan sa sekter ozordi. Sa R123 milyon ki Gouvernman pe donn

Sekter Lagrikiltir ava zwe en rol tre enportan pou sa sekter.

Mr Speaker, ozordi dan Anse Etoile, nou annan bokou dimoun ki pe montre sa lentere pou rod later lagrikiltir pou devlope, e nou merit asiste e ankouraz sa bann endividi avek en tel lobzektif.

Dan menm laliny, o nivo lapes, nou konnen ki sa lannen an Avril, La Retraite ti ganny son bazar pou son bann peser. Ozordi sa fasilite pe mars byen e pe byen ganny servi par nou kominote peser. Dimoun i sorti tre lwen pou vin aste pwason dan La Retraite.

Mr Speaker, nou pe osi regard devlopman kot sa bazar pou osi enkli bann fermye e lezot pti biznes ki pou kapab deservi sa landrwa.

Me par kont, nou kominote peser pli ba kot bazar Anse Etoile i devret osi ganny siporte. E la mon ti a kontan ki *SFA* ti a priyoritiz sa bazar, akoz i enn ki deservi bokou dimoun, me malgre sa, in ganny abimen e en renovasyon irzan i neserer.

Mr Speaker, en lot keksoz ki mon kontan pou vwar lanfaz lo la dan sa Bidze, se zefor pou redwir kou *internet* dan nou pei.

Sa i en problem pou tou dimoun akoz *internet* i en *platform* pou nou kominike, pou

nou fer biznes, pou nou siport laprantisaz e i en *platform* ki fer en kantite keksoz vin pli efikas.

Me Mr Speaker, enn bann pli gro defi ki nou pei pe fer fas avek se ki sa pri ki nou ganny sarze pou servi *data* i tre o.

La mon tre ankouraze ki zefor pe al ganny mete pou annan kolaborasyon avek Labank Santral, pou fer en letid lo afordabilite *internet* e osi negosyasyon ki pou ganny antreprann ant *FTC* ek lakonpanyen ki pe donn servis kab soumaren, pou revwar pri avek en bi pou redwir sa kou ki tre o ozordi.

Mr Speaker, an gro, pou nou vwar vre lefikasite sa Bidze ki devan nou, i enportan pou nou annan disiplin dan son lenplimantasyon.

Sa Bidze ki Gouvernman pe donn bann Minister, Departman ek Lazans i merit ganny byen zere e i pa devret annan lespas pou okenn koripsyon.

Malerezman nou'n vwar dan bokou lenstans dan le pase, atraver bann rapor Oditer Zeneral kot in annan move pratik dan lafason ki larzan in ganny depanse, oubyen menm kolekte.

Mr Speaker, rapor Oditer Zeneral pou 2020 ki'n fek

pibliye sa mwan i annan bokou legzanp kot sa bann move pratik in ganny soulinyen.

E la ankor Mr Speaker, nou'n tann ki *ASP* i deklare ki zot in fer tournen R1.7milyon dan kont Gouvernman ki ti bann larzan ki pa'n ganny servi lo kart *STC*.

Menm noun vwar ki plis ki 100 travayer ki ti lo *URS* pa'n kolekte zot saler, ki montre klerman ki ti annan labi dan sa sistenm.

Mr Speaker, Mon osi tre ankouraze pou vwar ki Gouvernman pe met lanfaz lo restriktirasyon dan servis piblik, pou ki nou ava annan en lankadremman ki mezir performans, e mezir lafason travay anliny avek prosedir planifikasyon e bidzeter.

Mon espere ki sa ava anmenn loportinite pou bann zofisye dan servis piblik pran byen zot responsabilite e swiv byen bann prosedir ler zot pe depans ou kolekte larzan piblik.

Avan mon terminen Mr Speaker mon ti a kontan zis fer en pti remark lo pri lavi an zeneral. Nou konnen pou dir ki nou en pti pei ki depan lo lenportasyon lo la mazorite keksoz ki nou konsonmen.

E vi ki transportasyon par bato e osi bann komodite enkli karbiran in ogmante dan

lemonn, sa pou afekte nou direktman akòz nou depan direk lo zot lenportasyon.

Ler nou get karbiran par egzanp, pri en barik delwil lo marse mondyal in preske double depi komansman sa lannen, e sa in definitivman annan en lenpak direk lo pri karbiran isi sesel.

Lo kote manze Mr Speaker, la mon oule felisit *STC* dan son zefor pou fer desann pri par 7poursan lo serten marsandiz de baz.

Me mon ti a kontan lans en lapel avek tou bann marsan pou osi esey regarde dan ki fason ki zot osi zot kapab ede pou fer pri marsandiz desann. Mr Speaker, i demann en zefor kolektiv pou nou kapab atenn en tel lobzektif.

Mr Speaker pou terminen, mon ti a kontan remersye nou Prezidan ek son Gouvernman pou sa premye lannen travay ki zot in fer pou komans redres nou pei e met li lo en bon semen.

Nou konnen i pa'n fasil pou nou pei ki ti dan en moman kritik, me nou'n admir zefor ki nou Prezidan in fer pou re stabiliz nou lekonomi.

Nou apresye son bann zefor dan son bann visit aletranze kot in ogmant vizibilite nou pei avek bann

gran lasenn medya enternasyonal e kot in toultan met Sesel premye dan son bann negosyasyon pou ed devlopman nou pei.

Mr Speaker mon ti a kontan osi pran sa loportinite pou remersye nou Vis-Prezidan ek tou nou bann Minis ki pe travay dir e pe donn bokou zot zefor, zot letan pou delivre sa ki meyer pou Sesel.

Mr Speaker, mon oule osi remersi Minis Finans ek son lekip, ki'n fer en bon travay lo sa Bidze e met devan bann bon propozisyon pou sa transformasyon ki Sesel i bezwen.

Mon ti a kontan osi pou remersye zabitan Anse Etoile pou zot sipor pandan sa dernyen lannen e esperon nou kapab fer bokou plis dan lannen ki pe vini.

Mr Speaker, i enportan pou nou travay dir, sanz nou fason panse e nou fason fer, pa toler koripsyon e koumsa nou ava vin pli efikas.

Mr Speaker, mon espere ki keksoz ava kontinyen amelyore pou tou Seselwa. *COVID-19* pa ankor kit nou e nou bezwen touzour alert e pran nou responsabilite anver bann mezir ki Minister Lasante in met an plas.

Nou tou nou bezwen zwe en rol pou anmenn devlopman ki nesese pou nou pei e la mon demann tou Seselwa pou zwe zot rol dan sa devlopman.

Annou met nou Seselwa an premye pou nou kapab anmenn plis larises dan nou pei. Mr Speaker, mon priye ki Bondye i a touzour protez nou zabitan e nou pti pei Sesel. Mersi Mr Speaker.

(APPLAUSE)

MR SPEAKER

Mersi Onorab. Prezan mon ava apel Onorab Churchill Gill.

HON CHURCHILL GILL

Mersi Mr Speaker. Bonzour Mr Speaker, Minis, koleg Onorab, tou dimoun a lekout, spesyalman dimoun Baie Sainte Anne. Mr Speaker, Bidze 2022 pei, i en sonm R10 bilyon.

Kestyon ki tou Seselwa pe demann zot lekor, apre en lannen 2021 tre difisil ranpli avek diferan lensertitid pou fanmir Seselwa, e biznes Seselwa, kwa ki i annan dan sa Bidze, pou soulaz zot?

I kler depi boner sa lannen, in annan serten desizyon tre kalkile, ki vis ver Sekter Prive, koman en mannev

pou soulaz zot. En Lalwa, pou prolonz peyman poursantaz lo profi, prolonz soumisyon *tax return* e bann kont odit.

Prolonz peyman bann *fees* anyel, pou nonm en de. Tousala pou lannen 2019 e 2020 in ganny prolonz pou ziska le 31 Zilyet 2022. Ti vin dan Lasanble, i ti ganny aprouve.

Sa i vedir en sipor direk pou sekter prive pou zot kapab kontinyen fonksyonnen, san okenn gran presyon. Sa i en pa dan bon direksyon, donnen ki sekter prive i moter lekonomi pei.

I kler ki sa in posibil, akoz sipor finansyel *IMF* Pou siport finansman Bidze 2022. Kestyon alors, ki Gouvernman in anmenn devan pou soulaz ban fanmir Seselwa?

Ki'n bezwen fer fas avek pri tre eleve tel parey ki pri karbiran, to lenflasyon, pri transportasyon, soulazman fanmir vilnerab kou materyo konstruksyon, kou komodite laboutik, kou pasaz bato ek avyon, saler redwir par serten konpanyen, difikilte pou ganny serten kalite plas travay, difikilte pou zwenn kriter, pou lasistans sosyal, ki'n en defi reel pandan lannen 2021.

Gouvernman in rekonnèt sa difikilte ki dimoun ki dan

bezwen in fer fas avek pou satisfè kriter pou ganny lasistans sosyal.

Minis Finans in dir nou, ki en legzersis pou ganny fer pou revwar bann alokasyon *weights* pou lasistans sosyal pou bann ki lo pli ba saler. Me Minis pa'n dir nou, kan ki sa pou ganny fer?

Kan ki i ekspekte konplete? E kan pou vin anfers? Sa i vèdir, sa group dimoun pou bezwen espere. Pou konbyen letan? Nou pa konnen.

A mon avi, sa legzersis ti'n devret fini ganny fer, avan prezantasyon Bidze. E la Minis ti a dan en pozisyon pou donn Seselwa dat enplimantasyon ki ti devret konmanse Zanvye 2022. Sirman mon pe koz lasistans sosyal, pou selman sa ki dan bezwen e merite.

Mr Speaker, zisteman, Minis in dir nou ki pli gro sonm Bidze pou 2022 i en total R144 bilyon pou Program Proteksyon Sosyal.

Me ler ou get detay alokasyon ki'n donner, alokasyon i selman pou sa bann laliny Bidze swivan, R820.6 milyon pou benefis retirete.

R109.4 milyon pou benefis envalidite. R141.8 milyon pou benefis dezabilite. R299.4 milyon pou benefis *home carer*.

E R40.7 milyon pou *safety net*. E son detay alokasyon i *comme swivan*;

R27.95 milyon pou *day care* avek Lenstiti pou Devlopman *Petite Enfance*. R9.2 milyon *Scheme* avek SPTC pou bann retirete avek dimoun otreman kapab.

R1.2 milyon *Scheme* bann zil pros pour referans medikal, ki pou al kot Minister Lasante. E R2.4 milyon, *Scheme* Lasistans Lakaz pou bann endividi, dan sirkonstans *emergency*, kan en dife ouswa dezas, ki pou al kot Minister Gouvernman Lokal.

Minis tou sa bann detay i fer en total R1.44 bilyon pou tou sa alokasyon (*ASP*). Anba sa vot alors, napa alokasyon pou siport bann dimoun avek saler pli ba ki dan bezwen reel, e ki'n kapab satisfè kriter pou lasistans sosyal.

Pou benefis tou bann ki pe ekoute i tre kler akòz ki Minis in dir nou ki sa legzersis pou revwar alokasyon *weights* pou lasistans sosyal pou selman ganny fer lannen prosenn.

Alors Minis dan ou repons, mon espekte ki sa i a ganny eklersi, kote sa siport lasistans pou sorti.

Mr Speaker, mon sey konpran, lenformasyon ki Minis Finans in dir nou lo pwen 4,

paragraf 5, anba, “revizyon performans ekonomik e konteks lekonomi pou 2022.”

Minis i dir pou 2022, nou lekonomi pou kontinyen eksperyans krwasans pozitiv. Lekonomi ti’n kontrakte par 9.9 poursan an 2020. Prozeksyon krwasans pozitiv pou 2021 i 6.1 poursan.

Me pou lannen 2022, krwasans lekonomi i espekte ariv 7.2 poursan. Eski Minis i kapab eksplik nou kwa dan sa pozitiv, ki an menm tan koz lo en kontraksyon sorti 6.1 poursan pou al 7.2 poursan?

Menm si dapre li, krwasans lekonomi 2022, ti sipoze pli pozitiv ki 2021? Mon’n note sa amelyorasyon viziter konpare avek 2020, e bann marse ki’n kontribye, ki pa nou bann marse tradisyonnel.

Se *La Russie, Israel e UAE*. Petet leson ki nou devret pe tire ladan, se revwar fason ki Sesel koman en pei i vann son lekor, pou maksimiz larive bann viziter Sesel ler sityasyon *COVID* i amelyore, pou garanti maksimonm *market share*.

Ozordi plis ki zanmen, Sesel i bezwen bouz lo sa lot nivo pou fer lenpak lo sa marse touris mondyal dapre realite ozordi e pou laveni. Espesyalman, atraver bann vol

regilye pou eksplor posibilite, pou ogmant plis ankor.

Mr Speaker Minis in dir ki Sekter Lagrikiltir ek Lapes, pou espekte grandi par 3poursan an 2022.

Sa pou posib, par lentrodiksyon nouvo Polisi, Pou plis prodiksyon lokal. Me Minis pa’n dir nou ki pou arive avek Polisi Lenportasyon e bann lagreman bilateral ki sesel in sinyen, aletranze.

Eski Gouvernman pou etidye, e re vizit serten sa bann lagreman? Nou’n eksperyans problemm *market* pou vann prodwi Sekter Lagrikiltir ek Sekter Lapes Artizanal pandan sa lannen ler prodiksyon ti’n ogmante.

Mon rekonnèt ki akoz rediksyon dan touris ki Sesel ti pe eksperyanse, bann lotel pa ti kapab aste sa bann prodwi.

I enportan ki Gouvernman i vin kler lo sa size, pou ki dimoun dan Sekter Lapes e Sekter Lagrikiltir pa vwar zot pe eksperyans menm keksoz ler zot in ogmant zot prodiksyon.

Mr Speaker, sif ki Minis in donn nou dan sa Lasanble, koleksyon reveni pou prensipalman, atraver koleksyon *tax*, en prozeksyon R7.8bilyon pou 2022, konpare avek R6.69bilyon pou lannen 2021.

Dapre Minis sa ogmantasyon, i prozeksyon amelyorasyon krwasans dan Sekter Tourizm. Koleksyon lezot reveni ki pa *tax*, pou en total R1.07bilyon pou 2022, konpare avek R822 milyon pou 2021.

Pli gro ogmantasyon i koleksyon reveni *dividend*, sorti kot selman 11 lantrepriz, me Gouvernman i annan *shares* dan 17 lantrepriz.

Minis, en travay i bezwen ganny fer lo tou sa bann lantrepriz, pou evalye zot potansyel pou kontinyen egziste, pou reste soutenab e rantab pou Gouvernman.

Pou sa bann ki Gouvernman i kontinyen sibvansyon zot, a leksepsyon Lapos e *SPTC*, lezot pe endirekteman afekte potansyel sipor pou lezot vot, landrwa ki vremen dan bezwen e merite.

Gouvernman i devret bouze lo sa evalyasyon enportan lo serten sa bann lantrepriz imedyatman. Koleksyon reveni an term don sorti aletranze, i espekte ariv R782.1 milyon pou 2022, konpare avek R605.9milyon 2021.

Mazorite akimilasyon ogmantasyon, i an relasyon avek bann proze ki pa'n

materyalize pandan lannen 2021.

Mr Speaker, Minis in dir ki Gouvernman i espekte plis aktivite konstriksyon an 2022. Zot pe prozekte en krwasans 6 pousan.

Gouvernman in menm kre en nouvo Lazans Lenfrastriktir pou anmenn plis kordinasyon, dan lenplimantasyon bann proze. Me i tre dezapwentan ler ou vwar konstriksyon proze ki ti'n deza komanse dan distrik Baie Sainte Anne, me napa okenn nouvo proze pou lannen 2022.

Eksepte sa bann kontinyasyon proze swivan. Kontinyasyon proze Ile Eve, me i enportan pou vwar, konbyen pou ganny *allocate* e pou fer krwar?

Akoz Minis pou Lendistri, ti konfirman dan Lasanble, apre ki mon ti'n demann kestyon lo, ki zistans kontrakter, aköz mon ti demann kestyon, ki zistans kontrakter in arive ek travay, lo Ile Eve?

I ti dir ki *scope of work* lo kontra in bezwen refer. Alors i enportan pou konnen kwa ki'n ganny enkorpor dan plan final. Kontinyasyon travay lo lenfrastriktir, lo nouvo lasose pasaze.

Kontinyasyon Travay lo fasilite bazar, *gear store*, ek

Panton, kontinyasyon semen Pasquere, stasyon pou teste bann veikil, en larzan ki ti'n ganny bidzete an 2021 me pa ti'n ganny realize.

Nou espekte dan lannen 2022 zabitan Praslin espesyalman bann *owner car hirer, private vehicles, taxi drivers, omnibus operator*, e lezot dimoun lo Praslin ki annan transpor a kapab vwar finisyon sa *vehicle testing, testing* pou Praslin.

Napa alokasyon pou nouvo proze, napa okenn alokasyon pou kordgard Baie Sainte Anne, menm si travay lo plan ti'n byen avanse.

Napa alokasyon pou fer travay lo semen la rantre, Pou al lo nouvo lasose pasaze lo Ile Eve ki pou kapab evit okenn aksidan.

Mr Speaker, mon bezwen met lo rikord ki ozordi lo Praslin, kontrakter konstriksiyon pe fer fas avek a gro problem mank materyo. Bokou dimoun zot bann proze i bezwen met lo *hold*.

En sityasyon tre difisil, e ler materyo i annan i fini deswit. Nou espekte bann founniser materyo a fer keksoz pou adres sa.

Mr Speaker, mon pou bezwen osi la enform bann zabitan, pou bann zabitan

Praslin ki'n konpran, e vwar nesesite enportan annan en reprezantan lo Lotorite Planning menm si i annan pa'n vwar, e rekonnet lenportans en tel reprezantasyon.

Menm keksoz pou sa nouvo lazans lenfrastruktir, i domaz ki ler nou bann reprezantan distrik ki dan Parlman, espesyalman zil pros ek Praslin, ler nou pa vwar vre nesesite defann e lager kot i enportan pou asire ki i annan reprezantasyon for.

Mon pe reasir zabitan Praslin ki menm sa de amannman pa'n ganny aksepte pou nou zil ganny nou prop reprezantan, mon pou kontinyen lager, pou pouse, pou asire ki nou lavwa i ganny tande.

Mr Speaker, bokou dimoun i dan lenkyetid lo, ki pou arive avek zot kontra netwayaz? La ki Minis in anonse, ki Gouvernman in komans en legzersis. Pou revwar prosedir lo bann *tender* netwayaz.

Dapre Minis sa legzersis i sipoze konplete, dan premye kar 2022. Mon espekte ki sa legzersis ava pou le meyer e bokou plis dimoun a benefisye avek sa bann kontra netwayaz, pou asire ki sesel i reste prop, e vin pli prop ankor.

Me i tre enportan ki i annan en sistenm *monitoring* tre efikas pou asire ki sa bann dimoun ki ganny kontra i delivre parey zot lagreman.

Mr Speaker, i annan bokou pou dir lo sa Bidze, me nou'n ganny serten kantite letan pou fer lentervansyon lo la, ki nou bezwen respekte. An konklizyon, i kler ki vre bi en tel Bidze i viz ver amelyorasyon krwasans lekonomi pei, pou re stabiliz lekonomi pei an priyorite.

Me mon senserman krwar lafason ki priyorite distribisyon bann resours ki'n kapab akimile pandan lannen 2021, e prozeksyon enkli bann don ti'n kapab realiz en distribisyon bokou pli targete, ki ti a kapab annan en retonbe ekonomik bokou pli vit.

An menm tan aport sipor neser pou sa ki pli vilnerab ki pou bezwen fer fas avek vre defi 2022. Seselwa Travay i bezwen kontinyen, pe enport nivo difikilte, nivo defi ki nou bezwen fer fas avek.

Parey nou tou nou konnen, apre tou movetan i toultan annan en moman kalmi. Mersi Mr Speaker.

(APPLAUSE)

MR SPEAKER

Mersi Onorab. Mon ava apel Onorab Doyace Porice.

HON DOYACE PORICE

Mersi Mr Speaker. Bonzour tou mon bann koleg e bonzour tou bann ki pe ekoute. Mr Speaker, ozordi mon vreman fyer pou sa lan travay dan Lasanble.

Kot mon remersye Bondye pou sa kouraz, determinasyon e travay dir pou siport nou Gouvernman. Menm si mon ankor pe aprann serten travay ki konsern Lasanble.

Me avek sa tim *LDS*, napa ki ou pa pou aprann pli vit ki ou pa zanmen ekspekte. Menm si nou'n pas dan en moman difisil atraver pandemik *COVID-19*, sa pa'n anpes nou travay e *achieve* serten program dan distrik.

Sa Bidze ki Minis Finans Mr Hassan in prezant avek Lasanble, Vandredi le 12 Novanm, pou mwan, mon santi ki i zis en fondasyon.

Wi zis en fondasyon ki fer ki nou bezwen kontinyen travay pli dir e fer plis sakrifis pou kapab ed nou fondasyon vin sa ki i devret.

Akoz nou tou nou konn tre byen ki mannyer sa pei ti ete, apard problemm *COVID-19*, ki'n anpes nou lekonomi. E

annou pa bliy sa bann larzan perdi, koripsyon dan tou sort fason, bat latet pti malere pou en nanryen ditou.

Tousala ti fer par en Gouvernman sortan, pou abes nou pti Sesel. Zot konn byen, zot ozordi, serten bann fo profet pe vin devan piblik atraver medya, pou vin rabase e vin dir ki nou Gouvernman *LDS* in ml zer larzan pandan sa 1an!

Zot manz zot mang e zot oule zet leyo lo nou Gouvernman. Kot zot menm sa bann fo profet, pe kontinyen pran gro kopo dan *tax payers money* tou le mwan, sa zot pa koz lo la ditou, akoz zot pa donn en pe pou ed sa bann malere ki zot pe *envanter*, dan plas anmenn zot kot Lorloz?

Sa bann fo profet, zot ase fer sa pep krwar lizour pou aswar. Zot in ase fer nou, zot in ase fer nou pou 40an. Mr Speaker Minis Finans in osi fer son devwar pou eksplik nou kot nou sorti ler nou ti pran sa pei dan lanmen sa bann fo profet le 25 Oktob 2020.

E sa progresyon ki'n annan ziska Novanm 2021, e in osi don nou plan ziska 2025.

Mr Speaker, menm si nou ankor dan en kriz ekonomik, Gouvernman atraver Minis Finans, pe war en fason pou fer travayer ganny zot

lapey, tou bann ki ganny benefis sosyal ganny zot benefis. E lezot fonksyon Gouvernman i kontinyen marse pou ki nou lekonomi pei i retourn ankor pli for.

Pa zis sa, i annan travayer ki ankor pe ganny serten *Allowance*, ki pe fer *overtime* ziska R100mil, e Gouvernman pe fer sir ki i annan dan zot Bidze.

Bidze 2021, menm si in napa bokou, me dan nou distrik Baie Sainte Anne nou'n *achieve* serten pti proze fer par Bidze dan Minister Gouvernman Lokal, atraver distrik.

Par egzanp, nouvo pti semen segonder Marie-Jeanne Estate, *cross barrier* lo serten *main road*. Bann pye dibwa koupe ki ti dan danze pou difil elektrik, e osi in anmenn laklerte lo serten semen, e sa ti ganny fer par *PUC*.

Nouvo sirfas semen kot nouvo lasose pe fer par *Land Transport*. E la nou nouvo lenfrastruktir pou vann tiket bato in fini met lo *tender* e pe al komanse byento.

Netwayaz landrwa pou komans lenfrastruktir pou travayer *SFA*, nouvo bazar pou peser e fermye, lagrandisman lasose, pe al komanse byento

par Minister Lapes e Lekonomi Ble.

I osi kontinyasyon semen Pasquere par *Land Transport*, renovasyon Lopital par Minister Lasante. Tousala Mr Speaker i bann nouvo proze ki distrik Baie Sainte Anne in *achieve*, e osi pou benefisye byento dan sa Bidze.

Dan Bidze 2022 annan osi konstriksyon lenfrastruktir lo Ile Eve, konstriksyon nouvo stasyon teste transpor; alokasyon bann *pontoon* pou peser desarz zot pwason; later *land bank* Salazie, kot bokou nou zabitan pe espere en ta letan.

Mon bann *achievement* personnel, koman en Manm proporsyonnel, se sa bon korperasyon travay avek *MNA* Elekte Onorab Gill, administrater distrik Baie Sainte Anne Denis Antat, osi bann Lazans lo *district team*, pou ede pran bann desizyon pou sa distrik.

E la nouvo reprezantan Gouvernman ki nou Prezidan in donn Praslin Mr Vincent Cedras, li osi nou'n komans sa bon kolaborasyon travay.

Kreasyon en tim volontarya pou ede kot i neser, sirtou bann pti proze distrik. E la mon sit en legzanp, sa *fitness trail* ki pa pe kout

Gouvernman en sou, apard ki sa 9 masin legzersis, ki ti pe dormi kot *NSC* pou en pe letan.

E la in ganny anmennen Praslin, par lankourazman sa nouvo Minis pou Lafanmir, *Sport* ek Lazenés. E pou sa nou dir li mersi.

Pandan sa en an in osi annan serten travayer dan sa menm distrik ki'n ganny promosyon, menm si nou pa dan menm larelizyon.

Kot la mon mazin mon zanmi Jean-Marc, e Nadine, kot zot in sorti lo en plas pli ba e al dan en pozisyon pli o dan Gouvernman. Kot i konsern travay avek lazénés e spor dan distrik, e osi form par nou tim volontarya.

Jean-Marc e Nadine, tou lede i vremen kontan, e sa i montre nou, ki ler nou donner dan travay, ou osi resevwar plis, e i osi montre nou ki sa Gouvernman *LDS* pa gete ki kouler ou ete pou donn promosyon.

Mr Speaker i annan bann defi osi, kot i annan proze ki ti'n devret fini met an plas depi en ta letan, me la nou bezwen esper 2022.

Defi dan serten landrwa travay kot pa pe desarz zot responsabilite parey i devret, zot ankor pe trenn lipye, e Praslin pa pe ganny eparnye

sirtou serten travayer dan serten Minister.

Dan sa Lasanble nou pe vot Bidze pou travayer osi ganny saler, alor annou travay pou nou saler, annou aret fer nou zabitan soufer, e annou aret met politik dan travay.

Aret dir nou dimoun al 'tik anler' ler zot pe demann en servis, sa pa pou anmenn nou okenn par, e pa pou anmenn okenn benefis pou nou pei, atraver sa bann aksyon.

Defi ankor Mr Speaker, tarde pou pran desizyon. Ou met dosye zabitan dormi dan nou lofis, labi lo transpor Gouvernman, e osi dan parastatal, fasilite sportif ki pa ankor fer renovasyon, e *sportmen* pe espere.

Problenm pou ganny materyo konstriksyon lo Praslin, ki pe met retar ek bann proze. *Way leave* par serten sekter prive pou kapab elarzi semen, parey semen Anse La Blague, ki zabitan pe espere pou en pe letan.

E la mon pou enplor ek Gouvernman pou get ladan seryezman, aköz zabitan Anse La Blague pe soufer ek sa kalite semen.

En lot defi se lo kote nou bann *boat charter*, ki zot kyosk in ganny kraze, e la zot pe esper

konstri zot kyosk pou deservi zot kliyan, pli prop, e pli byen.

Mr Speaker, bann semen segonder ki pa ankor fini, *toilet* piblik ki napa ditou, sirtou kot i konsern lo lans, bann later lagrikiltir ki ankor vid, lavi lo zil Mr Speaker, i ankor vreman ser.

Bus stop napa ase, lalimyer lo *main road* sirtou Cote d'Or. Bann zenn fanmir ki ankor pe esper lakaz, kot zot in ganny anbete en bann letan, e sa pe kout zot ser aköz zot pe lwe lakaz byen ser.

Mr Speaker sa i bann defi ki mon'n obzerve, lo zil, spesyalman Baie Sainte Anne Praslin kot mon reste.

Atraver bann lezot *achievement*, mon pou dir en gro mersi sa Gouvernman *LDS* atraver sa bann Minister, pou met aker pou nou zil. Serten bann biznesmenn lo Praslin, e Mahe, pou bann *sponsors* ki'n ed nou bokou atraver nou bann proze pou tir en pe depans lo Bidze Gouvernman, ankor enn fwa nou dir zot mersi.

Mon'n osi remerisi zabitan ki pe donn mwan sa sipor pou fer sa travay nob, espesyalman mon tim volontarya ki vreman senser avek zot travay dan Sanmdi.

Kot zot kit zot biznes personnel pou zwenn mwan, e

sa i montre nou Mr Speaker ki ankor annan bann zabitan bon leker lo nou zil.

E mon demann zot pou kontinyen siport sa Gouvernman, pou fer nou distrik avanse e vin sa bizou ki lontan nou pe rode. Mon osi enplor ankor ek Gouvernman atraver Minis Finans pou kontinyen get nou zil, pou amelyor nou lavi.

Atraver bann defi ki mon'n koz lo la, pou ki nou zabitan i a benefisye zot osi. Mr Speaker, lo mon dernyen lentervansyon lo repons Bidze pou 2021, mon ti dir ki Bondye i a ed nou pou sorti dan sa kriz ekonomik, e eklate son lalimyer lo nou, vreman nou Bondye in ekout nou, e pe donn nou sa ki nou'n demann li.

Kot touris pe ranpli dan nou pei, Praslin e Zil Pros pa pe ganny eparnye, e sa pe ede fer ki nou lekonomi aranze, e nou'n sorti dan ICU e al dan ward, pou nou ganny plis latizann, pou nou al dan lakour, e vin pli stab.

E osi parey mon'n dekrir sa Bidze ki i en fondasyon, ki sa Gouvernman atraver Minis Finans in mete, e sa laklerte i a ed nou pou fer monte sa fondasyon.

Alor pou fini Mr Speaker, mon pou ankor demann nou

Bondye Papa pou kontinyen eklate son lalimyer lo nou, lo nou Gouvernman, e pei an zeneral, pou ki nou lekonomi i a sanz pli vit ankor, e ki nou tou nou ava benefisye, e war plis sanzman dan lavi nou pep Seselwa.

E mon demann avek nou frer e ser Seselwa pou kontinyen priye, krwar dan nou Bondye Papa, me pa ekout bann fo profet lalang, ki zis zot anvi met retar dan nou pti pei Sesel.

Avek sa lentervansyon mon pare pou kontinyen rod fason pou ed nou Gouvernman, atraver bann proze dan mon distrik, pou ede annan mwens depans, e pare pou siport sa Bidze ki Gouvernman LDS in anmennen par Minis Finans. Mersi Mr Speaker.

MR SPEAKER

Mersi Onorab. Nou a pran en *pause* la, nou a rebran travay 2er apre midi. Mersi.

(BREAK)

MR SPEAKER

Bonn apre midi tou dimoun. E mersi pou zwenn nou pou travay apre midi. Mon apel Onorab Waven William.

HON WAVEN WILLIAM

Mersi Mr Speaker. Bonn apre midi ki a lekout. Mr Speaker dan konteks mon diskour i relevan pou mon sit ankor Eklesyas sapit 7, verse 14 dan Labib, mon site “dan botan rezouir e dan movetan konsidere, Bondye inn kree len a lot e zonn pa kontrol son desten.”

Mr Speaker mon pou dakor ek Onorab Gill ki apre movetan i bezwen annan botan.

La i pa lemoman pou rezouir me pou konsidere koman en pep pa pou rezenbe, *boycott*, konplent ouswa travay pli dir pou sirmont defi e diriz ver target 2023 pou rebran nou lavi normal.

Swa i ek nou an deor nou *zone* konfor pou re pozisyonn pei e nou menm ekonomikman.

Mon remersi Bondye an premye lye pou provizyon ki i pou fer anver prozeksyon Bidze 2022.

Mon dir mersi pou tou travayer Seselwa dan sekter piblik e prive koman fasiliter e koman antreprenner, pou kontribisyon ki zot in e pou fer senserman dan sa partenarya pou redres lekonomi pei.

Mr Speaker fas ek bann fo propagann e an fas ek serten bann move lentansyon e lenfliyans malisye la deor, i

enportan ki nou met realite dan perspektiv e dan konteks.

Si nou pa pridan avek ki, e avek kwa nou pe konpromi, zot kapab kout nou pei ser e fer ditor Nasyon Seselwa e satisfis zis serten *ego* serten politisyen rankinen.

Koman politisyen responsab e determinen, an fas ek difikilte ekonomik, nou devwar merit edik sa pep pou konbran e aksepte lozik. Gouvernman koman fasiliter bezwen vin pli proaktiv e pli frekan pou met pep azour ek direksyon e desizyon ki zot pe pran anba sa prensip latransparans, espesyalman pou donn konfyans e donn lespwar Mr Speaker.

Bann diferan brans reprezantan lepep ki senser e konbran kwa ki bezwen ganny fer, tel parey sosyete sivil, linyon travayer, parti politik e dirizan relizye bezwen form parti sa legzersis ledikasyon an partenarya ek Gouvernman. Pou asir sa zefor komen ver redres lekonomi. Pa devre annan divizyon ouswa konpromi lo sa size Mr Speaker.

I malere ki lenformasyon pe ganny distort, swa akoz azanda personnel, swa lanvi pou destabiliz pei, par serten ki pran plezir pou prezant realite an deor konteks. Keksoz pli

regretab, Mr Speaker, se letan imen i depriv son laservel pou fer sa ki byen. Refize rekonnèt e aksepte realite akòz zot konfor in ganny destabilize atraver Eleksyon zeneral demokratik.

Wi, ou annan drwa lekspresyon lib, ou annan drwa rasanble e ou lib, me ou liberte pa devret pe afekte drwa lezot otour ou pou fer e pans sa ki byen.

Alor si ou responsab, ler ou responsab, eski nou servi sa ki mwen entelizan, pou vin sa pon ouswa sa baryer pou maske nou vre lentansyon sabotaz e rebelyon.

Frer e ser Seselwa, ki realite ki Zanvye 2021, Gouvernman ti bezwen pran *loan* apre *loan* pou asir saler travayer dan sekter piblik, pou garanti lasistans pou nou sitwayen aze, asir lapey *carer*, sipor pou kous popilasyon otremman kapab e vilnerab, fasilite serten kredi pou biznes, kontinyasyon letid liniversite nou bann zenn pos-segonder, asir kontinyite dan akse ledikasyon pou nou zanfan e servis lasante pou tou, finalman pou fonksyonman zeneral Gouvernman.

Det Sesel ti'n depas 100poursan limit e ensoutenab. Defisit ti'n defons plafon Mr Speaker.

Mon krwar pa si Seselwa, in oubliye bann parol Gouverner Labank Santral ki ti pe dir e kontinyen dir, vizavi nou det e ki Seselwa an zeneral, enkli Gouvernman bezwen vin pli pridan dan fason depanse.

Mr Speaker erezman ti en benediksyon ki Sesel ti lans dan en program agresiv vaksinasyon a tan, ki byen boner inn permet nou ouver frontyer e viziter etranze, ki ti primordyal pou relans nou premye pilye lekonomi Mr Speaker.

Priyorite Gouvernman sete pou stabiliz sekter finansyel e lekonomi Sesel. Mr Speaker nou rekonnèt e aksepte ki sekter prive i moter lekonomi, alor mon demande ki sa konsiltasyon frekan i ganny fer ek sekter prive, pou ankouraz e siport li pou grandi e kre plis larises.

Mon ankouraz Gouvernman pou vin pli atantiv koman fasilitater, dan sa moman tranzisyon ek letap devlopman sekter prive e pou adres bann problem pli direk olye par pti doz.

Mon pe demande ki Gouvernman, bann labank komersyal e Labank Santral zot vremen konpran difikilte ki plizyer kous sekter prive pe fer fas avek e pou sey tou posib pou

deblok kredi. Tenan kont ki si moter lekonomi pa lwile, ouswa ganny loksizenn, masin pou siz ouswa perform pa anba vre potansyel. Annou donn en pli meyer dil sekter prive.

Anba sa prensip pran desizyon e fer aksyon annou siport motivasyon me pa touy linisyativ.

Dan sa direksyon mon felisit *NISTI* pou zot akonplisman dan sa konteks e lev nivo kreativite e inovasyon dan nou zenn. Mon demande ki sekter prive i regard sa pli pre ek loportinite pou investir.

Mr Speaker si lenvestisman en antreprenner, evalyasyon i plis ki R12 milyon, e later i pou Leta. Kwa ki difisil pou deblok en *loan* R1milyon pou sa endividi. Akoz fodre i kontribye ankor larzan pou ganny en *loan*? Oli lozik par deryer sa? I pa fer sans Mr Speaker. Mon kapab donn plizyer legzanp, pa fini lekel ki antre dan fre letan perdi e resours gaspiye sa investiser? Labank lo son kote, li, i ti pou sarz ou lentere ouswa sirsaz, me oli *refund* pou sa ki sa investiser in perdi atraver letan gate ki osi annan en valer?

Mr Speaker mon vwar ki nou lendistri touris pe ganny menase ek bann aksyon vol lo lans, dan loto e dan vwazinaz.

Mon apresye zefor ki lafors lord e lape pe fer. Mon osi remerisi manm piblik ki pe donn sipor.

Mon demande ki Lotorite atraver sa Bidze zot donn nou bann zonm ek fanm dan liniform, bon lekipman e adekwa pou travay avek.

Tenir kont ki i nesaser bon fasilite transportasyon pou *rapid response*, me pa bann transpor ki kas tousel e kot pyes napa.

Frer e ser Seselwa annou antoure pou kontinyen dil ek sa problenm a nivo lafanmir, dan kominote e pei, ansanm nou kapab fer li.

Sa viziter ki'n pran en *loan*, sa viziter ki'n anmas son larzan e sa viziter ki'n swazir Sesel koman son destinasyon prefere pou vizite, pou son sezour vin en kosmar kot i perdi pa zis son larzan, me bann dokiman personnel. I pa zoli ditou Mr Speaker.

Se an grann parti atraver zot depans dan pei ki lekonomi pe refer vitman e pe permet nou met manze lo latab en mazorite fanmir Seselwa.

Mr Speaker, anver lanfaz ki pe ganny mete lo sekirite alimanter e sa lanvi pou ogmant prodiksyon agrikol, anba ansyen Gouvernman in annan plizyer gran plan e plan

stratejik, realite lo teren ti lekotrer.

Mon demann Gouvernman la lefe ki restriktirasyon in arive dan sa Minister, mon demande ki sa Minister i fer en lodit kontinyel, pou asire ki i annan bann zofisy e aproprye dan pozisyon kle pou asire ki sa sekter i vwar sa diferans dan lapros.

Sa problem napa resours dan stor lagrikiltir, sa problem enserten par serten O Zofisy e ki merit donn en larepons e ofer en solisyon e pa pe fer li, fodre dis-kontinyen.

Nou pa kapab annan travayer dan stor lagrikiltir ki napa leksperyans *procurement*, kot koz retar dan peyman e pou asir stokaz aproprye.

Nou pa kapab annan vander stor ki pa konn diferans pyes tiyo e dir ek fermye ki sa kalite legren *coupling* zot pa'n zanmen fer vini. Pa kapab les lotel anbet nou lo rezon akoz zot bezwen enport legim ki nou annan lo marse e nou pa kapab dir ki in annan ase.

Mr Speaker konsiltasyon ek fermye kan rapor *meeting* pou swivi lo desizyon ki'n ganny pran, pou reste lo zis papye. Dan sa direksyon mon demann Minister koman fasilitater, pou travay akote fermye me pa an konpetisyon ek lasosyasyon me

donn siport nesese pou pou sa bann prodikter pou fer pei realiz son target.

Mr Speaker atraver sa Bidze, mon espekte ki sa plan reform dan ledikasyon i demare. Ki en lodit i ganny fer pou asire ki bann teknisyen ki pou enplimant sa bann reform zot konpran byen.

Akoz piblik an zeneral pann apresye konnen ki nivo ledikasyon nou bann zanfan lo serten size enportan nivo *on average* i pa akseptab Mr Speaker.

Nou anvi vwar pandan sa manda demars i ganny fer pou amelyor sa sityasyon. Leskiz ouswa blanm pa pou koriz sa lenzistis anver nivo laprantisaz.

Mr Speaker prezan anver sa prozeksyon sonm Bidze 10 ekek bilyon ki pou ganny depanse pou lannen 2022, mon pa pou dir an tro me ki bann diferan lazans Gouvernman zot bann travayer zot *set* bann *target* personnel ek Bidze ki zot gannyen. Ki bann swadizan *supervisor* e *managers* dan zot diferan rol zot delivre.

Bezwen asir lefikasite e progre dan satisfere zot kliyan e silvouple azir en pe pli fran ek lenformasyon. Pa kree lekspektasyon ler zot konnen pou napa ouswa i pa posibil. Pa amenn politik *United Seychelles*

dan travay, pou fer krwar e tir ketsoz dan konteks, fer pep fristre kont gouvrenans.

Mon en pe konsernen, akoz dan sekter piblik e prive i annan aktivis e siporter lopoziyon *United Seychelles*, e dan zot kongre resaman, zot in ganny dir fer politik partou, menm dan travay.

Menm apre ki Prezidan Larepublik in dir ki zot politik kit kot zot, letan zot vin deservi sa pep, ki pe trimouse dan pey zot saler.

Mr Speaker, nou'n annan leksperyans menm avan ki zot in piblikman dir sa.

Ler pou dil ek zot, pou annan leokri viktimizasyon parey pe ganny promote dan konferans lapres. En moman nou pa dan linyon pli tar nou afilye. Sa zot pe kanmoufle an misouk Mr Speaker.

Mr Speaker, mon konsernen akoz mon anvi ki a lafen 2022, nou lekonomi i fer ankor pli byen, ki nouvo kad saler ki Gouvrenman i anvi enplimante, travayer Seselwa i gannyen son *deal*.

Kot olye *Scheme allowance* ki pa fer serten kalifye pou en *loan* anba sa nouvo reform e nouvo Gouvrenman, Seselwa kalifye pou en *loan* avek son saler.

Mon anvi ki sa Gouvrenman i reisi ki Trezyenm Mwan Saler ki sa menm kote ti fer Seselwa gannyen, kot nou'n bezwen *put on hold*, an 2023 i vin realite dan en fason pli zis baze lo performans.

Ki sa ki pe esper konpansasyon delo Lanmizer e *fungus* parmi lezot ankor, zot ganny rekour swa 2023, swa 2024.

Mr Speaker be la *United Seychelles* pe dir aktivis amenn politik dan travay. Seselwa zot pe fer sa pou ed nou lekonomi agrandi ouswa pou retard progre. Annou zize pou nou menm.

Zot anvi trezyenm mwan saler, zot anvi sa Gouvrenman fer tou dan en lannen solman zot pe vin ek en politik dan travay, pou kares nou, *comme* dir defen Prezidan Rene.

Mr Speaker, *warning* in ganny donner, si lentansyon se vin met bar dan nou larou, si lentansyon se may nou zanbek e retar progre, pou annan konsekans. Sa Mr Speaker i pa en menas me en *warning* an bonnfwa, akoz Sesel e lenterer Nasyonal mon repete akoz Sesel i lenterer nasyonal i nou konsern priorite.

Nou vwar sa lanvi fer dezord, nou vwar sa lanvi *boycott* ki'n komans ek vaksen,

apre louvertir frontyer e la plakar tir sa boufon *State House*, mon lafen, menm si i annan travay Mr Speaker.

Politik goute, anras lasyet manze, viktimizasyon, sa manman 3 piti, *boycott* vot kont plizyer Lalwa par Lopozisyon dan Lasanble, i demontre vre lentansyon pou azout fristrasyon, lakoler e rankin parmi sitwayen anver fo pretansyon Mr Speaker.

Dan plas zwenn ek nou pou met pasyan lekonomi Sesel an deor ward, zot pe zwe o bor pasyan ek tou sort kalite varyan viris *COVID* pou agrav kondisyon pasyan lekonomi Sesel.

Ozordi zot ankoler, zot ankor fermal partou, zot in rat sa sans pou koste. Zot refize aksepte tor kolektiv atraver tou zot bann desizyon kolektiv, zot azanda personnel ki ti o sant devlopman an fezan krwar anba propagann “zonm o sant devlopman.”

Seselwa ti'n ganny ase ek zot mal zesyon larzan. Zot pa'n fer otan letan resours ti annan dan botan, tel parey rezourd sa problemn polisyon *Fairview* enkli anpes katastrof La Misere. Bann proze lakaz ki ti kapab ganny fer me ki'n ganny anvoye. Ki ozordi fanmir i ankor pe

espere dan distrik Grand Anse Mahé.

Menm rezourd problemn desarz lakaz ek kabinen, ki tou sa anba Gouvernman *United Seychelles* mon'n anmennen devan atraver kestyon e Mosyon, ki Prezidan Parti *US* i dir i deplorab. Wi zot fason fer osi ti deplorab pou rezon akoz sanzman ti bezwen vini.

Mr Speaker be la prezan les sa Gouvernman travay, parey zot ti kontinyen dir les Prezidan Faure travay, me solman par deryer son ledò, dir ki i en *weak President*.

Lekontrer se ki Prezidan John Charles Ramkalawan pe *stand strong*. Pe pran bann desizyon ki pa popiler, pa akoz i pe rod vot, me anvi refer lekonomi Sesel pou pep Seselwa rebran son lavi normal.

Menm Fon Monneter enternasyonal zot in etonnen ek rezilta remarkab ki dan 1an nouvo Sesel in fer pou amelyor baz ekonomik. De lot kote *United Seychelles* i kontinyen gard son latet dan disab, e refize apresye progre ki pei pe fer. Pep a note ki zot pe kontinyen dir ki Gouvernman *LDS* pa'n fer naryen, pli tar kontra dir zot lekor par anvi sa menm Gouvernman, ki pa'n delivre pou donn tou e fer tou.

Be si dapre zot lekonomi pa bon, akoz zot in oubliye sa fraz dan zot lepok kriz ekonomik 2008, letan zot ti pe dir ek Seselwa ki zot pou fer keksoz fir anmezir lekonomi i amelyore, be la zot in oubliye e refize konpran sa lozik. Be ki *show* e teat zot pe fer alor, la Mr Speaker?

Mr Speaker rezilta sa zefor e demars pa ti pou pran plas si nou dirizan pa ti brav e *stand strong*, anver pran bann desizyon e enplimant sa bann mezir ki nesese pou amenn nou ver amelyorasyon nou sityasyon defi ekonomik.

Mon siport sa bann mezir akoz mon'n get pli lwen ki mon bout nennen ver semen soustenabilite.

I apropiye osi pou mwan felisit tou Manm Lasanble ki'n siport pas bann Prozedlwa an sipor demars Gouvernman.

Remersiman i osi al pou tou Seselwa ki malgre difikilte ekonomik dan son lavi an fas ek defi ekonomik, zot konpran e pe solider ek sa bann reform ki pe aport bon rezilta.

Mr Speaker mon rol la, se ede edik sa pep pou konpran sa realite, asire ki lentere sitwayen Seselwa e rezidan Grand Anse Mahé pe ganny tenir kont ver semen progre olye regresyon.

Wi i annan fanmir ki pe fer fas ek difikilte dan lakour, sa ki ankourazan se ki serten pe bouze pou fer travay apre ler pou soutenir e lasistans *welfare* i la pou sa ki merite. Bann ki pa travay pe ganny dirize pou pran en lanplwa Mr Speaker. Sa i ankourazan.

Mr Speaker, fas ek latas ki sa Gouvernman i annan, bann *challenge* ki devan nou, lensertitid ki an deor nou kontrol. anba moto koste Seselwa, mon ti espekte ki nou ti pou annan en Lopozisyon ki debout akote zot moto, ver ed nou amelyor lekonomi Sesel atraver bann kanpanny, desizyon, aksyon, restriktirasyon e amann Lalwa nesese pou pozisyonn nou ver sa progre.

Ki pep in temwannyen, bann teat dan konferans de pres, bann *show* isi anndan par *Leader* Lopozisyon, koman en ansyen edikater, *mislead*, distort lenformasyon, tir ketsoz dan konteks e kree konfizyon, azout fristrasyon lo sor pep.

Mon rekonnet ki ler sakenn de nou pe aprann toulezour, i refize aksepte ki i pou ganny donner leson dan sa Lasanble.

I refiz-e rekonnet ki sa *Standing Order* ki *SPPF*, Parti Lepep e *United Seychelles* ti

amann li firamezir pou asir kontrol sa lepok lo Lopozisyon, ki ozordi letan lakord ki anmar bef nwanr in osi anmar bef rouz, i konplent.

Me pa zot ki'n sey gard tou kontrol e Speaker pe servi sa menm *Standing Order* pou gard lord e lape. Sa i en leson ki fodre i aprann aköz son kan etabli sa lareg.

Alor mon krwar la, atraver ou Mr Speaker, la mon krwar ou pe al tro lwen ek ou bann teat ek ou bann *show. Get real!* Annou ini pou asire ki wi, larises pe i agrandi ki an 2023 ansanm nou ava redonn sa pep son lavi normal odela pandemik *COVID*.

Mr Speaker mon konpran rasyonnel sa Bidze. Mon demann sekter piblik pou delivre e demann pep Seselwa pou reste ini pou asir bann benefis e target ki ganny zwenn an 2023. Pa ekout *United Seychelles* ki pe vin ek politik dan travay konmsi sa i pas avan ou byennet e avan byennet pei.

Finalman mon pou sit serten ekstre deklarasyon ki ou Mr Speaker dirizan nou parti e ozordi Speaker ou ti fer dan nou manifesto pou Eleksyon zeneral pei an 2020, mon site: "Sa i demann en lapel anver responsabilite e ou volonte pou deservi sa pei, aköz letan en

ketsoz i pou ou, ou pou pran ka avek, protez li e fer li vin pli meyer posib." Fen sitasyon.

Mr Speaker, mon remersye tou dimoun ki'n ekoute e ki Bondye i beni nou pei e nou Nasyon. Mersi.

(APPLAUSE)

MR SPEAKER

Mersi Onorab. Mon apel Onorab Noline Sophola.

HON NOLINE SOPHOLA

Mersi e bonn apre midi Mr Speaker. Bonn apre midi tou Manm Onorab, e tou dimoun ki pe ekout deliberasyon lo Bidze 2022.

Mr Speaker, en lannen dan Gouvernman *LDS*, en lannen kot bokou promes pa ankor kapab ganny delivre, an rezilta en lannen avek bokou soufrans e lensertitid.

Vandredi le 12 Novanm 9er bomaten, en nouvo Bidze R10bilyon in ganny prezante avek pep Seselwa.

Ou ki dan lakour ki'n ekoute e dizer sa diskour. Ou konman en endividi. Ki mannyer ki ou pou kapab dekrir sa Bidze?

Mr Speaker, i enportan ki Seselwa i sitye zot e konnen ki kalite Bidze ki'n ganny prezante.

Eski ti en Bidze kot tou dimoun i pou annan par ladan? Eski ti en Bidze ki pou ed malere bouz devan? Ti en Bidze ki pou ed tou biznes prospere? Ti en Bidze pou kapitalis selman? En Bidze ki sa ki annan pou touzour annan? Oubyen en Bidze ki pran ek pov e donn avek sa ki annan?

Mr Speaker, i enportan ki pep Seselwa i mazin byen ki Bidze 2021 ti en total R11 bilyon. Zot in ganny sans pou analize, viv li pou lan, an relasyon sirtou avek kou lavi.

Mon demande eski zot in apresye sa kalite lavi ki zot in pas ladan? Eski ti annan plas pou ou byen respire, byen dormi, pou ou kapab repran en lazournen travay?

Mr Speaker in ariv ankor sa moman kot tou popilasyon i anvi aprofondir zot lo lafason ki zot larzan pou ganny distribye pou lannen 2022 e sirtou lafason ki lekonomi pei pou fonksyonnen anba sa nouvo Gouvernman.

Mr Speaker, e la pou lannen 2022, sa Bidze in ganny koup par en bilyon Roupie. Sa larzan ti pou'n kapab amelyor lavi plizyer nou bann frer ek ser Seselwa ki pli vilnerab dan pei.

Sa ti ou fer li pli byen reflekte sa moto ki sa Gouvernman in swazir pou

travay avek "Sesel pou tou son zanfana". Non pa Sesel pou en pe son zanfana. Alor fer ki tou Seselwa ava vwar zot dan sa Bidze.

Mr Speaker, sa kou lavi dan Sesel pe annan tro bokou lenpak negativ lo nou pep Seselwa. Sa size pe domin laktyalite, partou kot ou pase, kot legliz, lo semen, kot lopital, dan magazen ou tann menm sanson. Sa lavi i ser. Kote ki nou pe ale?

La kot bazar i apel pa pase. Pa zis zenn ki plennyen, dimoun tou laz. Mr Speaker mwan mon konn lanmizer, mon'n viv li, se pou sa rezon ki mon leker i desire par sa bann komanter. Wi ser frer Seselwa, Sesel nou ti mizer, nou'n goute sa mizer, me pa dan sa leta ki nou ete ozordi.

Mr Speaker i posib ki Minis pa frekant sa bann vilnerab, i pa al dan sa bann landrwa, i pa konn lamizer, alor i pa konn la realite deor lo teren ki mannyer i pase. Sinon son lapros Bidze ti pou lotreman.

Pep Seselwa, ansanm annou gete ki provizyon ki'n ganny mete pou amelyor kou lavi. Minis in koz bokou lo larive touris dan pei ki lafen Oktob 2020 ti annan 133,966 touris ki ti vizit Sesel.

Pandan sa menm peryod Avril ziska Oktob, deviz ki ti pas atraver nou sistenm banker ek biro lesanz ti'n mont lo en nivo sibstansyel pou ariv \$366 milyon.

Fodre ki Minis i konpran sa byen. Lekel ki pe benefisyè avek sa larive touris ek deviz?

Mr Speaker tou keksoz in monte dan pei. Manze in monte, landrwa parey *Retail STC* lo La Digue kot Digwa ti pou kapab ganny en konsolasyon in fermen, e pou rezon ki pa valab. E *wholesale* osi i dan leral, akòz nou pa konnen ki pou arive avek byento.

Pli pir, pri transportasyon marsandiz lo sa de zil i reste ankor en kosmar pou nou. Pri materyo konstriksyon i apel pa koze. Malgre ki Minis Finans ti fer en promes avek propriyeter bato kargo pou ed zot dan lasanble, pov propriyeter taye anvoy tou le nesese me sa pa'n zanmen materyalize.

Plis kartel pe ganny ankouraze dan Sesel. En serten group boutikye i koz menm langaz pou fer monte pri marsandiz. Ler pou fer desann pri zot pa konn koze ditou.

Malgre ki deviz etranzer i desann, me bann pri komodite i kontinyelman monte. Pou serten bann komersan Sesel

konmela, zot annan touzour zis vye stok, pa kapab fer pri desann, zot kapab fer monte vye stok. Pep i plennyen person pa tande.

Mr Speaker, mon pou donn zis enn de legzanp fakter ki pe pli afekte Seselwa, pri bis in monte, *taxi* in monte, pri karbiran kot bann laponp ozordi i en pri, e lafen lasemenn pri i sanze, in monte. Me kan ki sa *tanker* avek nouvo karbiran ti arive en sel kou. Bann nesese pti baba, parey dile, *diapers*, pri i egzorbitan.

Trezyenm mwan saler, apre ki tou ti'n ganny promet prezan pou napa ditou sa lannen.

Mr Speaker, oule dir ti napa en pti granm pour adousi leker sa bann travayer apre en lannen ki zot in sakrifye zot fanmir pour travay dan sa letan *COVID*?

Pou napa ogmantasyon dan saler pou bann travayer servis piblik. Pou napa logmantasyon dan *allowance* pou *long service*. Mr Speaker ler nou dir napa, fodre ki napa i aplik pou nou tou. Pa zis en pe ki gannyen. Sa ti kapab espere akòz i pa en ka dirzans. Pep Seselwa pa kont zot logmantasyon. Me *timing* pa bon.

Laz pansyon pou sorti 63an pou ariv 65an. Eski nou'n byen

tenir an kont, sa ki nou apel *life expectancy*? Ki vedir an mwayenn, laz ki en imen i viv. E pou Sesel i apepre 73an. Fer sa kalkil 65an pou 73an. Konbyen nou ki pou viv ankor 8an pou zourir nou pansyon? Eski nou get byen kondisyon ki nou bann travayer pe travay ladan?

Mr Speaker sa fodre vremen, vremen revwar sa. Mr Speaker sa lasistans sosyal ki'n ganny koup dan en fason brital, pa pe fer lazistis nou bann dimoun. Si ti annan labi rode apre pran aksyon avek sa ki koupab. Me pa pini tou dimoun.

Mr Speaker, nivo lapovrete in vremen ogmante dan pei, in met lanmen lo pep Seselwa, sirtou sa group pli vilnerab, ki napa larzan pou aste komodite de baz, pa kapab fer de bout zwenn. E la mon pa war amelyorasyon dan sa group pou Bidze 2022. Lavi pou vin pli pir ankor.

Mr Speaker i vre ki an zeneral bann biznes pe fer progre, me bann ki pli pti pe rankontre plizyer difikilte dan konpetisyon. Zot anv i bouze me difikilte i ler pou ganny en *loan*. Eski sa nouvo fason fer ki'n ganny prezante pou amelyor sa sityasyon?

Mr Speaker, Minis in dir ki pri lavi pe amelyore, touris pe ogmante me mon pe demande akoz ki lo kote La Digue bann biznes pe ankor ganny toufe? Akoz ki tou keksoz i bezwen pli ser, konpare avek lezot zil kan nou ganny menm saler pou menm kalite travay? Nou pey menm kantite *tax* pour menm keksoz ?

Minis in dir, Ogmant reveni tourizm par met plis lanfaz pou annan plis servis ek prodwir ki ava ankouraz bann viziter pou depans plis dan lekonomi.

Mr Speaker larealite i pa zanmen parey. Fason fer pe dekouraz touris pou depanse, akoz zot pe ganny tro bokou vole dan bann servis ki zot resevwar.

Mon pou donn zis de legzanp bann defi anliny avek touris ki biznes La Digue pe fer fas avek.

PCR test i kout R2400 a R2500 par kliyan adilt etranze lo La Digue. Mahé pe kout R1700 ou mwens. Ki pe arive olye ki sa kliyan si oule 5 zour lo La Digue zot dir non mon fer 3 zour mon retourn Mahé pou 2 zour kot mon fer mon *test* ki mwen ser. La ki arive biznes La Digue i perdi.

Mr Speaker en lot defi se ki bokou kliyan i konplent pri

bato pou ariv La Digue ki kout R900 a R1200 depandan lo pri Dolar. Alor zot prefere reste lo Mahé e depans tou zot larzan Mahé. Me nou anvi konnen akoz sa gran disparite dan pri?

Mr Speaker, mon demande ki Minis i travay avek sa bann propriyeter prive, pou ki propriyeter biznes Digwa ava ganny en par dan sa Bidze 2022, e non pa vwar zot ganny kit deryer akoz sa bann difikilte vol pe dekouraz bann kliyan.

Akoz si nou kontinyen lo menm semen, byento avek louvertir *Airport* pei vwazen, nou bann kliyan pou pran en nouvo destinasyon. Pa zis La Digue ki pou perdi me Sesel an zeneral.

Mr Speaker mon rekonnet ki i annan en rediksyon R17 milyon 122 mil dan alokasyon Bidze pour Minister ledikasyon.

Pou mwan sa rediksyon pe kree dout oubyen sispans dan lespri bokou dimoun, sirtou paran akoz la dan sa letan *COVID-19*, sa Minister pe fer fas avek sityasyon pli difisil ki zanmen in deza eksperyanse.

Olye koupe, sa Bidze ti'n devret ganny ogmante par sa menm sonm ou plis ki'n ganny koupe. Nou pa bezwen al lwen pou vwar sa rezondet.

Si Minis i realis dan son panse ek aksyon, i ti pou

demann logmantasyon dan sa Bidze pour Minister ledikasyon. I annan bokou defi deor pou fer fas avek.

Me mon demann Minister, pou adres bann defi ki bann ansennyan pe fer fas avek sirtou bann lo La Digue ek Praslin. Nou oule vwar inovasyon dan sistenm ledikasyon, alor ogmant sa Bidze pou kapab realize.

Mr Speaker mon pou nonm enn de defi ki bann lekol pe fer fas avek ki sa koupir larzan ti pou kapab ede.

Par egzamp administrasyon lekol pa kapab akonpli zot misyon e anmenn inovasyon akoz mank finansman.

Ansennyan Praslin, La Digue pe ganny restrikte dan zot mouvman pou deplase pou travay ofisyel, akoz mank larzan. Sa i fer ki nou bann ansennyan pa vin azour avek sanzman e nou zelev i ganny kit deryer. Me nou oule vwar rezilta. Mon'n deza koz lo la e la mon pou demann ankor pou ki sa size deplasman ki vreman itil par bann ansennyan, i vin en kopo esansyel ki ganny kouper dan Bidze Ledikasyon toulezan.

Plizyer zelev pe ganny kit deryer, akoz mank fasilite teknolozi kot lekol, ansennyan i ganny difikilte pou prepar

travay ekstra pou zelev anmenn dan lakour.

Ler nou get nou bann zelev ki pa pe ganny goute, ou menm en repa so 11er aköz rezon finansyer. Eski morso sa larzan koupe pa ti pou'n ede pou fer en ladiferans dan lavi sa zelev kot lekol?

Mr Speaker en total R3.3 milyon pe ganny bidzete e R11.6milyon an 2022 anba Bidze Lapolis pou renovasyon stasyon Lapolis Santral e en nouvo stasyon lapolis La Digue respektivman.

Mr Speaker dan sa Bidze Minis in koz zis lo nouvo Stasyon Lapolis La Digue. Me *staff welfare*, mankman *staff* pa'n ganny aborde. *Staff* pa kapab delivre, *staff* i ganny transfer, me pa ganny ranplase. Ki mannyer ki zot oule ki sa bann Lapolis pou delivre ler zot *overwork* e zot *welfare* pa pe ganny pran an kont?

Sa problemn osi pe ariv kot SFRSA La Digue, zot in ganny promet bokou me la problemn pe defons plafon e nanryen pa pe ganny adrese.

Problemn mankman finans i pli gran retard ki pe anpes zot al vizit zot fanmir lo Mahé. Zot akomodasyon i deplorab. Fodre ki nou tret tou travayer parey. Sirtou ki zot in sakrifye zot lakour zot fanmir pou vin ede lo

zil. Ler zot pou demande anvoy lavwa for zot pou ganny pouse.

Mr Speaker, me dan Komite *Stage Minis* pou bezwen petet eksplik nou ki pe arive, aköz nenport ki landrwa ki ou travay ou annan menm drwa e bezwen ganny kouver parey tou lezot travayer?

Mr Speaker, tou sa bann problemn ki sa bann travayer lo sa de zil ki rankontre ti pou ede par Onorab Gill, pou ganny en reprezantan lo serten Komite pou donn plis lavwa lo nou zil ti ganny demande dan nou Lasanble. Me ti ganny rezete. I pa enportan pou sa Gouvernman.

Me i annan lenportans pou nou lo zil. Tou sa ki bon zot pa oule. Pa bezwen dir ki nou deza annan reprezantan lo zil. Sa bann dimoun ki'n ganny apwente zot annan zot misyon spesyal pou desarze. Fodre pa konfiz Seselwa lo la.

Mr Speaker, sa group zenn ki pli enportan dan pei, pa'n ganny mansyonnen. Me se zot ki nou pei pe depan lo la pou pran larelev. Eski i vedir ki sa Bidze 2022 napa nanryen pou zot? Apre tou sa bann sikse ki nou bann zenn in fer dan diferan domenn? Eski sa Gouvernman i oule *fail* sa group zenn la deor?

Minis dan ou repons mon demande pou eksplik nou ki pe arive avek nou bann zenn? Kote ki zot sitye dan sa Bidze?

Mr Speaker fodre ki pep Seselwa i tenir kont ki bokou bann proze parey lakaz, semen drenaz, ki sa Gouvernman pe koup riban pe pran kredi lo la, ozordi, i travay dir Gouvernman US.

Lo La Digue bann proze i selman bann kontinyasyon travay US. Napa nanryen nouvo. Nou dan US nou fyer nou bann lakonplisman.

Mr Speaker dan sa bann nouvo mezir ki sa Bidze pe propoze, mon demande ki lanfaz i ava ganny mete lo latransparans, e rann kont, san annan koripsyon ki pep Seselwa a war dan son nouvo Gouvernman LDS.

Mr Speaker pou terminen, mon demande ki sa nouvo Gouvernman i asire ki sa Bidze i pou tou Seselwa, san get klas, ou afilyasyon politik e respe pou tou sirtou ler Seselwa i annan divers lopinyon e ganny pran ki ou kont sa Gouvernman. Non nou annan divers lopinyon. E rezilta parfwa i ganny ki sa bann dimoun i ganny fer *redundant*.

Mon demann sa Gouvernman pou fer Sesel vin

vreman pou tou son zanfan san eksepsyon.

Frer, ser Seselwa, menm ki i annan zis 10 Manm US dan Lasanble ki pe reprezant zot, nou pou touzour lager pour zot drwa. Nou pa pou zanmen bes lebra, bann kritik i fer nou vin pli for pour fer pli byen. Nou reste *firm* dan nou konviksyon, nou lalit pou touzour kontinyen. Mersi Mr. Spiker.

(APPLAUSE)

MR SPEAKER

Mersi Onorab. Onorab John Hoareau.

HON JOHN HOAREAU

Mersi Mr Speaker. Bonn apre midi Minis, bonn apre midi Mr Speaker, e tou dimoun a lekout.

Mr Speaker, i en gran loner pou mwan donn mon repons lo diskour Bidze pou lannen 2022. Sirtou aköz sa Bidze i premye Bidze ki'n ganny konsevwar par ladministrasyon LDS, apre sa gran viktwar le 24 Oktob 2020 kot pep Seselwa ti fer en swa kler.

Pep Seselwa ti rezet en rezim ki ti ankre dan la koripsyon, e ki ti pe mentenir pouvwar atraver lafreyer lo son pep ki ti'n divize ant 'ek nou pa ek nou.'

Mr Speaker sa Bidze i enn ki'n ganny prepare avek bokou prekosyon, bokou refleksyon e bokou klervwayans pou pav en semen ki pou redres nou lekonomi.

Ti pou fasil pou Minis vin avek en ladres Bidze kot i promet bokou e fer en politik bon marse. Minis ti kapab vin zwe vyolon dan nou zorey, oubyen dir nou sa ki nou anvi tande. Me sa ti pou iresponsab.

Minis pa'n fer sa. In vin avek en Bidze byen kalkile. Enn ki pran kont difikilte ekonomik koze par pandemik *COVID-19*.

Enn ki pe met an plas ban striktir lekonomi byen fonde, ki pou aport nou pep bokou fri dan bann lannen ki pe vini.

Dan en lot mo, i pe met tou zengredyen ansanm pou kwi sa gato dan lannen 2022. E ansanm nou ava kapab benefisyen en morso 2023.

Se pou sela ki nou bezwen annan en pe pasyans pou sa lannen. Parey Minis in fer resorti, nou'n sorti dan *intensive care* me nou ankor lo *ward*. Nou pa ankor geri konpletman.

Mr Speaker, en program vaksinasyon lamas e reouvertir nou *Airport* in permet lakantite viziter ogmante, sorti 7000 pou premye twa mwan 2021 pou vin

134 mil a lafen Oktob. Avek nou lekonomi ki'n konmans rekipere in fer plis ki \$366 milyon rantre dan nou sistenm banker.

Ki sa i vedir pou dimoun dan mon distrik? Pou sa 15 vander ki desanm borlanmer pou met zot latant kot sit bazar labrin e vann zot prodwi artizanal i vedir manze lo latab pou zot fanmir.

Pou sa bann travayer lotel *Savoy, Coral Strand* ki ti pe ganny lanmwatye saler o konmansman lannen i vedir en lapey plen an plis ki sa, en benefis *service charge* tou le mwan.

Pou bann ti letablisman touristik e restoran parey kot *guest house* Mrs Moustache labati, kot *Jessie's guest house* dan Beau Vallon santral, kot restoran *Boat House*, kot *Cocktail Bar Beach Shack*, kot *Baobab Pizzeria*, biznes in rebran avek e viger ekstraordiner. Tou sa bann landrwa i donn lanplwa Seselwa e pey *tax* pou pei fonksyonnen.

Bann *tour operators, driver taxi*, e bann ki ofer ekskirsyon in re antre dan biznes.

Mr Speaker se sa ki Prezidan Ramkalawan avek sa gouvernman *LDS* in sanze ler in vin o pouvwar.

Pou bann ki pa vwar sanzman ouver zot lizye en pe. Parkont si *US* ki ti pe gouvernen, sa pei ti pou ankor fermen, Seselwa pa ti pou'n garanti en lapey tou le mwan parey Minis Loustau-Lalanne ti averti Lasanble avan son depar. Tre probab, nou ti pou bezwen pe viv lo lasarite enternasyonal.

Mr Speaker, malgre lannen prosen pou napa bokou lakaz ki pou ganny konstri e pou napa logmantasyon lapey.

Mon konvenki ki nou pep pou konpran ki lo size lakaz, negosyasyon avek Gouvernman *L'Inde* i ankor pe kontinyen pou en *Grant* pou 3000 lakaz.

Nou bann dirizan i touzour reste pridan pou fer bann negosyasyon ki bon e ki met lentere e souverente Sesel avan tou.

Lo size logmantasyon lapey e trezyenm mwan saler, mon konvenki ki nou pep pou konpran, ki ler nou pret larzan parey nou'n prete avek *IMF*, nou pa kapab depans an bonnavini e sirtou konmans ogmant saler. Nou loblighasyon se pou fer sir ki tou travayer dan Gouvernman i ganny o mwen en saler sak lafen dimwan.

I parey dan ou lakour ler ou'n bite e ou demann en pti *loan* pou fer debout zwen. Ou pa komans depans an fou me

ou aste komodite ki pli enportan pou ou viv. Ou pa pran sa menm larzan pou al en konze *Dubai*. O kontrer, ou gete ki fason ou pou tenir sa pti kas ek sou pou fer ariv lot lafen dimwan prosen.

Mr Speaker, se sa kalite refleksyon ki nou anvi nou pep i fer, pou konpran sityasyon reel nou pei.

Mon bann frer, Souvandfwa granmoun i dir pasyans i geri lagal. Pa les bann fo profet e bann politisyen iresponsab bat zot latet.

Bann ki le fer krwar, ki zis ek zot labous zot kapab plati tou sa montanny, e fer isi, e fer laba kan zot ler zot ti o pouvwar zot ti zis ranpli zot pos e anbelir zot lekor.

Sa menm group dimoun ki lepep an gran mazorite ti rezet zot prensip le 24 Oktob 2020, ozordi zot pare pou abes dignite nou bann frer ki annan problem sibstans e dir zot al kriye o bor Lorloz ki zot lafen. Apre don zot R300 pou al rod en laliny. Sa pou mwan i politik degoutan.

Ozordi i annan travay pou tou dimoun ki le travay menm si petet i pa ou swa prefere. Sak ki lafen i bezwen leve al travay.

Apre tou Labib i dir i fer nou rapel ki ler ou ed ou lekor, Bondye i ava ed ou.

Mr Speaker, linite parmi nou pep i lakle pou nou sikse. Nou sanse pou viv dan enn parmi bann pli zoli zil o *monde* parey nou Preamble nou Konstitisyon i fer nou mazin. I nepli letan pou polarize.

Se selman ler nou travay ver menm lobzektif ki nou pou kapab reisir. Fodre nou pa zanmen oublie ki lafors en tim i pli for ki lafors en zwer. En zwer pa fer en tim.

Pou nou lekonomi ki ankor tre frazil revin lo menm nivo par raport avek 2019, i enportan ki nou pa vid delo bwi lo nou pye diri.

Mr Speaker, malerezman ler Lopoziyon i esey kree enstabilite atraver protestasyon par en group dimoun ki pe konsonm lalkol dan lavil, i fer touris per e krwar ki zot pa an sekirite dan nou lavil.

Ler nou vwar aktivis sa parti i konpromi dan lesey pou met bonm lo stasyon petrol Grand Anse, i fer nou pep per. E fer nou demande ki pe arive avek nou kolizyon sosyal ki ti egziste. En lafyerte Kreol ki nou'n zouir ler *LDS* ti dan Lopoziyon.

Sa ki ensit vyolans e menas nou bann dirizan, sa ki vol touris e mem pran larzan touris lo fo preteks i fer bokou ditor repitasyon sa nou pei. E

sa i annan potansyel pou tap nou lekonomi tre for e fer nou retourn ayer.

Dan mon distrik nou pa'n ganny eparnye. Gouvernman in azir avek bonnfwa pou permet bann ki annan en pe fri e koko pou met en latab o bor lans e vann avek touris pou ganny en dipen.

Me ki nou vwar arive? En koko i ganny vann R200, labour koko i ganny kit lanmenm ater partou kote, lager drog devan kliyan, zot ensilte touris si pa aste zot koko. E menm zot griy pwason ek fiyapen pou vann ek touris dan fey vouloutye san pran kont okenn prensip lasante e lizyenn.

Ler Lotorite Distrik i sey met zot en rezon, zot ensilte. Mr Speaker si nou lafors Lapolis pa pran ka avek sa bann fouter dezord, tou sa zefor ki Gouvernman pe fer pou refer nou lekonomi debout pa pou abouti.

Mr Speaker mon tre rekonforte, pou tande ki avek sa Bidze 1.03 bilyon ki Sekter Ledikasyon in gannyen pou permet annan en revolisyon ver ledikasyon finansyel, biznes e nimerik.

Souvandfwa dan Ledikasyon konman en edikater ou poz sa kekyon filozofik ki rol prensipal en Sistenm

Ledikasyon ki en Gouvernman i vin avek?

Atraver sa Bidze nou'n vwar klerman ki larepons sa kestyon. Larepons se pou prodwi sitwayen ki pou kapab diriz sa sosyete ver sa desten ki LDS in vizyonnen dan son manifesto.

En sosyete demokratik, kot konesans finansyel, biznes, teknolojik e nimerik i pous nou ver modernizasyon e devlopman soutenab.

San gran depozit materyo brit, prenon kont ki tourizm i en lendistri frazil e resours pwason i kapab fini si nou pa fer atansyon, pa reste nou gran swa.

Vizyon nou Prezidan, se ki devlopman nou kapital imen e lendistri servis i pou bezwen vin sa lafors pli for dan lekonomi nou pei dan lefitir.

Mr Speaker, menm si i reste bokou travay pou fer pou lev nivo disiplin e standar dan nou bann lekol, mon konvenki mon kontan pou vwar ki Minis Ledikasyon i reste angaze pou promouvwar en sistenm ledikasyon kot bann lekol i vin otononm.

Atraver bann deba dan nou Lasanble, Minister ledikasyon in promet pou garanti tou sipor posibilite, pou permet bann lekol pran bokou

linisyativ pou lev kalite ledikasyon.

Solisyon pou bezwen sorti dan lekol li menm. Sa nouvo stratezi pou permet tou zanfan epanouir, e ranplas bokou bann travayer etranze ki pe konsonm bokou sa deviz ki rantre dan nou lekonomi.

Sa transformasyon pou met Sesel lo map lemondan dan la menm fason ki *Singapore* ti bouze, sorti konman en lekonomi rural pou vin en lekonomi avanse e modern.

Sa i vedir ki mon zanfan, ou zanfan pou nepli war drog e lalkol konman en solisyon pou zot probleman. Sa gro nyaz nwar pou fannen e nou zanfan pou reganny zot rev.

Lavenir pou ofer zot en nouvo lorizon avek bokou loportinite. Parey prezidan i toultan kontan dir '*the sky will be the limit*'. Nou pou donn zot tou loportinite me set a zot servi sa bann loportinite byen.

Sa zenerasyon ki fer gran lake devan bis *methadone* e ki'n vin vyeyar menm avan zot vin zenn pou reste zis en memwar dan lepok governans *SPPF/US*.

Mr Speaker, nou bezwen salye zefor kontinyel ki nou Lapolis ek nou *Coast Guard* pe fer pou kontrol lenportasyon drog par bann eskobar.

Avek en Bidze R11milyon pou renovasyon bann fasilite sportif ki Gouvernman *US* in les dan abandon. Gouvernman formen par *LDS* pe montre son langazman ver devlopman sport ek lazenes.

Mr Speaker nou Lazenes ti'n ganny oublie. Dan Gouvernman presedan zot ti ganny lenportans zis avan Eleksyon. Zot tou, zot ti ganny en pti *call* ki dir zot "Msye Faure in anvoy mon *call* ou pou demann ou si ou pou donn li en sipor?"

LDS i valoriz bann zenn. Devlopman e renovasyon bann fasilite sport dan distrik konman lo nivo nasyonal, se laprev langazman nou Gouvernman.

Fodre ki bann zenn i sezi loportinite pou viv en lavi sen e aktif. Zot devret war spor konman en lwazir e en sours lafyerte pou devlop zot o maksimonm e menm reprezant nou pei aletranze.

Pou bann ki deza pe fer li mon oule dir zot felisitasyon. Pou bann ki pe mazine pou pran sport serye, mon donn zot mon lankourazman.

Pou bann ki lo sibstans mon pe dir zot i pa ankor tro tar, swazir spor.

Pou bann ki ti ava kontan konmans demars pou ouver en

klib sportif, ankor mon pou envit zot pou vin kot ladministrasyon distrik e nou ava gete ki fason nou kapab asiste zot.

An tou 1.53 bilyon pou al anver lenvestisman kapital. Sa i reprezant 0.5 pousan an plis ki lannen pase par rapor avek nou *GDP*.

Avek sa larzan nou pou vwar en nouvo Lopital *State of the Art La Digue*. Ki pou benefisyé tou zabitan La Digue enkli viziter lo sa zil malgre ki son *MNA* ki sorti dan Parti *US* ti organiz petisyon pou *boycott* sa. In fer sa senpleman aköz 43an ki *US* in promet La Digue en lopital me zanmen in delivre.

Ler *LDS* i delivre sa zis dan en lannen i kanmi e i pa konnen ki i pou fer. Mon konvenki ki zabitan La Digue pa pou bliy son petisyon an 2025.

Mr Speaker, sa larzan pou osi fer lezot devlopman ki enkli en sant reabilitasyon, fasilite bazar dan plizyer distrik, *ice plant* pou peser e fasilite Por Praslin.

En ler ou a krwar ki *LDS* in vin sinonim avek les devlopman Sesel.

Se sa ki kalite sikse ki grat bann dirizan *US* e fer zot azite parey demon dan dife.

Mr Speaker, dezormen avek Lazans Lenfrastriktir, ki

nou pas son *Bill* tou resaman, Gouvernman pou fer sir ki tou son proze i ganny realize. An plis ki sa, sa Lazans pou fer sir ki tou bann batiman Gouvernman i ganny byen mentenir.

Rol sa Lazans i vreman enportan aköz souvandfwa Gouvernman i bezwen depans bokou plis larzan pou renovasyon ler bokou lenfrastruktir i delapide san mentenans.

Mr Speaker, mon oule osi akey lanons Minis, kot in deklare ki diskisyon pe ganny fer avek lakonpanyen *VISA* pou redwir komisyon lo tranzaksyon kart *visa* ki labank i donn son kliyan.

Sa pou fer ki ban *bank charges* i ava osi redwir. An dizan sa mon oule osi propoze ki Labank Santral i get dan posibilite pou annan en platform lokal ki kapab *interface* avek tou bann labank lokal pou tranzaksyon kart. Si sa i vin posibil *visa card* i ava ganny servi zis pou tranzaksyon enternasyonal. Sa i ava redwir plis larzan ki ganny peye avek sa lakonpanyen.

An fezan sa, en lakonpanyen lokal ki kapab donn sa servis i ava osi benefisye tandis ki lekonomi i

ava vwar en bes dan *foreign exchange outflow*.

Mr Speaker, avek ogmantasyon dan lakantite vol e pasaze ki servi *Airport* e avek zefor pou anmenn plis lefikasite lo servis ki Ladwann i fer, bokou dimoun pe demande ki en fasilite kot ou kapab fer en *bill of entry* dan larive *Airport* e pey lanmenm i nesaser. Sirtou letan en pasaze i debarke avek en sirplis bagaz ki son *travel allowance* i permet.

An se moman, pasaze i bezwen kit son bagaz an plis lo *Airport* e al fer son dokimantasyon Victoria. Sa i pran ankor en semenn avan i kapab reganny son bagaz.

Ansyen Minis Finans, Dr. Larose ti toultan fer nou konpran ki perdi letan i kree lenflasyon.

Mr Speaker malgre sa Bidze i enn ki pe met an plas bann fondasyon olye aprouv nouvo depans lo nouvo proze, mon fyer ki zabitan Beau Vallon pa'n ganny oublie. En nouvo bazar avek *SFA* pou ganny konstri. Dezormen, sa i ava fer ki pou annan pli bon servis e lizyenn kot pwason e posibleman legim i ava ganny vann.

Mon konnen ki bokou kestyon pou ganny demande lo size devlopman Bazar Labrin e

proze flat Pascal Vilaz, vi ki naryen pan ganny anonse lo sa Bidze dan sa Bidze. Mon le donn mon garanti ki Minister ki responsab pou Lantreprenarya e Minister pou Lenfrastriktir, pe travay ansanm pou met devan en plan pou sa landrwa.

Model devlopman i pou enn ki Gouvernman e sekter prive pou kolabore. Alor mon pe zis demann zot pou pran en pe plis pasyans ziska sa travay i ava akonplir.

Mr Speaker, pri komodite e pri lavi i en size ki tous tou dimoun. Apre tou, ris ou pov, nou tou nou antre dan menm magazen.

Malgre bokou zefor e desizyon enportan ki Gouvernman inn pran tel ki met an plas en *flat tax rate* 15poursan lo profi ziska 1milyon e 25poursan lo profi par lao 1milyon, don *amnesty* lo sirsarz bann biznes ki dwa SRC, stabiliz pri Dolar lo en to R15, pri bokou komodite e servis i reste o.

I vre ki pri konntener, *fuel* e transportasyon in ogmante, me marsan i bezwen rezonnab lo lafason ki i fer profi lo kliyan.

I malere ki bokou fwa, bann kou ekstra i zis ganny pase lo kliyan tandis ki marsan i kontinyen fer en kantite profi *business as usual*.

I vre ki napa personn ki kapab regle zot pri, aköz nou dan en marse lib. Me zot devret annan en remord konsyans pou lakominote ki zot pe servi. Mon mesaz pou zot se ler letan i bon nou tou nou benefisye me ler zafer pa tro bon annou pa touye.

Mr Speaker, Minis in osi fer resorti dan son ladres ki avek lentrodiksyon (RRP) par STC in kree stabilite dan pri serten komodite. In osi anonse ki in annan en rediksyon 7poursan lo komodite esansyel dan *class 1*. Sa i montre ki STC i pli serye e pe zwe son rol konman sa laboutik ki pe fer sir ki Seselwa i ganny bann prodwi de baz a en pri afordab.

Parkont Mr Speaker mon krwar ki ler STC i rekonsilye son kont a lafen lannen, si in fer serten profi get dan posibilite pou ogmant lakantite lartik ki tonm dan *class 1*. Vedir bann komodite ki ganny sibvansyonnen.

Sa i ava anmenn en benefis direk pou konsonmater. Sa re balansman i nesese sirtou dan bann letan ki napa ogmantasyon lapey.

Pri delo ek elektrik i reste tre ser e pou nou pep e i tap tre for lo Bidze lafanmir.

Mon krwar ki in plis ki ler pou annan en rekomandasyon

Planning ki fer li mandatwar pou tou nouvo lakaz annan en pano fotovoltaik e en basin pou anmas delo lapli.

Si mon rev i vin en realite. Sa i ava ede pou koup kou litilite domestik, redwir nou *carbon footprint*, diminyen lenpak lo sanzman klima, redwir nou depandans lo *fossil fuel*, redwir depans deviz etranzer, osi met Sesel pli o ankor lo *podium* enternasyonal koman pei ki'n fer plis mezir drastik pou sov nou plannet later.

Mr Speaker, menm si napa ogmantasyon dan lapey sa lannen, Minis Finans avek *DPA* in konmans en legzersis pou revwar bann striktir saler e koriz bokou bann disparite ek fot. Sa pou permet dimoun ki pe ganny *allowance* pou dezormen war sa *allowance* vin en parti son saler.

Mon bann frer sa pou donn zot en lavantaz ler zot pe al demann en *loan* ek labank. Zot saler pou vin pli o e zot pou kapab ganny akse avek plis finans.

Mr Speaker, pou konklir, mon pou eksprim mon sipor pou sa Bidze aköz mon konnen ki sa Bidze pou permet Gouvernman etabli labaz son transformasyon. En transformasyon ekonomik e

politik ki pran kont laspe devlopman Kapital imen atraver lanfaz lo ledikasyon finansyel, teknolojik, biznes e nimerik.

En transformasyon ver modernizasyon. En vizyon ki *LDS* i annan pou Sesel.

Sa Bidze pou osi permet lepanouisman nou pep, konsolid travay ki *LDS* in konmans pou angaz e responsabiliz nou pep.

I pe met an plas tou bann mayon enportan enkli bann Lalwa ki pou permet devlopman soutenab e lagrandisman nou lekonomi. Mr Speaker, nou pa'n pran governans dan en letan ideal.

Wi, i annan bokou keksoz pou aranze e bokou keksoz pou met annord. Nou pep i bezwen realis avek zot lekspektasyon. Nou zis annan lan dan en manda 5an.

Rome was not build in one day! Mon konvenki ki sa gato ki pe ganny kwi pou anmenn bokou dan lefitir. Me san linite nou pa pou reisi. Ser zanmi, annou pa ekout fo profet ki oule diviz nou.

Nou pe viv dan en sel Sesel, en pti pei beni avek en kiltir metisaz. Annou met Sesel avan tou e tenir kont bann lafors ki reini nou e fer nou fyer konman en Seselwa. Mersi

(APPLAUSE)

MR SPEAKER

Mersi Onorab. Onorab mon pou fer en pti komanter lo ou diskour, ou ti fer en referans mon krwar avek *MNA* La Digue, an dizan ki i ti kont konstriksyon Lopital.

Dan son labsans mon pe zis met en pti remark lo la poudir mon rapel ti annan en zafer petisyon lo ranplasman ki Lopital pou ete. Alor mon krwar i pa totalman fer poudir i ti kont konstriksyon Lopital. Mon eklersi sa pou zabitan La Digue dan son soz. Mersi bokou, si mon pa'n mal enterpret ou parol. Mersi.

HON JOHN HOAREAU

Mersi Mr Speaker pou sa pti leklersisman.

MR SPEAKER

Mersi. Wi i pli bon ou pa enteronpe. Nou ava fer li koumsa. E annou zis kontinyen evite lakizasyon personnel mon krwar sa i pas tre byen. Ler zot fer zot pwen i sorti byen san sa pti ensilt adisyonnèl oubyen lakizasyon adisyonnèl. Mersi nou ava pas lo Onorab Naddy Zialor.

HON NADDY ZIALOR

Mersi Mr Speaker. Mr Speaker, Minis, Manm Onorab, frer ek ser Lepep Seselwa bonn apre midi.

Ozordi i ava fer mon dezyenm Bidze ki mon adres isi dan sa Lasanble *right of reply*, konman en sitwayen Seselwa. E konman en Manm ki pe asiz lo en sit proporsyonnel dan Lasanble Nasyonal Sesel.

Pou mwan, mon pe regard sa Bidze pou 2022 konman e premye Bidze pou nou Gouvernman.

Mr Speaker, mon konpran. Mon konpran ki politik popilis i tre fasil isi. mon konpran ki sitan fasil pou nou asiz dan en kwen e fer kritik me pa donn okenn rekomandasyon. Nou pe zis priye pou ki i annan destriksyon e dezaz.

Me mon osi konpran ki apre ki mon'n ekout Minis Vandredi le 12 Novanm, mon vwar en Bidze ki'n non selman pe met en fondasyon. E en rekonstriksyon pou ki nou kapab konsolid nou pei.

Me mon vwar en Bidze ki baze lo nou bezwen e non pa lo sa ki Sesel i anvi.

Mon vwar sa Bidze konman en Bidze ki pe anmenn nou ver realite 2022. Ler Minis atraver ou Mr Speaker i dir ki nou sorti dan *ICU* e nou ganny

transfer lo *ward*, nou'n rekipere me nou pa ankor geri.

Sa i senpleman par lefe ki nou pe demann prete larzan ki nou napa pou nou kapab depanse. E nou depans mon repete. Nou depans i merit baze lo sa ki nou bezwen. Me parkont, zour ki nou ganny desarze dan lopital, e la dokter i ava deklar nou konman nou'n ganny geri la nou ava depans lo sa ki nou anvi dan en fason responsab.

Minis in soumet devan nou Lasanble en Bidze ki pou asire ki Gouvernman i zwenn son bann target e merit. E la pandan ki serten i kontinyen fer politik popilis, pou kontinyen sa politik popilis nou konnen, ki pou kontinyen ganny verse dan tou form otour sa 5an. Akoz dapre zot Seselwa in ganny anbete.

Me nou dan *LDS* mon repete, nou dan *LDS* nou reste *focus* e nou reste konman en travayer ki pou kontinyen anmenn Sesel lo sa lot nivo, me pli enportan lo son lipye. I tris nou pa kapab kontinyelman pe demann avek travayer Seselwa e travayer servis piblik pou kontinyelman fer politik dan letan travay, pandan ki Seselwa li i pe egziz en meyer servis.

Sa ki enportan se ki letan ki nou tann dir napa, pa'n

gannyen, nou lafen, napa travay, servis piblik travayer pe ganny viktimize. Nou Gouvernman nou'n menm ganny dir restriktirasyon i annan ki'n ganny pouse.

Me nou Gouvernman in fer sir ki tou travayer dan servis piblik i garanti en saler pou lannen 2022.

En sonm R3.10bilyon in ganny mete dan Bidze lannen prosenn pou garanti saler tou travayer dan servis piblik. Sel keksoz sel keksoz ki Seselwa pe demande, ki servis piblik i delivre e i travay dan lentere Sesel.

Mr Speaker, souvandfwa dan mon bann deliberasyon mon'n toultan dir ki progre en pei i ganny mezire lo lendepandans e lepanouisman son pep.

Fer nou pep vin depandans lo *welfare* pa vedit progre. Gouvernman i reste konvenki ki nou kapab tir nou pep lo depandans *welfare* e fer li vin endepandan. Nou *focus*, se asiste bann dimoun ki merite.

E la mon anvi redir ankor avek Lepep Seselwa baze lo ladres Minis, ki dan Bidze 2022 en total R1.44bilyon in al pou Lazans Proteksyon Sosyal. Sa pou kouver benefis retret benefis dezabilite, envalidite,

home carer. Sa safety net ki souvandfwa ganny koz lo la.

Mr Speaker sa ki nou, nou pe dir se ki sa ki merite pa pou ganny kit deryer. Nou reste *focus*, dan redinamiz nou Sistenm Ledikasyon annefe apre midi mon rekonforte pou mon vwar ki LDS i en Gouvernman ki krwar senserman dan *inclusivity*.

Atraver ou Mr Speaker, Minis i avek bokou optimizm ki mon'n akeyir lanons ki Minister Ledikasyon pe regard dan posibilite pou modifye fasilite dan omwen enn oubyen de lekol, ki ava kapab konmans resevwar bann etidyan ki otreman kapab.

Lanons ki Minister Ledikasyon in deza enkorpor lekol pou bann dimoun ki annan problem tande dan son portfolyo, e ki demars pe ganny fer, pou osi enkli bann zanfan otizm, sa Mr Speaker i montre mon ki Gouvernman LDS i krwar dan legalite loportinite.

Have been said that, mon anvi azoute, ki i annan en nesesite pou annan en revizyon dan *curriculum* lekol, pou met li azour avek realite ozordi. E pou ki i ava en lenvestisman lonterm kot mon panse sa i ava redwir depandans lo travayer etranze a lavenir. Si letan nou

pe fer *curriculum* nou osi regard *market* demand.

Mr Speaker mon profit sa lokazyon pou mwan lans en lapel avek tou etidyan, tou paran, tou kominoter an antye pou ki annou pa zis regard Ledikasyon konmsi ki ou zis rantre e ou sorti, me regard li konman en lenvestisman.

Alors dan sa ka fodre pa nou bliye, ki i annan R1.03 bilyon ki'n ganny mete dan Bidze Minister Ledikasyon. E sa i senpleman en moman pou nou dir avek nou sistenm Ledikasyon, ki nou bezwen annan rezilta Mr Speaker.

Depi o konmansman ki mon'n form parti Linyon Demokratik Seselwa, mon'n toultan dir ki mon krwar dan en kominote i ganny *empower* avek resours, pou ki i tous tou dimoun a la baz. E nou fer sa pou ki anmenn en diferans dan lavi sa bann dimoun.

Malgre tou politik popilis, ozordi mon anvi salye Departman Kominoter pou sa transformasyon remarkab ki'n ganny anmennen dan tou distrik dan Sesel.

Minister Gouvernman Lokal e Zafer Kominoter, pe ganny alokasyon R20milyon pou bann pti proze kominoter konpare avek R10milyon ki ti dan Bidze 2021.

E la mon anvi lans en lapel avek ou ki swa ou reste dan distrik Grand Anse Mahé, Port Glaud, Beau Vallon, La Digue, Silhouette, Grand Anse Praslin ou menm Baie Sainte Anne. Zis 2022, vin sa lannen kot tou dimoun i angaze pou fer bouze zot kominote. Mon krwar dan devlopman e mon krwar ki nou kominote i reste sa lakle ki pou anmenn sa transformasyon.

Mr Speaker, ozordi nou pe vwar diferan lesey pou met otaz sekirite nou pei. Mon sezi sa loportinite, pou kondann sa tel aksyon, e la mon pa pou kapab fer mon lentervansyon san ki mon fer masyon pou Departman Lapolis. I en Departman Lapolis ki mon anvi tir mon sapo pou zot apre midi, parske Seselwa in vwar en transformasyon dan lafason ki zot *operate* e rezilta ki zot pe anmennen malgre tou defi.

Avek renovasyon kot Stasyon Lapolis Santral e renovasyon La Digue respektivman, sa i ava permet ki nou bann zofisye i ava travay dan en lanvironnman pli konvenab e konfor. Sa travay ki zot pe fer e reste en travay nob ek rezilta.

Mon pa pou kapab delivre en repons Bidze san ki mon fer resorti sa travay formidab ki Departman *Foreign Affairs* e

Tourizm, pe fer pou zot in anmenn plis ki 133mil viziter Sesel. En pti pe plis ki \$300 milyon i pas dan nou sistenm banker sa Mr Speaker, in ed nou pou sorti dan *ICU* pou nou ariv lo *ward*.

Malgre sa i annan serten ki vwar politik popilis pou fer avek. Parkont depi ler mon'n antre dan sa Lasanble, lanplwa in en size ki toultan ganny politize isi dan sa Lasanble.

Me lanplwa i reste sa lakle ki si vreman nou anvi donn nou pep son lendependans nou bezwen kontinyen fer lenvestisman.

Zis apre ki Minis ti'n delivre son diskour Vandredi parey mon labitid depi ki mon'n pran en sez proporsyonnel mon reste konekte avek bann Departman e Lazans, mon ti ganny sans demann en group dimoun ki ti pe rantre dan en *Reskilling Programme* dan lenformasyon teknolozi.

E la ti annan zenn aze depi 17an e adilt aze 47an an montan. La mon'n vwar ki degre zot lantouzyazm ti annan lo zot figur. E sa mon anvi reasir zot, ki dan Bidze 2022, provizyon in ganny fer pou R5 milyon pou *Reskilling Programme*, e *My Job*.

Petet mon ava profit sa lokazyon pou mwan redir sa ki

mon ti dir avek sa group dimoun, letan mon ti vwar zot, avek Lepep Seselwa apre midi. Sa se ki i pa zanmen tro tar, pou nou reaprann e *reskill*. Nou tou nou bezwen parfwa readapte avek sityasyon otour nou e sa i enkli lanplwa.

I enportan ki Gouvernman i kontinyen met an plas bann mezir e adopte bann stratezi pou amelyor bann *skill* ki lekonomi i bezwen. Sa ti ou parol Minis. E pou sa ou ganny tou mon sipor.

Departman Lafanmir i en Departman ki pros o bor mon leker. In enn bann Minister ki'n annan bann sanzman signifikan. Annefe isi menm dan sa Lasanble mon'n ganny dir a plizyer repriz, lot kote latib konmkwa ki mon pa'n defann ase lentere bann dimoun ki pe viv avek dezabilite.

Senpleman pa tou dimoun ki adapte avek sanzman. Me mwan mon konnen ki mon'n travay sanses, pou mwan donn lanmen anmenn sa nouvo vizaz pou sa group dimoun isi Sesel.

Finalman pou annan en nouvo sant ki pou ganny met an plas kot vokasyonnel North East Point en keksoz ki nou'n espere pou plizyer lannen.

Resaman in annan lamannman dan Lalwa tel

konman *Physical Planning Bill*. E sa mon ti ganny sipor *LDS*. Selman *LDS* lo sa kote latib pou ki vreman nou anmenn sa transformasyon.

Exemption dan *tax* pou bann lekipman *adaptive*, ki pe rantre dan pei pou sa group dimoun. Wi Mr Speaker mon'n menm fer li mon devwar pou mon al lo baz kominoter pou regarde ki diferans ansanm nou kapab fer dan lavi sa group dimoun.

Mon reste konvenki nou kapab kontinyen *empower* sa group dimoun pou zot kontinyelman rezouir nou drwa egal dan nou sosyete. Sa i reste mon misyon. E sa Departman pou ganny tou mon sipor.

I nepli tan pou nou kontinyen demande, *who moved my cheese?* Me plito adapte avek sanzman. Antisip sanzman. E fer sanzman. Vin sa sanzman. Pou nou kapab ariv ver sa Sesel ki nou anvi nou bezwen konmans en Sesel ki nou bezwen.

Pou konklir wi pou annan bann desizyon ki fran e for ki ti merit ganny pran yer me nou bezwen fer li ozordi. Sa Sesel ki nou ti bezwen oubyen ki nou bezwen i depan lo sakenn de nou.

Ankor enn fwa mon anvi reasir sa dimoun aze, ki ou

pansyon ek ou *carer* i garanti. Mon anvi asir sa dimoun ki dokter in sertifye ki i annan en problem medikal ouswa en dezabilite, ou benefis i garanti.

Mon anvi reasir sa travay servis piblik, Gouvernman pe fer tou provizyon pou revwar sistenm *tax* e striktir saler pou 2022 ou saler i garanti.

Bann proze mazer i reste priyorite dan Bidze 2022 Mr Speaker. E la plizyer proze pou benefis plizyer distrik. Parkont manda Prezidan Wavel Ramkalawan i pou 5an. Wi son manda i pou 5an. I annan ankor 3an pou nou anmenn sa bato e sa kaptenn pa pe drive.

Mon mesaz se les Wavel Ramkalawan travay. Sa bato pou arive dan Por Mr Speaker. Pep Seselwa pa les personn derout nou. Annou reste *focus* pou fer Sesel pli fyer ki yer. Tou nou sakrifis pou pe amenn nou ver meyer demen. Mwan ansanm avek ou, nou reste konvenki, ki nou demen pou pli kler ki ozordi. Mersi Mr Speaker.

(APPLAUSE)

MR SPEAKER

Mersi Onorab. Avek sa moman la nou ava pran en poz e nou ava rebran deba 4er.

(BREAK)

MR SPEAKER

Bon mon ava apel Onorab Conrade Gabriel pou son diskour.

HON CONRAD GABRIEL

Mersi Mr Speaker. Bonn apre midi zot tou. Bonn apre midi Minis. Bonn apre midi spesyal pou zabitan La Pointe Larue.

Dabor, Bidze li menm i anmenn plis lensertitid. I en Bidze ki napa gran keksoz pou soulaz soufrans sa pep pe pas ladan.

In *fail* pou adres sa sityasyon lapovrete kot ozordi nou vwar zenn koman vye pe mandyan pou rod en keksoz pou manze e pou donn zot zanfan.

Bokou keksoz dan sa Bidze i vize partikilyerman pou benefisyen en serten group dimoun dan nou popilasyon. Zot pe anrisi zot pos, agrandi zot biznes san pran kont bann ki pli vilnerab dan nou sosyete.

1an depi ler ki *LDS* in ganny elekte pou diriz nou pei, 1an. E en Bidze pli tar, sa ki nou pa pe vwar se realizasyon tou sa bann promes *LDS* in fer.

Promes ki zot ti fer avek plen konesans ki nou lekonomi i dan problem, ki nou pei ti pe

fer fas avek pli gran kriz dan listwar.

Zot in promet nou, me aprezan zot pa pe delivre. Le sel keksoz ki zot pe delivre lo la, se leskiz, leskiz, e ankor leskiz.

Mr Speaker, mon konmans koumsa aköz apre ladres Bidze, mon'n al anver mon zabitan pou ganny zot pwennvi.

Zenn koman vye pe eksprim zot mekontantman anver sa ladministrasyon LDS.

Minis in sey vin fer nou krwar lizour pou aswar, e manner sa Bidze in ganny prezante ou kapab dir bef dan disab sakenn vey son lizeye.

Tou lasistans in ganny bloke en sel kou. Nou kapab dir en vre sanzman Radikal.

Richard Quest ti dir "*Election comes with consequences*". Sa i vedit pei pa pou zanmen parey ankor toultan LDS i o pouvwar.

Leskiz ki zot servi, se ki zot Gouvernman i ankor pe donn lasistans sa ki dan bezwen, be koman MNA Point Larue, sa ki mon pe vwar dan distrik, i pa tonm annord avek sa ki zot pe dir.

Mon pa konnen si zot napa distrik, ouswa si zot prefere inyor ki sa bann zabitan pe dir la deor.

Me mon garanti zot ki keksoz pa bon. Dimoun pe soufer, nou bann frer ek ser pe sibir bann difikilte ki terib pou gete, e difisil pou ede. E sa ki pli rasker ankor se letan ki i annan zanfan dan milye sa soufrans.

Sa ki pe arive dan nou pei ozordi i pa byen, e pa devret arive. Apre lan, nou'n dekouver ki zot pe byen aranz zot, tandis ki lamazorite nou bann frer ek ser Seselwa pe trimouse pou fer de bout zwenn.

Sa bann promes pandan kanpanny eleksyon pa'n abouti dan naryen. I annan ki'n eksprim regre pou vot pou sa kalite Gouvernman, ki napa en sou konsiderasyon e santiman pou malere.

Mr Speaker, mon dir sa aköz laprev i la devan nou. Legzanp tipik se sa trezyenm mwan saler ki tou dimoun pe koz lo la.

Mr Speaker, Nwel ek lannen pe vini e sa ki'n travay dir i santi li dekonserte e vremen ankoler pou sa ta sakrifis ki zot in fer e finalman pa ganny naryen koman rekonpans.

Sa i fermal. E sa i pli fermal bann dimoun ki'n perdi zot pros atraver COVID-19. I

annan ki ti ankò zenn e ti pe kontribye kot lakour.

Mr Speaker, en Bidze plis ki R10 Bilyon ki anmenn avek li plis lensertitid e kree bokou konfizyon parmi nou popilasyon. E frer e ser Seselwa viv lo 'petet.'

Seselwa pa ti en Nasyon ki ti abitye viv lo 'petet'. Minis atraver ou Mr Speaker, nou bezwen onnet e koz laverite ek sa pe. Ki program *IMF* pe demann nou pou enplimante? Ki kantite nou bann frer ek ser Seselwa ki kapab e riske perdi zot lanplwa?

Bokou kestyon, me napa larepons. Pwen for dan sa Bidze ki relye direkteman ek mon distrik se amelyorasyon nou *Airport*, pou fer li vin modern, e osi sa fame proze *third lane*.

Kestyon nou demande ankò, eski zabitan Pointe Larue pou ganny konsilte avan okenn proze i demare?

Koman mon lo sa size *Airport*, aret dir nou sa zafer ki nou ti kit pei fermen dan *lockdown*. Sa ki nou, nou ti pou fer se fer en louvertir byen prepare, e byen striktire, pa parey sa reouvertir dezord fonde dan mansonz ki zot in fer ki'n kout lavi 122 nou frer ek ser Seselwa.

Petet zot ava dir zot ki pe *run border*, me zot bezwen realize ki sa proze pou annan en lenpak direk lo nou kominote. E lo sa not mon demann Gouvernman pou vin anver nou zabitan avan pou etabli sa dyalog neserer e nou ava met lide ansanm.

Mr Speaker, larzan i en size tre delika pou *deal* avek e fodre pa ki nou les en parti politik deside mannyer pou depans larzan piblik. Popilasyon i merit ganny *involve* e partisip aktivman dan desizyon ki konsern lavenir nou pei.

Dan en vre demokratik, se koumsa i deroule. Konsernan lakaz, nou'n ganny dir ki Selman 37 lakaz pe al ganny konstri pandan lannen 2022. *Low cost housing* pe al ganny fer e sa pou kout R2.4 Milyon.

Mon krwar ki tou Seselwai konpran sa term *low cost*. Mon distrik in enn kot i annan problem mazer kot i konsern lakaz. Zis pou fer zot rapel ki sete enn parmi bann premye landrwa ki per fondater, France Albert Rene ti konmans batir pou ed malere, e sa ti apel *low cost*.

Ozordi nou fyer nou annan nou zoli distrik ranpli ek dimoun ki'n konn lamizer, e zot

in travay dir pou aranz zot lakaz mannyer zot kapab.

Me i ankor annan en group ki pa pou kapab e pa *afford* kot pou re batir zot lakaz. Lo sa pwen, mon ti ava kontan demann Minis pou reget en pe sa bann *Capital Project* e konsider sa proze Nageon *Estate Redevelopment Plan*.

Sa ti ava soulaz e relev moral zabitan mon distrik. Bokou sa bann lakaz i demann en bon reparasyon mazer.

Mr. Speaker, semen i en lot size tre enportan ki zabitan Pointe Larue pe demande. Bokou dimoun pe vyei e osi i annan en group ki oule devlop zot landrwa, me semen i ankor en gro baryer.

Sa sityasyon i kree bokou fristrasyon parmi popilasyon, sirtou letan i annan dimoun malad e lanbilans pa kapab monte.

Mon swete ki avek sa nouvo *Bill* lo lenfrastruktir, keksoz ava bouz pli vit e dan en pli bon direksyon.

Mr Speaker, sa Bidze napa en mo ki'n koz lo ki mannyer nou prepar lazenes pour le fitir?

Pandan sa letan *COVID* e apre *COVID*. Minis, par egzanp ledikasyon, si ou regard sa zenerasyon zenn ki dan lekol, zot pou soufer e zot deza pe soufer.

Depi lannen pase ziska la, zot preski pa pe fer naryen an term akimilasyon konesans akademik. Ki sa pou veditir? Savedir si nou pa fer atansyon i pou annan en letan dan devlopman nou pei, kot ou pou annan en gran gap.

En bon group nou bann zenn ki'n swiv kour aletranze e ki'n *graduate* pou ranpli bann pozisyon pa pou arive.

E sa pou fer ki i pou annan en *brain drain* dan bokou sekter nou pei, e sa pou enpakte direkteman lo nou lekonomi.

An plis ki sa, ki sa Bidze pa pe fer, se i pa pe fer provizyon pou met bokou lanfaz lo sa ki nou apel ledikasyon vertyel, ki bann etidyan ki dan lakour i ava kapab kontinyen avek zot letid.

Me o kontrer Minister in anvoy *syllabus* bann etidyan e bann ki pli feb pa pe kapab swiv.

Mon sizere ki Minister i revwar kalandriye pou vakans, pou asire ki bann etidyan i kapab kouver zot bann letan perdi. Sa i ava ed zot devlope tou zot bann talan e abilite pou fer pli byen.

Mr Speaker, sa ki Gouvernman i merit fer, se ankouraz en program byen striktire, pou ankadre nou

bann zenn profesyonnel dan bann sekter kle nou lekonomi e sa i ava fer ki malgre ki nou pou annan serten defayans dan pei, nivo sekirite lanplwa pou nou Seselwa pou pli garanti.

Mr Speaker, lo nivo sosyal letan mon pe regard mon distrik, i esansyelman bann *single mothers*, oubyen bann *household* i ganny *head* par zis en paran ki pli ganny afekte avek sa Bidze.

Lamazorite *household* i ganny *head* par bann madanm, sa bann dimoun ki pe benefisyen en saler atraver program ki Gouvernman ti'n met an plas.

Alors, ki mon pe fer resorti se ki mon santi ki mon distrik in ganny vreman afekte avek sa bann sanzman ki'n arive. Atraver ou Mr Speaker, Minis pri lavi pe kontinyelman monte e paret Gouvernman pa pe realiz sa. Toulezour pri laboutik i sanze malgre pri *foreign exchange* i reste parey.

Mazinen ki ler pri lavi i monte, sa pou definitivman annan son konsekans sosyal. Nou pou vwar en logmantasyon dan bann fleo sosyal tel ki drog, vol, lalkol e prostitisyon.

Mwan mon santi mwan konsernen avek lazenes mon distrik. Si nou pa fer atansyon, la fason ki nou fer sa bann sanzman drastik, i pou

otomatikman annan lefe direk lo paran, e pli gro difikilte e defi, pou ganny santi par sa bann zenn bann zanfan ki pli vilnerab.

Nou pou annan en zenerasyon ki pou pe viv dan en sityasyon kot zot in ganny deprive sosyalman.

Minis annou annan en leker imen ek konpasyon pou sa ki pli fay dan nou sosyete. Tou sosyete i annan, e pou toultan annan bann ki pli fay, kot lasosyete pou bezwen ede no *matter what*. Zefor ekstra merit ganny mete lo ledikasyon nou pep.

Minis zanmen in lentansyon zabitan mon distrik pou reste depandan lo *welfare* tou zot lavi. Mazorite zabitan Pointe Larue pe travay avek lafyerte pou sonny zot fanmir mannyer zot kapab.

Mon'n analize ki dan detrwa lannen ki pe vini, si nou pa fer atansyon, nou pou annan en sityasyon sosyal serye dan nou pei e sa pou reflekte atraver mazorite nou bann distrik lo Mahé, Praslin e La Digue.

Sa Gouvernman devret al pli lwen rod bann *expert* dan *social studies*. Akoz ler ou pe pran serten desizyon i annan keksoz ki ou devret pran an konsiderasyon.

Pou lemoman zot pe fer li pirman *en regardant* selman son laspe ekonomik, san realize ki sa i pou enpakte lo en zenerasyon lazenes pou bann lannen ki pe vini.

Paran pou nepli kapab anmenn sa kantite larzan kot lakour, bokou pou napa lanplwa, e deza nou annan en sityasyon bokou papa pa oule pran responsabilite an term responsabilite kot lakour.

E sa problem pa zis dan mon distrik. Sa i konsern pei antye e tou sa *MNA* ki la i konn sa tre byen.

Nou deza annan en sityasyon kot bokou zanfani i depan lo *Dedicated Funds*. Gouvernman i bezwen prepar li pou redres sa anomali an term bann program ki pe ganny retire e lasistans ki'n ganny koupe.

Akoz son lenpak pa pou dire zis pou detrwa mwan, i pou mark en zenerasyon antye, bann zenn osi byen ki lasosyete pou soufer dan lefitir.

Minis, ou Gouvernman pa pe fer analis Bidze lo en pwennvi makroekonomik pou vwar son lefe. Zot pe zis pran en desizyon vitman san fer bann analiz profon.

In prouve ki parfwa nou imen nou fer serten desizyon ki

pa rasyonnel, mal plase e byensir mal kalkile.

Mr Speaker, i vre nou dan en moman difisil kot wi nou bezwen serten mezir pou nou ede redres lekonomi fas a sa pandemik. Me nou bezwen port atansyon letan nou pe fer sa.

Minis in deklare ki nou'n sorti vremen lwen e menm sorti dan *ICU*. Sa i gras a travay eksepsyonnèl sa group teknisyen ki ti la avan Oktob 2020.

Mon konnen poudir sa group travayer kot Finans i konn zot louvraz e determinen fer nou pei bouz devan malgre difikilte.

Nou rekonnèt zefor e nou dir zot mersi. Koman enn zot ansyen koleg, mon konnen ki zot in travay dir pandan sa pandemik. E la mon mazin bann travayer kot Trezor ki'n travay dir, pou fer sir ki nou larzan i rantre dan nou kont lafen dimwan.

Atraver ou Mr Speaker, zot in demann mwan pou pas sa pti mesaz lo zot *behalf*, zot ti form parti travayer esansyel, e ni en pti *allowance* zot pa'n gannyen. Zot in pran bokou risk zot ti ava kontan Minis i get dan zot *welfare*.

Mr Speaker, an konklizyon, le sel lespwar ki reste pou nou pep, se ki an

lannen 2025 nou pou annan en sanzman Gouvernman!

(APPLAUSE)

HON CONRAD GABRIEL

E sa sanzman Gouvernman ki pe vini, pou annan bann reazisteman dan faver nou pep.

Zot in koze, nou'n tande, konmkwa ki zot Gouvernman in ganny elekte pour 5an. Nou'n egalman konpran ki la lo komansman, malere pou soufer, e ki se nek an lannen 2023 pou al 24 ki zot pou komans pas dimyel o bor ver.

Be dan lenstans, la dan premye lannen zot bann dirizan in fini aranz zot avek nouvo benefis. Zot in pran tou sa ki pou zot, zot in byen aranz zot, apre zot in lans en lapel pou malere fer sakrifis.

Mr Speaker, problem kot i vini, se ki nou annan en Gouvernman ki pe travay 100poursan pou byennere, e an menm tan ki zot pe demann malere pou sakrifye, me letan ki lekonomi pou rekipere, nou tou nou sipoze byen pase.

Mon kestryon final se ki kalite lazistis ki zot pe sey anmenn dan sa pei, Kot dan move tan, zis en bann ki pou sakrifye, selman dan bo tan, nou tou nou pou benefisye?

Mr Speaker, mon pe envit tou mon frer ek ser Seselwa pou komans en refleksyon serye lo lavenir nou pei apartir pou lannen 2025.

Sa pei pou bezwen rebran, e relanse. Nou bezwen komans retourn konfyans nou pep dan son Gouvernman, nou bezwen viz ver en fitir kot nou tou nou benefisye, me non pa zis serten ki benefisye, apre leres i bezwen sakrifye. Avek sa mon ava dir ou mersi Mr Speaker.

(APPLAUSE)

MR SPEAKER

Mersi Onorab. Mon ava aprezan apel Onorab Phillip Arissol.

HON PHILLIP ARISSOL

Mersi Mr Speaker. Bonn apre midi tou dimoun. Mr Speaker Bidze 2022 i premye Bidze ki ganny prepare e prezante par Gouvernman LDS i annan selman 1an o pouvwar. E i en Bidze vize ver sityasyon pei ozordi. COVID-19 in defye Sistenm Lasante Mondyal e Sesel pa'n ganny eparye.

Menm si ozordi sityasyon COVID pa ankor ganny met anba kontrol dan lemonn, Sesel in kapab donn vaksen en bon poursantaz son popilasyon e

menm al pli lwen kot le 25 Mars 2021 i ouver son frontyer.

Malgre ti annan bokou kritik par *US*, nou'n nobou ouver nou frontyer pou ki touris i kapab antre dan pei avek bi pou nou relans nou lekonomi.

Sa bann desizyon in ganny konfyans bann viziter pou retourn Sesel e kot biznes touris in rebran. Avek sa Sesel in vwar en gran amelyorasyon dan Sekter *Tourism* pou lannen 2021 konpare avek 2020.

La trwazyenm kar 2021 Sesel in rikord larive 4,285 touris an mwayenn par semenn konpare avek an mwayenn 443 touris par semenn dan premye kar 2020.

Lafen Oktob 2021 kantite viziter ki'n antre Sesel ti (mil 33) 133 mil 966. Gouvernman in fer li son priyorite pou siport Minister Lasante dan tou son bann demars pou kapab anmenn sa konba kont *COVID-19*.

E la mon ti ava kontan remersye tou travayer Lasante ki'n devoue tou zot zefor pou asir byennet, tou Seselwa.

Mr Speaker si ou anvi asir prosperite pou fitir zenerasyon Sesel, nou bezwen annan linite e viz tou nou zefor dan en sel direksyon, e sa ver rekipasyon. Kot nou tou nou travay ansanm pou nou konnen

ki sa pa fasil. Se pou sa rezon ki i annan bann desizyon brav ki'n ganny pran.

Sa bann desizyon ki Gouvernman in pran i dir wi Mr Speaker Gouvernman *LDS* i bezwen pran sa bann desizyon dir avek sa bi pou redres pei e tir nou dan sa trou ki *COVID-19*, sanzman klima e *US* in met nou ladan.

La nou bezwen travay ansanm pou nou kapab redres sityasyon pei. Wi i dir me ou bezwen fer li ansanm san fwa sa ki pli vilnerab pou soufer.

Mr Speaker ler mon pe ekout bann *MNA US* pe koz lo sa Bidze, ou a krwar ki zot fek ariv Sesel. Ou a krwar zot pa ti la. Ou a krwar zot pa'n zanmen o pouvwar pandan sa 43an.

Mr Speaker mon kapab garanti tou Seselwa, ki sa Gouvernman pa'n zanmen e pa pou zanmen aret travay ziska ki Sesel i retourn stab finansyerman.

Parey i ti fer dan sizyenm Lasanble, kot voler dan kitenge ti koupe. E sa ti ler *LDS* ti konmans kler tors lo zot. Se la ki zot ti konmans konpran ki zafer pa pou bon.

Ozordi avek bann desizyon brav ki sa Gouvernman in pran, nou kapab dir ki nou pe sorti dan sa difikilte ki nou ti ladan e nou

lekonomi e sityasyon finansyel e stabilize.

Alors i lemoman kot nou tou ansanm nou konmans konman e Nasyon nou remet tou nou zefor ansanm e travay pou konstrir nou pei e remet nou lo semen progre.

Atraver sa Bidze nou vwar ki program Gouvernman ki o pouvwar ozordi, i klerman vize ver promouvwar loportinite pou Seselwa.

Mr Speaker pandemik *COVID-19* pa'n zis move. In osi lev nou dan nou sonmey. Lo lafen 2021 nou ankor pe santi son lefe. Nou'n aprann nouvo fason fer keksoz. Annou ansanm sezi loportinite menm si i en moman difisil pou nou, tou annou donn koudmen pou fer pou nou refer nou pei.

Mr Speaker dan Bidze 2022 Gouvernman pe siport konklizyon 51 lakaz ki'n konmanse an 2021.

E osi konplet lenfrastriktir 116 kare later *land bank*. E dan Bidze 2022 Gouvernman pe fer provizyon pou konstrir 37 nouvo lakaz. I pa pe promet 3000 lakaz. E i pe devlop 88 morso later e pou *land bank*.

Setadir ankor 37 fanmir pou benefisyé par 3000 dimoun pe espere e 88 ava ganny zot morso later e zot ava kapab akonpli zot rev.

Anse Boileau nou proze *land bank* kot Olden Pierre i dan staz avanse. Mon swete e ki avek lapel Gouvernman ver bann Labank Komersyal e sekter prive pou osi ofer finansman setadir *loan* lo en to lentere abordab, ki bann aplikan ava kapab pran e konplet zot lakaz.

Mon pe osi esper ek pasyans devlopman lezot *land bank* dan distrik tel ki Montagne Posée Grand Bois, la ankor zabitan mon distrik ki'n fer zot laplikasyon ava benefisyé.

Mr Speaker Anse Boileau in pas atraver en bon pe problem pandan 2021. 4 dife dan lakaz kot fanmir in perdi tou. Pli resan le 10 Novanm ankor en fanmir i persi tou son posesyon.

Sirtou la pandan sa moman tre difisil mon ti ava kontan remersye tou bann vwazen e lezot endividi ou lorganizasyon ki'n siport sa 4 fanmir pandan sa moman difisil.

Mon pou osi remersye e felisit *fireman* kot *Station* Anse Boileau pou zot devouman e travay dir, pou ede sa bann fanmir ki'n perdi zot bann keksoz.

E mon swete ki dan sa Bidze i annan plan pou refer sa

stasyon ou fer en renovasyon lo sa stasyon, avek bi elev nivo pou ki sa bann *firemen* ava santi zot bokou pli konfortab. E zot ava pli motive kontinyen pou deservi nou distrik, osi rezyon was Mahé ek lezot landrwa ki zot ganny demande pou asiste.

Mr Speaker, mon pou osi demann zabitan ki annan bann keksoz ki kree bann lobstak dan semen, ki poz problem pou *Fire Brigade*, lo en akse lib dan semen sirtou bann semen segonder pa zis dan distrik Anse Boileau me dan pei antye pou retire, ouswa donn permisyon pou retire.

Sa pou ede fasilite travay *firemen* kot zot kapab ariv dan landrwa kot dife pe pran e la petet ede osi sov lavi.

Mr Speaker avek sa leve sanzman klima, ki pe kontinyen afekte nou bann zil mon soulaze pou aprann ki Anse Boileau en distrik ki ganny afekte bokou par linondasyon, sirtou sa enn ki ti afekte le 9 Me 2021.

La mon soulaze ki travay pe al konmanse, e bann zabitan e fermye ki pe reste dan plato ava kapab benefisye. Akoz travay pe al demare nenport ki moman.

Mr Speaker lo lapar bann peser e zabitan Anse Boileau,

mon'n byen akerir lanons ki Minis ki nouvo proze pou distrik pou demare 2022. Sa pe enkli proze Anse La Mouche e ki sa pou ganny fer an de staz.

Premye staz proze pou konklir ouver lapas pou bann peser kapab debark zot pwason e pran *ice*. E sa i en demann ki mwan e bann peser Anse Boileau ti pe fer pou tro lontan.

Minis in osi dir ki sa proze in ganny bidzete a R2 milyon. E son dezyenm faz ki pou konmanse lannen 2022 a terminen 2023 e sa pou konpri bann fasilite debwaz pou bazar e stor pou gard lekipman travay bann peser.

E sa dezyenm faz proze pou kout anviron R3milyon. Finalman bann zabitan Anse Boileau ava kapab ganny en bazar.

Mr Speaker nou bann peser pou osi kontinyelman benefisye avek sa egzansyon. Avek larive *COVID-19* 2020 nou'n finalman realize ki lagrikiltir i enn bann sekter pli enportan nou lekonomi an se ki konsern sekirite alimanter.

Langazman Gouvernman pou sa sekter pou 2022, i vize ver donn sipor bann fermye e asire ki nou ariv lo target pou ogmant prodiksyon zannimo, legim e target mwayen term pou arive fer prodiksyon lokal depas

omwen lanmwatye sa ki nou konsonmen.

Nou bann fermye Anse Boileau i vreman debourye e parey bann peser mon pe swete ki zot ti ava kapab ganny en landrwa ideal ki zot kapab kontinyelman vann zot prodwir.

Mr Speaker bann proze ganny fer dan distrik Anse Boileau 2021, mon vwar ki annan kontinyasyon ek konpilsyon serten proze. Tel elev nivo semen Caiman Estate ki'n konplete *road diversion* kot legliz ki lo faz konplisyon, re sirfas bokou nou bann semen segonder, enstalasyon lalimyer osi pou bann semen segonder.

Mr Speaker etandonnen ki nou dan lasemenn sekirite lo semen, mon demande ki proze enstalasyon *crash barrier* lo lakot Anse La Mouche i kontinyen an 2022. E osi dan bann semen segonder;- tel ki Hermitage, Anse La Mouche, Caiman. Sa avek bi pou diminyen sa risk annan aksidan fatal.

Mr Speaker *Leader* Lopoziyon in dir nou ki dan *speech* Minis, Minis pa'n nonm zenn en sel fwa. Me Mr Speaker mwan mon'n atann Minis dir ki dan sa Bidze i annan en alokasyon R11milyon pou renovasyon bann diferan lenfrastruktir sportif.

(1)R2 milyon pou renovasyon Stad Linite.

(2) R2milyon pou renovasyon *Palais des Sport*.

(3) R3.5milyon pou renovasyon Anse Royale *Sport Complex*,

(4) R1.5milyon pou renovasyon La Digue *Sport Complex*, e

(5) Alokasyon R1.5milyon renovasyon bann lezot lenfrastruktir sportif.

Mon prezimen ki sa bann lenfrastruktir sportif pou ganny servi par bann zenn. E mon espere ki Minis i kapab dir nou sa.

Mr Speaker mon konnen ki i dir ki bann dimoun ki pe espere pou ganny zot pansyon a laz 63an. E la zot pe bezwen esper ziska 65an prezan pou zot kapab tous zot pansyon.

Bokou sa dimoun in konmans travay depi byen zenn. E la zot in konmans santi bann pti douler isi, bann pti douler laba. Bokou zabitan mon distrik in le eksprim dezapwentman avek sa sityasyon an se ki konsern laz ki en travay pou kapab ganny son *full* pansyon.

Me Mr Speaker, en pe letan pase nou ti ganny averti ki sa pou ganny arive. Dan son dezyenm ladres konman Prezidan le 25 Zilyet 2017 Msye

Danny Faure ti anonse ki laz pou en travayer ganny son pansyon pou monte pou vin 65an.

Rezon ki i ti donn nou se ki nou annan en popilasyon ki viv pli lontan. E la i lemoman pou prepar popilasyon e anonse ki Gouvernman pou bezwen fer monte laz retret.

Gouvernman ti sipoze prezant lamannman ek Lalwa lafen 2017 e osi fer lamannman ek *Pension Fund Act* kot laz ava monte sorti 63an pou vin 65an.

E sa ti sipoze pran lefe le 1 i sipoze pran lefe le 01 Zanvye 2023. Minis Loustau-Lalanne ti koz osi lo sa size la dan nou Lasanble.

Me nou, nou pa'n pran sa serye. Mr Speaker si nanryen pa ganny fer la, plizyer nou ki pe travay an se moman pa pou touse en pansyon.

Nou problemm avek sa Fon Pansyon, se ki larzan in vwar larzan i pa tou letan ki'n ganny byen zere. Parey dan ka kot Fon Pansyon ti aste par dan *Cable and Wireless* e sa ti lev en gran kankan.

En lot sityasyon ki pe met presyon lo pansyon, se ki bokou bann zenn ti kapab dan lanplwa pou kontribye dan devlopman ekonomik nou pei i lo sibstans swa dan drog, swa lo lalkol.

Alors sa i montre nou ki lager epou retir nou bann zenn lo sibstans pa konsern zis Gouvernman, me i konsern nou tou.

Mr Speaker, parey mon'n dir lo drog e lalkol ki afekte nou zenn dan pei i osi Anse Boileau.

Bokou bann zenn ti kapab dan lanplwa pou ede kontribye dan devlopman pei, e ede sipor lekonomi zot nepli kapab. La ki Gouvernman pe entansifye lalit kont drog, e pe fer sir ki drog pa antre dan nou pei mon soulaze.

Mon bezwen felisit nou bann Gard Lakot, *Airforce* ek tou bann ki enplike dan sa lalit.

Prezan Mr Speaker, lanfaz i merit ganny mete lo tretman sa bann zenn. E swivi i merit pran primordyal, pou vwar laplikasyon sa bann medikaman kot nou vwar bann bon rezilta.

Mr Speaker mon pou repete, swivi i merit primordyal pou vwar aplikasyon sa medikaman kot nou ava ganny rezilta pli bon.

Akoz pou lemoman nou pe kontinyelman vwar bann adikt ki pe pran *methadone* bomaten, e plitar pandan lazournen sa bann menm zenn pe retourn lo gento pou pran zot *shot*.

Mr Speaker nou anv i ki nou bann zenn i rebran kontrol zot lavi. Nou anv vwar ki nou

bann zenn i reganny lespwar e stabilite kot zot reganny sipor lankourazman zot fanmir e lasosyete.

Kot zot kapab ganny en lanplwa e sonny zot fanmir e fer en kontribisyon pozitiv dan sosyete.

Mr Speaker parfwa dan lavi zonn i tonbe, sa parfwa i en aksidan, ou fot frekantasyon. Me Mr Speaker, si ler ou'n tonbe ou reste ater sa i ou swa. Pou bann dimoun ki pe kontinyelman enport e trafik drog zot osi zot bann paran. E zot pa ti ava anvii vwar zot zanfan dan sa degenn.

Alor mon siplyi ek zot pou les nou bann zenn fleri e les zot grandi e vin bann bon sitwayen nou pei. Pa kontribye pou met retar e ede met fardo lo nou pei.

Mr Speaker mon vwar ki en total R3.3 milyon in ganny bidzete e R11.6 milyon an 2022 anba Bidze Lapolis pou renovasyon Stasyon Lapolis e konstriksyon en nouvo Stasyon Lapolis La Digue.

Mr Speaker avek sa problemn drog dan pei voler i partou kote. E bann sitwayen i menm i mank sekirite menm dan zot prop lakour. Dimoun i per.

Mon ti a kontan konnen si Minis i kapab zis dir nou si dan Bidze Seselwa i garanti en

sekirite. Sekirite pou bann viziter dan nou pei. Eski Lapolis i pou pli byen ekipe? Eski pou annan larzan pou kapab fer rekritman pou nouvo zofisye?

Mr Speaker *LDS* e Prezidan Ramkalawan in vin o pouvwar Sesel pandan sa moman pli difisil dan son listwar. Bokou travay i annan tro bokou travay pou fer. Me nou pa pou zanmen bes lebra. Wi Mr Speaker nou pa pou zanmen les tonbe.

I annan 5an pou travay. Mon vwar dan sa Bidze prezante par Minis Hassan bokou loportinite Seselwa. Mon vwar osi lespwar pou sa pep.

Me fodre sa pep pa zis asize kritike. Sanzman in arive. Servi sa bann loportinite ki devan nou e travay. Travay e travay dir.

Konman en Nasyon ansanm nou pou sirmont tou sa bann defi finansyel poze par lefe *COVID-19*, lefe sanzman klima, lefe ki *SPPF*, *US* in met nou.

Sa lanvi pou pouse pou pous Sesel ver progre nou pou sirviv, e nou pou sirmonte. Me nou pou bezwen fer li ansanm, pou nou kapab remet Sesel sa bon pozisyon.

Mr Speaker en keksoz ki nou bezwen fer kler e ki *US* i

bezwen konnen, Mr Speaker Sesel e Seselwa ti deza fyer. E sa ti avan koudeta.

Mr Speaker nou pa ti zis fyer. Nou ti osi lib. Mersi.

(APPLAUSE)

MR SPEAKER

Mersi Onorab. Onorab Michel Roucou

HON MICHEL ROUCOU

Bonn apre midi Mr Speaker. Bonn apre midi Minis. Bonn apre midi tou mon bann koleg Onorab. Bonn apre midi spesyal pou tou Zabitan Mont Fleuri bann zoli dimoun vreman entelizan dan Mont Fleuri annan preski dan tou Mr Speaker.

Mr Speaker ler mon'n asize mon'n ekout Onorab Gabriel koz en pti pe lo lapovrete, ki mannyer dimoun pe soufer. Be mwan tou le Dimans mon al fer en pti vire Ovan kot Mrs Lemiel laba dan Anse Royale, apre mon pas par La Pointe Larue, be mon pa vwar okenn zanfan okenn personn pe mandyan lo *Airport!*

E an plis Gouvernman in met en Bidze pou agrandi *Airport* e mwan konman en ansyen travayer ki ti travay *Airport* konman en zofisye mon ti vwar bokou travayer bann

zabitan Pointe Larue ganny en pti plas travay lo *Airport*. I paret mwan ki sak Onorab i pe *mislead* lepep ouswa i pe koz lo son Gouvernman *avan*, ou vwar?

E Mr Speaker, mwan pou mon, mon vwar poudir se ki Onorab mon pe mazin Onorab Bistoquet, nou mank li la pou li donn en bon ladres pou zabitan Pointe Larue.

Mr Speaker sa Bidze ki Minis Hassan in anmenn kot nou pou Lepep Seselwa ou kapab dir se ki i en Bidze parey lezot Onorab avan in dir i en fondasyon. I en fondasyon ki pou batir sa nouvo Sesel. Ki nou Seselwa aprezan zot pou vwar sa loportinite, pou zot kapab kontribye parey nou Gouvernman pe demann avek nou bann zabitan, nou pep Seselwa pou zot vini pou zot zwenn pou nou anmenn sa nouvo Sesel.

E ler mon pe get sa Bidze i pa pou benefisye zis nou la ozordi. I pou benefisye nou bann zanfan dan lefitir Mr Speaker. Akoz Oktob lannen pase nou ti vwar poudir Seselwa ti pran en desizyon, kot zot in met en nouvo Gouvernman ki zot kapab annan konfyans ladan.

Ler mon pe dir konfyans Mr Speaker, zis mon pe demand

ek Lepep Seselwa pou zot al lir rapor oditer, ki fek sorti zot ava vwar ladan. Mwan mon'n lir mwan, petet mon pa'n fini lir tou, selman mon'n lir. Mon ava donn nou detruwa legzanp, Onorab Loze. Zis parey kot Lagrikiltir, zot *procurement plan*. Ti annan bann *asset* ki pa ni pe konnen napa okenn ki dir kote i ete Mr Speaker.

E sa tousala Mr Speaker e *Botanical Garden* ankor i annan bann dokiman ki'n manke ou vwar? E Onorab Loze i konn tre byen li. Akoz son Gouvernman ki ti la.

E dan *COVID Fund*. Ozordi Onorab *LOTO* pe demann nou pe demande ki i annan en *investigation* dan *COVID Fund* nou Gouvernman. San realize se ki ler li i pe vin tir sa pti baton dan nou lizye. E dan pou li i annan sa gro poto parey Onorab Georges ti dir.

Mr Speaker e nou dan nou Gouvernman nou annan en Gouvernman ki responsab. Nou fer sir poudir nou *take care* avek larzan Lepep Seselwa Mr Speaker.

E Gouvernman *LDS* ler mon pe gete Mr Speaker ek sa Bidze ki'n anmennen, ki Minis Hassan in anmennen, i pe donn Lepep Seselwa pou nou leve. Senserman annou al travay.

Annou vini nou ava kontribye da sa Bidze Mr Speaker.

E zis parey nou'n ganny dir oparavan se ki Minis i isi, Minis i laba, mwan mon ti ava voudre dan larepons Minis, Minis i annan en R25 mil ki donn pou sekirite bann Minis, dir nou konbyen, konbyen bann Minis dan nou Gouvernman in servi sa R25,000 pou lo nivo sekirite? Akoz si mon pa tronpe en Minis i ganny en gard *SSU* devan son laport bomaten ziska aswar, dir nou Minis konbyen ansyen Gouvernman zot in servi sa R25,000? Mersi.

E osi Mr Speaker dan Bidze ki nou vwar ki Minis in anmennen, nou vwar poudir bann biznes zot in ganny redwir dan *tax* lo bann profi ki zot in gannyen 25poursan.

E sa i fer li vin i tonm en milyon pou 30poursan Mr Speaker. E dan sa profi ki zot pou gannyen i15 poursan *up to one million* Mr Speaker. Ki sa i *above 25%*. Ki sa i ava ed bann biznes Mr Speaker, pou zot kapab demen zot osi kapab donn bann zabitan dan distrik.

Zis parey dan mon distrik Mr Speaker, i annan bann biznesmenn ki'n vin devan ki'n pare pou zot donn lakominote sa ki zot in gannyen. E mwan mon dir mersi pou sa. E zot osi

zot kapab vini bann larestan biznes. E mwan mon pe anvoy sa lanons bann larestan biznes dan bann plizyer distrik vini kontribye, pou nou kapab bouz nou distrik pli devan e ki nou distrik li menm li i pa kapab zis benefisye zis Gouvernman.

Mr Speaker, e osi Minis in koz lo stabiliz nou lekonomi, ki sa i pe ede an term saler. Kot nou vwar poudir i annan apepre 156 plas travay pou bann travayer ki'n kite Gouvernman.

E dan bann Minister Departman i annan 123 plas travay pou lannen 2022ki sa i ava kapab donn plis nou bann sitwayen plas travay. E plas travay i annan Mr Speaker. Toulezour mwan dan mon *mail* mon gannyen sorti kot Minister Lanplwa. E mon pa konnen ki akoz ki i annan nou ki nou pe dir poudir napa travay dan pei. Travay i annan, e nou, nou pe anvoy sa lanons la deor.

Mr Speaker, ozordi ler mon asize mon get *STC* li menm li. *STC* ozordi in fer en *savings* R40milyon pou lannen 2021. E sa mon pou tir mon sapo avek bann travayer *STC*.

E osi mon bezwen tir mon sapo avek mon Gouvernman ki'n pran bann desizyon brav, ozordi in koup sa bann *rent*, R800mil *rent* ki *STC* ti pe peye.

E sa ozordi i kapab benefisye nou Seselwa Mr Speaker. E mon pa pou manke pou mon dir dan mon distrik Mont Fleuri i annan bokou bann zabitan ki travay kot *STC*. I fer mwan mazin Ms Elna Petrouse en zabitan dan mon distrik en manman ki leve tou le bomaten i al travay Mr Speaker.

E mwan mon dir li bravo, ek son bann larestan koleg pou sa travay formidab ki zot pe fer.

Mr Speaker, dan mon vizit ki mon'n fer dan mon distrik, mon'n osi vizit bann zabitan k reste Ile Aux Cerfs. E dan mon vizit mon'n ganny sans zwenn en group ners ki zot ti pe repoz en pti pe Ile Aux Cerf, e mon ti ganny sans ganny en dyalog avek zot.

Minis mon ti anvi anmenn en propozisyon, mon pe gete si Minister Lasante si zot pa kapab zwenn avek bann zwenn avek Departman Touris koz avek bann letablisman touristik bann pti lotel, gete si zot pa kapab fer bann *package*.

Nou konnen pou dir la avek sa problem *COVID* la petet sa i ava soulaz bann fanmir. Parey nou konnen poudir bann ners i travay *long hours*, zis parey kot mon annan mon vwazen la Nathalie Mathiot. Ennler ler mon

desann mon vwar li pe al debourye aswar. Vwar?

E petet mon mazine sa *package* ki Minister Lasante i ava sey dyalog avek Departman Touris pou koz ek bann pti lotel, ki sa i ava soulaz bann travayer Lasante zot menm. Akoz nou konnen poudir zot pe donn tou, zot pe travay pou kapab benefisye pei e nou pa pe vwar poudir *COVID* deswit la poudir i pou ale. E sa i pa pou kout Gouvernman akoz i pou vin en *package* ki zot, zot ava monte zot ava pey zot pti *package* Mr Speaker.

Mr Speaker Minis osi in koz en pti pe lo kote det pei. Ki'n vwar poudir Gouvernman pe fer sir poudir nou bann det i vin soutenab, ki sa i ava kapab ed nou pei li menm. Pou ede pou kapab kree plis larises Mr Speaker.

Mon vwar poudir sa nouvo Gouvernman ki la Mr Speaker, i en Gouvernman ki pran bokou desizyon. E i la Mr Speaker pou li kapab ed sa pei bouz pli devan.

E sa ki mon pli apresye ek mon Gouvernman Mr Speaker. Mon Gouvernman i fer sir k ii vey larzan sa pep byen. I fer sir poudir tou dimoun ki la, si okenn dimoun ki al dan sa laliny Mr Speaker kont koripsyon, mon konnen poudir

nou Gouvernman i pou met lanmen lo la pou li *deal* avek sa.

Mr Speaker apre osi fodre nou pa bliye si ozordi pei i dan sa bon pozisyon parey en bann pe kriye, nou ti devret la akfer nou vini nou dir poudir keksoz i *ok* apre nou pa donn isi, nou pa donn laba.

Mr Speaker, e mwan mon pa krwar akoz nou bezwen ekout zot, zot ti demande pou zot kapab kit pei kontinyen *lockdown*.

E ozordi nou pa ti pou'n ganny vaksinnen. Ti pou napa touris. E pa bliye poudir zot Minis Finans avan ti dir poudir pou koup saler, bezwen revwar saler pou koup saler lanmwatye.

E ozordi zot pe kriy lasasen akoz napa trezyenm mwan saler. E ni saler ni trezyenm mwan saler nou pa ti pou gannyen pou nou donn nou pep Seselwa Mr Speaker.

E osi en lot pwen ankor ki mon tann zot, zot in kriye lo la mon tann *US* kriy lo la, se ki ogmantasyon bis.

Mr Speaker sa ki pep Seselwa i bezwen realize, poudir toultan sa pep in toultan pe donn larzan dan *tax payers money* pou met lo pri tiket bis.

E ozordi ler nou pe demann ek *SPTC* pou zot osi kapab demen revwar zot fason

travay, donn nou en pli bon servis, zot osi ede dan nou lekonomi Mr Speaker.

E sa nou bezwen dir ek nou pep, poudir se ki *SPTC* lontan i ti ganny li apepre 11 milyon dan Bidze.

E ozordi Gouvernman i kapab pran sa 11 milyon i met dan *ASP* pou kapab asiste nou pep Seselwa la deor Mr Speaker.

Mr Speaker mon distrik Mont Fleuri kot i annan bann zoli zabitan vreman travayant. Zot leve bomaten zot al travay Mr Speaker. Nou pa eparnye avek bann problem sosyal parey nenport ki distrik. Me selman Mr Speaker dan bann vizit ki mon'n fer dan mon distrik, i vreman ankourazan.

Minis bann zabitan Mont Fleuri zot vreman ganny en konpran poudir pei pe pas dan en faz kot nou pe refer nou lekonomi. Kot mon'n pase bokou zot in kapab asize dyaloge, met bann pwen for ankouraz bann zenn pou zot antre dan travay. Servi bann loportinite ki i annan la deor Mr Speaker.

E zis parey mon ava dir ou Mr Speaker ler mon pas dan mon distrik en keksoz pli ankourazan se ki mon zwenn Mr Julie, i en msye ki travay de louvraz, i desann bomaten li i al

travay lo bato ton, aswar i monte apre midi i okip li i desann aswar souvandfwa i desann avek mon ler mwan mon sorti vizit dan distrik, mon met li al fer sekirite en pti landrwa.

Be mwan osi Mr Speaker kantmenm mon'n ganny elekte konman *MNA* dan mon distrik. Mon osi mon kontinyen mon al fer mon pti debrouy. Savedir mon bann zabitan ki travayant. Mon kontinyen ale, malgre ennler mon tann serten Onorab lot kote ki pas serten komanter akoz mon al debourye.

Ase mon'n ale sa bann nide ki nou anvi anmennen dan lasosyete. Se ki nou, nou bezwen leve rod nou dipen. Bondye in dir dan Labib sa ki pa travay i pa manze.

E nou, nou anvi Gouvernman i la, i pou ede son pep, me selman nou pep osi nou bezwen ede. Akoz demen nou pa demande ki nou pas dan en lot faz *COVID*. E nou, nou bezwen konmans travay la Mr Speaker. Nou bezwen bann *leader* edik nou pep pou nou travay.

E Mr Speaker, paret tou bann larestan distrik nou osi nou ti ganny nou R200 mil pou fer bann pti proze dan nou distrik. La nou'n vwar Mr

Speaker kot nou kapab tous bokou bann kominote.

Pou sa msye dezabilite dan nou distrik ed li Mr Speaker. E la ankor pou lannen prosen nou pou revwar pou nou kapab anmenn bann proze dan kominote ki sa i ava benefisye zot Mr Speaker.

Mr Speaker ler mon pe koz dan proze zabitan Mont Fleuri osi in vin ek en nide formidab kot mon. E ozordi nou'n kapab kree en lekip solid ki mon pa pou kapab mansyonn zot non. Mon dir zot mersi. Kot nou annan en bann pti proze kot bann lakour. Kot la in kapab benefisye en madanm aze, Mrs Adam dan leo Foret Noire Mr Speaker.

E nou, nou pe kontinyen, i malere poudir souvandfwa bann proze ki nou anmennen nou bezwen pas *to proper channel*. Nou vwar poudir i annan serten Minister i met nou retar.

E sa i met nou retar avek bann biznesmenn ki'n pare pou investir dan nou distrik Mr Speaker. E nou, nou pe demann avek sa bann Minister se ki an vi ki Gouvernman. Gouvernman pe dir poudir se ki pei pou lemoman parey in dir nou ankor nou Lopital se ki pou vin devan e ed nou distrik ed

nou pei, e bann biznesmenn ekout sa lanons Mr Speaker.

Mr Speaker, mon'n ganny sans osi pou mon zwer avek plizyer lekip spor, ki mon remerci zot aköz i annan bann lekip ki vreman formidab;- ki zot pe anpes bann zenn tonm dan bann fleo Mr Speaker.

Kot la nou kapab asize ansanm, mon dir mersi Mr Ah-Kong anler dan leo Foret Noire ki'n pare li ek son tim Mr Speaker. Pou nou kapab pran nou kort *basketball* pou nou araze. E nou'n ganny sans pou nou zwenn avek *CEO NSC* kot la osi in *join* nou, pou nou kapab anmenn sa devlopman kot la nou kapab batir, lev nou bann zenn.

E osi Mr Speaker mon pa pou manke pou mwan remerci nou de tim futbol. Tim Mont Fleuri Tim *Foresters* ki la zot osi zot pe anmas nou bann zenn.

E nou'n vwar dan Bidze Mr Speaker, i annan en larzan ki'n ganny mete pou *manage* pou bann lenfrastruktir spor. Kot petet sa osi i ava ede pou nou ankouraz plis bann zenn pou desann, pou vin donn lanmen Mr Speaker.

Mr Speaker, mon pa pou manke osi tou pou mwan koz lo bann *field worker*. Ler mon ti fek ganny elekte ler mon ti antre dan lofis Mr Speaker, mon ti

ganny sans pou mon zwenn enn de sa bann travayer *field worker Local Government*.

E zot pli gro konsern ti sete zot saler. E nou'n vwar poudir ozordi avek sa lapel ki Gouvernman *Local Government* ti anvoye Mr Speaker, nou'n vwar poudir lapey sa bann *field worker* in ganny revwar Mr Speaker.

Ozordi zis parey mon kapab mazin Pam en pti madanm ki depi lontan Mr Speaker, i pe debourye kot biro distrik Mont Fleuri. E mon kontan tou le bomaten ler mon vini mon vwar li pe debourye.

E ozordi i annan en gran soulazman. I malere poudir ti annan en konpany Mr Speaker ki ti pe dir avek sa bann *field worker* pou zot pa re *apply* zot pos.

E mon byen kontan poudir mazorite bann ki ti pe travay kot Ladministrasyon Distrik Mont Fleuri zot in *apply*, e zot in gannyen Mr Speaker. E mwan mon vreman apresye lo la Mr Speaker.

Mr Speaker ler mon pe get bann zenn, ozordi Mr Speaker dan mon distrik nou en distrik ki nou annan bokou zenn mon'n zwenn ek enn de zot, mon'n ganny sans pou mon zwenn avek Komite *DYC* dan mon distrik. E mon apresye sa

travay ki zot fer, zot plan ki zot annan pou nou bann zenn Mr Speaker.

E la nou'n vwar avek sa *Bill* ki Minis ti anmennen, Minis pou Spor ki la i ava donn plis loportinite nou bann zenn. E nou, nou pe dir ek nou bann zenn nou, nou anvi bann nide sorti kot zot, vini vin kot nou anmenn bann nide ki sa ava kapab relev nou distrik Mr Speaker. Nou pe demann ek bann zenn pou servi sa loportinite, Mr Speaker.

Mr Speaker mon distrik osi parey Minis in dir se ki nou pou napa gran devlopman lakaz pou lannen prosen.

Me selman Minis nou ganny en konpran nou. Nou ganny en konpran sa problem finansman ki pei pe pas ladan la. me selman petet nou ava kapab fer en pti rekomandasyon Mr Speaker.

Rekomandasyon pe demande Mr Speaker se ki i annan bann *low cost house* Corgate Estate petet vwar avek *PMC* an menm tan ki bann zabitan pe espere. Sey revwar en pti pe bann renovasyon ki zot fer lo la. E ki sa i ava kapab soulaz sa bann zabitan.

E mon vreman apresye ki mon ti ganny sans pou mon zwenn avek Minis lakaz kot la zot pe anmennen en

program pou sey revwar pou zot kapab konmanse pou fer de blok flat Corgate. Nou konnen poudir sa i ankor an diskisyon, me selman nou swete poudir sa i ava kapab ganny materyalize.

Mr Speaker nou vreman apresye ki Gouvernman ozordi in kapab pran en *stand* lo bann dimoun ki pe aste en bout later.

E mwan mon pe demann avek bann zabitan pou zot servi sa loportinite, parey in ganny anonse pou nou donn lannen nou osi kot nou biro distrik nou'n ganny sa lenformasyon pou Minister Later pou sey idantifye bann bout later dan distrik.

Ki sa i ava benefisye bann zabitan e nou, nou pe demann ek bann zabitan pou zot donn nou sa koudmen. Pou nou kapab idantifye bann bout later ki sa i ava kapab benefisye zot Mr Speaker.

Ankor Mr Speaker, se ki bann zabitan nou'n vwar poudir dan lepase in annan bokou dimoun ki'n ganny later malapropo Mr Speaker.

E nou, nou pe demann avek Minister pour Later pou zot revwar sa bann zafer, get sa bann dimoun ki annan bann bout later sirtou dan Kan Tobrouk Mr Speaker i annan bokou bann bout later la kot

nou vwar poudir dan lepase bann dalon in gannyen.

E parey nou ti ganny dir poudir i annan ki ti zis anbank dan en transpor ti al fer letour, gete kote bann bout later i ete pou zot partaze antre dalon.

Mr Speaker mon vreman apresye ki Minis zot pe dir poudir i annan en travay ki zot pe revwar saler li menm li, ki sa i pou lannen prose kot nou pou vwar kot dan saler pou annan en gran laranzman pou ed bann dimoun plito anba. E sa i ava benefisye zot e zot kapab. Minis mon vreman apresye poudir i annan sa.

Mr Speaker mon pa pou kapab manke pou mwan dir de pti mo pou bann *carer*. Bann *carer* aneife i annan en louvraz pe ganny fer par zot Minister anba, pou revwar en pti pe parey bann *field worker*, in ganny pase pou revwar get en pti pe bann kondisyon gete, akoz bann *carer* dan lepase pa'n ganny gete.

Zot pa'n ganny gete zot in ganny servi dan dernyen Eleksyon ti dir i annan sepa 300 *carer*, sepa ti pe sey fer politik avek, ki pa'n marse.

Minis bann *carer* zot pa kapab pran en *loan*. Mon mazine anba sa reform ki pe vini e osi ler zot fini zot aret travay zot pa benefisye avek

bann benefis ki laplipar travayer. Mon mazine poudir la dan sa soz ki ASP pe fer i ava benefisyé zot.

Mr Speaker, mwan osi tou mon sorti dan en fanmir kot ou ganny afekte ek drog. Bokou paran pe soufer aköz dan sak fanmir i annan sa problem drog. E mon vremen apresye Mr Speaker, ki sa louvraz ki sa Gouvernman pe fer, aköz nou tou la ozordi nou ti ava voudre vwar nou bann frer ser ozordi pe kapab travay e kapab leve debourye zot osi zot annan zot fanmir. Bokou fanmir pe soufer.

E mwan mon pe dir Gouvernman *well done* ki sa louvraz ki zot pe fer kont drog Mr Speaker. E lo kote transpor mon'n vwar poudir se ki sirtou sa bout kot semen *Weeling* la Mr Speaker. I annan en Bidze ki'n ganny mete pou elarzi sa semen la pou fasilite bann transpor ki pe pase e osi sa i ava evite poudir i annan aksidan.

E lo kote Bois De Rose osi tou i annan R4 milyon ki sa i mete pou annan agrandi semen kot Bois De Rose, ki sa i ava ed bann transpor ki pe deservi la ki sa. Mr Speaker mon pa pou kapab osi manke pou mon koz en pti pe osi Mont Fleuri i annan bann zenn ki pe pran en karyer dan lapes.

E mon mazine nou'n konmans en dyalog avek CEO SFA, malerezman COVID ti'n met nou en pe retar pou nou revwar, aköz bann peser Mont Fleuri sa pti group peser zot pe rod en landrwa pou zot kapab met zot bann lekiman. Mon mazine poudir boner lannen prosen nou ava kapab fini bann dyalog Mr Speaker.

Mr Speaker sa *Bill* ki Minis in anmennen i vremen enportan. I vremen enportan pou nou pei, aköz sa ki pe ed nou pou nou kapab leve Mr Speaker.

Aköz sa fondasyon ki sa Gouvernman osi ozordi pe mete Mr Speaker, sa ki pou benefisyé se nou zanfan parey mon'n dir.

Mr Speaker mwan mon pou donn mon sipor sa *Bill* e Minis kont lo nou, kont lo zabitan Mont Fleuri pou nou donn nou Gouvernman sa sipor. Mersi Mr Speaker.

(APPLAUSE)

MR SPEAKER

Mersi Onorab. Bon nou ava aret la pou ozordi. Mon ava remersye bann Manm pou zot partisipasyon e Minis pou ou latansyon e osi nou *staff* Sekretarya pou zot sipor toultan ki mon pou remersye

zot. Nou ava rebran deba lo sa
Bill demen bomaten 9er.

(ADJOURNMENT)